



المسرحية الكوميدية  
**خطفونى ولاد الإيه!!**

تأليف  
**السيد حافظ**



الهيئة المصرية العامة للكتاب  
٢٠٠٤

## كتابات جديدة

رئيس مجلس الإدارة  
أ.د. سمير سرحان

رئيس التحرير  
د. سهير المصادفة

مدير التحرير  
السماح عبد الله

الإشراف الفني  
صبري عبد الواحد

تصميم الغلاف  
الفنان: سامي بخيت

# الإهداء

أهدى هذه المسرحية  
إلى الدكتور / محمد عناني  
المسرحي والشاعر والمترجم





هذه مسرحية

**خطفوني ولاد الإيه**

إنها التجربة الخامسة لكتابة مسرحية الفلاح عبد المطيع  
كتبتّها خمس مرات طوال عشرين عاما، وهذا فتح جديد  
لأساتذة وطلاب وباحثي المسرح المقارن، ليس بين الكاتب  
وغيره، ولكن بين الكاتب ونفسه .



## الفصل الأول

### المشهد الأول

- راوى ١ : مساء الخير عليكم.. (يظهر وخلفه ستار سكوندو)
- راوى ٢ : مساء النور والأتوار على أهل بلدى الكرام.. (يظهر من الاتجاه المعاكس)
- راوى ١ : الليلة دى حنكى لكم حكاية سلطان مصر قنصوة الغورى..
- راوى ٢ : لا وحكاية سلطان زمانه.. الفلاح عبد المطيع.
- راوى ١ : سلطان مصر قنصوة الغورى.. إزاي جه وحكم البلاد.. وإيه اللي جرى فى زمانه للعباد..
- راوى ٢ : سلطان زمانه فلاح بسيط.. اسمه عبد المطيع.. وكان بيعيش فى عصر السلطان قنصوة الغورى..
- راوى ١ : الحكاية دى حقيقية..
- راوى ٢ : وحصلت فى مدينة القاهرة..
- راوى ١ : فى ليلة من ليالى مصر المحروسة.. وكان السلطان العادل طومان باى راجع إلى قصره فى القلعة..
- راوى ٢ : ضربه بخنجر فى الظلام..
- راوى ١ : الخنجر مجاش فى السلطان..

- راوى ٢ : جريت العساكر وجريت الممالك يدوروا على اللى  
ضرب الخنجر على السلطان.. فى الضلعة..
- راوى ١ : وفى الليل.. وبين المشاغل والجرى والهزتك  
والبرتك.. اختفى السلطان العادل طومان باى..
- راوى ٢ : فى الوقت ده كان سلطان زمانه عبد المطيع.. قاعد  
قدام الدار مع جارتة فاطمة.. وفاطمة عطيتة  
برتقالتين.. وياعينى على الحنان والحنية عبد  
المطيع.. أكل واحدة وعطى عياله برتقالة.. وخاف  
يقول لمراته عن برتقال فاطمة.. أو يجيب سيرتها  
لياكل علقه من مراته أم بثينة.. (يظهر المنادى)
- المنادى : يا أهل القاهرة.. يا أهل القاهرة مرسوم.. سلطان  
البلاد العادل طومان باى.. حفظه المولى ورعاه..  
اختفى من المدينة.. واللى يلقاه يبلغه الأمان.. إن  
القاهرة المحروسة محتاجة له.. ورجاله الممالك  
عايزينه.. مرسوم.. سلطان تايه يا ولاد الحلال..  
والأمان لمولاتا السلطان العادل طومان باى.. اظهر  
وبان عليك الأمان.. كل البلاد محتاجة لك اظهر يا  
مولاي.. حكمت البلاد ٣ شهور والناس بتدور عليك  
وتدور.. سلطان تايه يا ولاد الحلال..
- (تختفى الستار السكوندو ويظهر منزل عبد المطيع  
وشجرة على يساره وباب داره وشباك وجواره

على اليسار منزل عبد السميع وشباك داره  
وشجرة)

(ظهور مجموعة أطفال تتشاجر)

- قلّة : لأ.. الفص دا بتاعى أنا  
بلية : باقول لك هات يا ولد  
قلّة : باقول لك سيب الفص بتاعى  
بلية : دول تسع فصوص والبرتقاله فيها عشرة  
قلّة : لو ما عطنتيش الفص بتاعى دلوقت أكسر دماغك..  
بلية : ماتقدرش تكسر دماغى ولا تعمل لى حاجة..  
قلّة : طيب خد.. طيب خد (يضربه)..  
بلية : آه يامه.. يامه إلحقينى الواد قلّة ضربنى..  
أم بثينة : (تدخل) يخرب بيوتكم.. كفاية عراك.. كفاية  
دوشة.. قولوا لى الرز فين اللى أنا شايله.. عايزة  
أطفحكم مش لاقية رز..  
قلّة : يامه الواد ده خطف منى الفص بتاعى.  
أم بثينة : فص إيه؟  
قلّة : فص البرتقال.  
أم بثينة : برتقال.. فى بيتنا برتقال.. يا مصيبتى.. يا لهوى يا  
خرابى.. منين..  
قلّة : أيوه يامه.. فى بيتنا برتقال..  
أم بثينة : فين البرتقال ده.. ومين اللى جابه ودخل هنا إزاي؟

- قطة : دا أبويا اللي جابه..
- بلية : كداب.. دى جارتنا فاطمة..
- أم بثينة : فاطمة ولا أبوك؟.. اكلم انطق.. قول.. فاطمة ولا أبوك... انطق يا واد.
- قطة : بصراحة يامه أبويا قال لنا خدوا البرتقالة دى ووزعوها عليكم.. كل واحد أخذ فص.. وقال لنا لو أمكم سألتكم ماتقولولهاش إن فاطمة هى اللي إديتها له من شوية.. لما كانوا قاعدين مع بعض جنب الساقية.. وهى تقوله هى هى و أبويا يقول لها.. ها ها .
- أم بثينة : فاطمة يا لهوى.. يا مصيبتى.. يا ناس إلحقونى (تصيح)
- بثينة : (تخرج) فيه إيه يامه.. حد اتعور من العيال ولا حاجة؟
- أم بثينة : لأ.. ياريت حد اتعور.. !
- بثينة : حد مات..؟
- أم بثينة : يا ريت حد مات أكثر أكثر دى مصيبة أكبر..
- بثينة : إيه يامه فيه إيه خضتيني..
- أم بثينة : تعالى شوفى أبوكى.. أبوكى وعمايله..
- بثينة : تانى يامه.. أبويا وعمايله.. عمل إيه تانى.
- أم بثينة : جاب برتقالة وعطاها للعيال..

- بثينة : كل واحد برتقاله طب أنا ماخدتش..
- أم بثينة : كل واحد فص.. فص برتقاله ياختى..
- بثينة : طب فين الفص بتاعى..
- بليه : فى فص اهوه شايلهوك (يخرجه من جيب السروال)
- بثينة : (تخطفه) هات يا واد<sup>٤</sup> (تأكله).. وفيها إيه يامه لما أبويا جايب برتقاله..
- أم بثينة : بيقول للعيال ما تقولوش ان خالتكم فاطمه اللي جيبها.. تبقى هى اللي مد هاله وعازب يخلى العيال تحب فاطمه وتكرهنى..
- دوقرم : يامه أنا جعان جعان يامه (الأولاد) جعائين.. جعائين..
- أم بثينة : مش لاقية الرز.. كنت شيلاه فى جراب الساقية شفتيه يا بثينة؟
- بثينة : رز إيه يامه اللي بتدورى عليه ما شفتهوش..
- أم بثينة : الرز شفتى عمائل أبوكى مش عارفه اطفح العيال وهو يجيب لهم برتقال ويقولهم من عند فاطمه..
- بثينة : يامه ما تصدقش العيال..
- أم بثينة : أمال اصدق مين.. يا فاطمه يا فاطمه (تنادى)
- عبد السميع : (يفتح الباب) عايزه إيه يا وليه؟
- أم بثينة : عايزه إيه يا وليه..؟ لم لحملك يا عبد السميع عن

- جوزى .
- عبد السميع : يا فتاح يا عليم على الصبح.. اصطبحنا على قلة الأدب..
- أم بثينة : يامه خلاص..
- أم بثينة : بنتك عطت برتقالة لجوزى..
- عبد السميع : بنتى أنا عطت برتقالة لجوزك (يتذكر) آه البرتقالة لأ دول برتقالتين أنا سايبهم ثلاثة بالليل اصحى ألقاهم واحدة.. هات يا ولية البرتقالتين..
- أم بثينة : آه يا فاطمة.. إن ما وريتك..
- عبد السميع : ناقص برتقالتين أنا شارى أربع برتقالات أكلت واحدة وسببت ثلاثة صبحت لاقيتهم واحدة.. يبقى عيل من عيالك نط من فوق سطح الدار وسرق البرتقال.. لمى عيالك الحرامية يا أم بثينة..
- أم بثينة : اخرس يا راجل يا طويل اللسان (تأخذ بثينة أمها جانباً)
- بثينة : يامه يمكن الواد بلية نط من على السطح..
- أم بثينة : واد يا بلية.. أنت نطيت على السطح..؟
- بثينة : لا والله يامه.. أبويا اللى عطاها لى..
- عبد السميع : يسبقى أبوك اللى نط على السطح.. مش قاصد البرتقال قاصد اللى عندهم البرتقال..
- بثينة : يا عم بلاش الكلام دا... أبويا أنا مايعملش كده..



- عبد السميع : لأ... يعمل.. جوزك يعمل يا نفيسة أى حاجة فى الدنيا.. أنا عارفه وعاجنه وخبزه...
- أم بثينة : باقول لك إيه... بلاش طولة لسان..
- عبد السميع : اسبلى أى واحد عن جوزك وهو حيقول لك.. فى حد فى الدنيا يكلم الحمار ويقعد يتساير معاه بالساعات..
- أم بثينة : (لبثينة) شفتى الناس بتقول على أبوكى بيقد يكلم الحمار..
- بثينة : يامه... الحمار كاتم الأسرار.
- عبد السميع : وبعدين عيب عليكم تنظم على السطح وتاخدم البرتقال..
- أم بثينة : اخرس يا راجل يا تعبان.. إحنا لا بنط على سور ولا نعرفش إلا الأبواب واسأل بنتك جايز عطيت الراجل البرتقال سكيتى وانت نايم.. ياللى نايم على ودانك..
- بثينة : يامه بتقولى إيه بس..
- أم بثينة : ما أنت عارفة أبوكى لما يسمع صوت فاطمة... ببسفسخ وتجيله دوخه ويتحنج..
- عبد السميع : اخرسى يا وليه.. بنتى من أشرف البنات..
- أم بثينة : يا خويا اتنيل واسكت.. دا انت نايم على ودانك..
- فاطمة : (تخرج فاطمة) فيه إيه يا خالتي؟

- أم بئينة : خالتك دى إيه مش عارفة فيه إيه.. فيه برتقال بيتوزع.. وكلام.. وحاجات من تحت لتحت وأبوكى نايم على وداته...!!؟؟
- فاطمة : بئينة سكتى أمك أنا مش هأكلها علشان خاطرك..
- بئينة : يامه عيب كده..
- أم بئينة : عيب كده إيه.. قوليلها هى اللى عيب كده.. خطافة الرجالة بالبرتقال.. تدى الرجل برتقالة يطب فيها..
- عبد السميع : ادخلى جوه يا فاطمة أحسن أنا حلمت انى دست على خنفسه امبارح وعورت رجلى..
- أم بئينة : أنا خنفسه يا راجل محسوب على الرجالة غلط.. طب ما أنا كمان حلمت ببرص ماشى على الحيطه وضربته بالشبشب..
- عبد السميع : أنا برص يا وليه يا قرشاته..
- فاطمة : يابيه ادخل الدار.. ادخل الدار أحسن مش هتخلص النهارده (أغنية رسنا تيف) (تقول كلماتها بما معناها)
- أم بئينة : هذا الجار اسوأ جار..
- عبد السميع : نجنا يا منجى عبادك الاخير..
- فاطمة : حقك على يا بئينة انا أحسن جيران..
- بئينة : لا.. بل انا أحسن جيران..
- الاطفال : جوعاتين نرغب فى أكل الطعام .
- (الجو استعراضى.. غنائى.. مشدود الإيقاع..)

كوميدي.. في آخر جملة له جعائين جعائين)

الراوي

:

على صوت المنادى ينادى في البلاد اختفى السلطان  
العادل طومان باي معقول هذا الكلام اختفى  
السلطان ودلونا يا خلائق منين نجيب السلطان...؟؟  
في خمس سنين حكم مصر خمس سلاطين آخرهم  
كان السلطان العادل طومان باي الذي قعد ٣ شهور  
اجتمع الكبار والاعيان والامراء والمماليك فلان  
وفلان وعلان ومن ضمنهم امير غلبان اسمه  
قنصوة الغوري فاختروه سلطان البلاد الراجل ما  
صدقش نفسه عمره ستين سنه وملوش ولا شعرة  
بيضه في دقته ولا يعرف صبغة ولا كوافير الراجل  
ما صدقش قعد يبكي ويقول لا أنا مش عايز أبقي  
سلطان.. كل الأمراء المجتمعين معاه قالوا له لا دا  
قدرك انك تبقى سلطان البلاد وأصبح هذا الأمير  
المسكين في ليلة وضحاها السلطان قنصوة الغوري  
واتفرج يا سلام على قنصوة الغوري السلطان  
سلطان البلاد والفلاح الغلبان عبد المطيع سلطان  
زمانه.. سلطان تايه يا ولاد الحلال..

عبد المطيع

:

(يدخل عبد المطيع يجر حمار) يا فتاح يا عليم يا  
رزاق يا كريم يا عالم بحالي وغنى عن سؤالي  
يومين البلد هايصه وزابطه والناس خايفة بيدوروا

على السلطان المخطوف العادل. طومان باى سلطان  
تايه يا ولاد الحلال.. مش كفايه مافيش شغل  
والسوق مقفول (الحمار ينهق) انت كمان زعلان  
منى يا صاحبي.. (الحمار ينهق) انت تعرف فين  
السلطان المخطوف (ينهق الحمار).. مش عارف  
ولا أنا أعرف.. أهم عينوا سلطان جديد اسمه  
قنصوة الغورى مبسوط بتقول إيه؟ لا.. يا راجل  
قول كلام غير ده.. معقول (الحمار ينهق) (ينظر  
إلى منزل عبد السميع) معقول.. لا.. انت حمار فى  
دى عبد السميع ما يعملش كده.. ده جبان (الحمار  
ينهق) تمام.. تمام لا عبد السميع ما يخطفش  
السلطان انت فى دى غلطان.. فى دى طلعت حمار.  
أم بثينة : (تظهر) الراجل اتجنن بيكلم الحمار..  
عبد المطيع : والله انت بتفهم كويس أحسن من رئيس العسكر  
والعسس..  
أم بثينة : يا لهوى لو سمعوك الممالك كاتوا دبحوك  
واستريححت منك..  
عبد المطيع : وعندك قلب طيب (ما زال يحدث الحمار) أحسن من  
قلب نفيسة مراتى طويلة اللسان..  
أم بثينة : (على حدة) اخرس قطع لسانك.. وبتشبه الحمار بى  
يا أبو عقل خرفان يومين وانت قاعد تتكلم وكسلان

عبد المطيع : (لا يلتفت إليها ويصر على أنه لا يسمعها) يا  
حمارى انت حمار وأنا حاقول لك على سر الأسرار  
أنا بحب مراتى أم بثينة جدا..

أم بثينة : عبد المطيع. باقول لك إيه ما تعملهمش علي.. أنا  
عاجنك وخيزاك يا كسلان يا عدمان يا صدمان يا  
بتاع فاطمه بنت الجيران اللي بتطفحك البرتقال يا  
مخلدع. (تجرى ويجرى أمامها) (تصطدم بزقج  
ابنتها الكاشف)

الكاشف : فيه إيه جرى إيه.. جرى إيه يا عمى.. جرى إيه يا  
حماتى.

أم بثينة : اسأله جرى إيه نايم فى العسل وما بيشفوش أكل  
العيال.  
(عبد المطيع يخبئ وراء الكاشف)

عبد المطيع : (هامساً) يا ابنى باين الوليه جاعت.. عليزة تاكل  
دراعى (بصوت مرتفع) اسألها يا ابنى يا حبيبى يا  
خطيب بنتى..

الكاشف : فيه إيه يا أم بثينة..

أم بثينة : عمك عبد المطيع الكسلان العطلان التعبان..

العدمان الصدمان.. راقد قدام البيت بقاله يومين لا  
شغله ولا مشغله ناكل منين؟ نشرب منين؟ نصرف  
منين؟

الكاشف : ما هى كل أهل المحروسه عاطله عن العمل..  
السوق نايم والممالك نهبوا كل حاجه..  
أم بثينة : يا مصيبتك يا خيبتك يا أم بثينة.. حتى عريس بنتك  
طالع زى أبوكى خايب وتايب وبیدافع عن حماه  
عمال على بطلال.. ويكذب كمان علشان يخبي  
عليه..

الكاشف : أنا كذاب.. الله يسامحك يا أم بثينة..  
أم بثينة : كذاب ومنافق كمان يا كاشف يا بن زينات..  
الكاشف : أنا يا أم بثينة كذاب ومنافق..  
أم بثينة : أيوه انت يا بتاع المناديل بأوية يا منيل..  
الكاشف : الله يسامحك وعلى أى حال أنا مش جاي البيت ده  
تاتى مادام أنا باتشتم هنا.. يبقى مالبش لازمة اجى  
هنا..

عبد المطيع : يا بنى حقلك على هات راسك أبوسها.. معش  
عاجبك اللى عملته فى خطيب بنتك يا وليه حرام  
عليكى.. دا شاب كويس قوى..  
أم بثينة : كويس قوى علشان عمال يدافع عنك عمال على  
بطلال.. اللى ما شغنا منه حاجه.. ولا بيدخل على

الكاشف : أنا مش مقصر يا حماتى الممالك نازلين تفتيش من  
باب لباب.. ومن دكان لدكان.. ووقفوا حال الدنيا  
بيدوروا على السلطان المخطوف.. والسلطان  
الجديد ما بيجيلوش نوم.. وصاحى ليل نهار  
ومستنى يعرف السلطان اللي قبل منه.. لسه حى..  
والا مات والسوق والناس متعطلين.. لا أنا ولا عم  
عبد المطيع مقصرين فى حاجة يا حماتى..

أم بثينة : اتنيل وانت خايب زيه..

الكاشف : خلاص أنا ماشى ومش داخل البيت ده تانى..

عبد المطيع : تعالى يا بنى اخزى الشيطان.. كده تزعل على خطيب  
بنتك تشتميه وتقوليله اتنيل.. حتضيعى الراجل  
خطيب البنات بالشكل دا.. هو حد لاقى حد يجوز  
بنته اليومين دول.. بوسى راسه ولمى الدور  
اعلمى معروف البنات بتحبه وروحها فيه (يذهب  
اليها عبد المطيع ويمسك راس الكاشف حتى يقتنع  
أم بثينة أن تقبل رأسه)

أم بثينة : غور انت وهو..

عبد المطيع : إلهى يا رب ما بستيش راسه تجيلك سكتة قلبيه  
يا نفيسة بنتك بتحبه..

أم بثينة : ما هى البنات خايبه زيك وزيه.. يا فالج..

الكاشف : خلاص يا عمى أنا ح امشى..  
عبد المطيع : لأ تمشى فين.. (لنفسه) ياللا روحى اتاسفى له  
وخلصينى..  
أم بثينة : لأ.. مش متأسفة.. أنا ماشية وساييه لكم الدنيا  
(تخرج)  
عبد المطيع : (يذهب للكاشف) خلاص بقى مادام هى مش عايزة  
تبوس راسك روح انت بوس راسها..  
الكاشف : يا عمى دى اهانتنى.. أنا اللي أبوس راسها؟  
عبد المطيع : هى كده.. دايمًا نكديه.. المهم ان بثينة بتحبك وانت  
بتحبها لما تتجوز ما تدخلهاش بيتكم ولو دخلت بلغ  
عنها العسكر ولبسها حله وقول إنها حراميه.. واللا  
قول إنها خطفت السلطان ونصيحى ليك شوف بيت  
بعيد عن حماك فى امبابه.. علشان ما تجيلكش ولا  
تتعب دماغك..  
الكاشف : يا عمى أنا اتشتمت.. وانت ساكت..  
عبد المطيع : أنا ساكت أنا ما سكتش أنا أسكت.. دى معقوله؟!  
الكاشف : آمال عملت إيه يا عمى..  
عبد المطيع : أنا دعيت عليها.. قلت خدّها يا رب واقصف عمرها  
بقى.. بقالى اربعين سنة باتوسل إليك .. إلهى وانت  
جاهى يا قادر يا كريم تموتى الضهر قبل العصر يا  
نفسه يا بنت حندوقه وتموتى العصر قبل المغرب



وتموتى المغرب قبل العشا.. وتموتى العشا قبل  
الفجر..

- الكاشف : ربنا يسهل بقى ونتجوز أنا وبثينه..
- عبد المطيع : المهم اخبار الشغل إيه.. طمنى عنك.. لقيت بيت..  
حوشت كام دينار تشتري بيهم حاجات لزوم  
الجواز..
- الكاشف : البضاعة نايمه فى السوق زى ما انت شايف..  
ومش عارف أدبر حالى يا عم عبد المطيع.. أعمل  
إيه..؟
- عبد المطيع : والحل.. لازم يكون فيه حل..
- الكاشف : دا عصر الممالك يا عمى.. كل مملوك له أرض..  
يملك الأرض واللى عليها من الناس والبيوت.
- عبد المطيع : ومين اللى جاب الممالك لنا؟
- الكاشف : السلاطين..
- عبد المطيع : ومين جاب السلاطين يحكمونا؟
- الكاشف : لحد هنا وأنا ما أعرفش... إحنا اتخلقنا لقينا  
السلاطين.. ولقينا الممالك..
- عبد المطيع : أنا ح أسأل اللى بيْفهم أحسن منى ومنك (يتجه  
للحمار يحدثه) (للحمار) يا حمار قول لى مين اللى  
جاب السلاطين لينا قول يا حمارى؟ (ينهق الحمار  
بيقول إيه يا عمى.. فهمنى..)
- الكاشف :

- عبد المطيع : بيقول كلام كبير قوى.. شوف الحمار فاهم حاجات  
أنا وانت مش فاهمناها..
- الكاشف : طيب استاذن أنا بقى يا عمى.. اروح ألقب عيشى  
فى السوق يمكن ألقى شغلته كده ولا كده بدل من  
شغلانة المناديل بأويه اللي واقعة دى..
- عبد المطيع : يا كاشف شغلتك غلبانة قوى.. بيع مناديل بأويه  
يا عم أقعد اشرب معايا شوية شاي كلمنى واكلمك..  
قولى كلامى صح ولا غلط.
- الكاشف : معشش يا عمى.. الرزق يحب الخفية.. والواحد  
محتاج لقرشين زى ما انت قولت.. بس أنا أعمل  
إيه.. عن إذلك أنا ماشى.. سلاموا عليكم..
- عبد المطيع : وعليك السلام ورحمة الله وبركاته..  
(يخرج الكاشف.. يظل عبد المطيع على المسرح  
بمفرده)  
(ينظر إلى أم بئينة يطمئن على عدم وجودها وعدم  
وجود الأولاد يدق شبك فاطمه)
- عبد المطيع : يا فاطمه.. فاطمه..
- فاطمة : (من الداخل) مين..؟
- عبد المطيع : أنا عبد المطيع..
- فاطمة : مين.. مين مين؟
- عبد المطيع : عبد المطيع.. طيع طيع طيع..

فاطمة : عايز حاجة يا عم عبد المطيع..  
عبد المطيع : عم إيه وغم إيه.. مالك يا فاطمة؟  
فاطمة : (تخرج من الباب).. نعم فيه حاجة؟  
عبد المطيع : مالك يا فاطمة.. انت زعلته متي..؟  
فاطمة : وح ازعل منك ليه.. كنت أبويا والا اخويا والا  
قريبى والا خطيبى أنا طلعت بس عشان أقول لك  
صباح الخير..  
عبد المطيع : صباح السعد.. صباح الخير.. صباح الحب يا فاطمة.  
فاطمة : إيه الكلام دا يا عم عبد المطيع..  
عبد المطيع : عم إيه وغم إيه.. أنا عبد المطيع يا فاطمة.. يا  
طماطم..  
فاطمة : سى عبده بلاش كده..  
عبد المطيع : حلوة قوى يا سى عبده.. دى.. أبوه يا فاطمة..  
انتى عارفة أنا باحبك قد إيه؟ باموت فىكى قد  
إيه..؟  
فاطمة : وطى حبك أحسن مراتك تسمع يا سى عبده..  
عبد المطيع : تسمع.. سمعت الرعد فى وداتها.. ما هى سمعت  
وعرفت.. ونفسى أعرف أبوكى رفض جوازنا  
ليه... أنا باكره أبوكى وبألغنه فى سرى ليل  
ونهار.. بسادعى عليه واتمنى موته قبل الضهر..  
والضهر قبل العصر والعصر قبل المغرب والمغرب

- قبل صلاة العشا وبعدها اللهم خذ عمره آمين..
- فاطمة : اخص عليك يا سى عبده.. ده برضه أبويا..
- عبد المطيع : ما أنا عايزه أبويا أنا كمان.. وهو مش راضى..
- فاطمة : بيقول انت قدّه فى العمر وصاحبه..
- عبد المطيع : ده كذاب.. أبوكى اكبر منى بخمس شهور.. يعنى ١٥٠ يوم واكبر منك بيوم يعرف عنك بسنه يبقى أبوكى شوفى اكبر منى ١٥٠ سنه يبقى أنا بالنسبة له عيل.. وبعدين الراجل مش بسنه ولا بعمره الراجل بقتله أنا حامى.. أنا نار.. أنا ولعه (يكح)..
- (يقع تسنده فاطمه.. يسعد بلمسة يدها الحنون)
- فاطمة : دمك خفيف قوى يا سى عبده..
- عبد المطيع : ياه.. اتتى الوحيدده اللى بتقولى الكلام الحلو دا..
- خدى.. أنا جيت لك شويه رز خبيتهم من أم بثينة..
- فاطمة : انت طيب قوى.. وحنين قوى..
- عبد المطيع : الله.. الله.. على الكلام الحلو..
- فاطمة : آه يا سى عبد المطيع لو اتجوزنا من خمس سنين..
- عبد المطيع : آه.. كان رينا فتح لى باب السعد.. باب الجنة (صوت خشن يسعل)
- فاطمة : أبويا باين عليه صحى..
- عبد المطيع : يصحى ليه..؟؟ مش كان نايم.. نوم الظالم عباده..

- فاطمة : خد يا سى عبده (تعطيه صره)..  
 عبد المطيع : إيه دا؟..  
 فاطمة : دول شوية عتب جولى من مرسى..  
 عبد المطيع : يقطع مرسى وسنين مرسى..  
 فاطمة : انت بتغير عليا يا سى عبده؟..  
 عبد المطيع : الا باغير عليكى.. باغير من الهوا لو يمر جنبك..  
 فاطمة : عارفة يا عم عبد المطيع..  
 عبد المطيع : ليه پس تزعلينى وتتكدى عيشتى.. بلاش عم دى..  
 فاطمة : خلاص.. بلاش عم.. ولا تزعل يا سى عبد المطيع..  
 عبد المطيع : يا سلام يا فاطمه لو الحظ يدينى.. كنت أخطفك وأتجوزك وأسافر الشام.. والا لو يظهر خاتم سليمان ويطلع لى يقول لى شبيك لبيك تطلب إيه..  
 اقول له اطلب فاطمه.. ويحين طماطم.. ويحين طماطيمو..  
 عبد السميع : (والد فاطمه.. من الداخل ينادى) يا فاطمه.. يا فاطمه..  
 فاطمة : أيوه جايه يا ايه.. بلا يا سى عبده.. امشى.. بسرعه أحسن لو شافك معايا.. حتبقى حكاية..

- عبد المطيع : أنا رايح السوق اشوف إيه الأخبار وأرجع اشوفك  
يا فاطمة.. سلاموا عليكم.. (يخرج عبد المطيع.. ثم  
يعود) مش عايزه حاجه يا فاطمة..
- فاطمة : عايزه سلامتك يا سى عبده.. بلا بقى.. امشى..
- عبد المطيع : حاضر.. يا رب اوعدنى (يخرج) ربنا ياخذك يا أبو  
فاطمة انت ونفيسة فى يوم واحد واستريح منكم  
واتجوز فاطمة (يختفى)
- عبد السميع : (يدخل) هو فين عبد المطيع... سامع صوته  
بيتمشى.. أنا سامعه طويل اللسان..
- فاطمة : عبد المطيع مين؟ يا ايه اتهايلك.. دا أنا قاعده باكلم  
نفسى واتمنى..
- أم بثرينة : (تدخل) هو فين عبد المطيع...؟؟ سامعه صوته..  
الله هو انت هنا يا بدر البدور..
- فاطمة : بلا يا ايه نخش جوه أحسن الدنيا ساقعة والجو  
بارد.. بارد قوى..
- أم بثرينة : سامع كلام بنتك يا عبد السميع..
- فاطمة : اسمعى يا نفيسة بطللى طولة لسان فى كل زمان  
ومكان..
- أم بثرينة : نفيسة.. بتتطلى اسمى كده حاف يا طويلة اللسان..  
دى تربيتك يا عبد السميع..
- عبد السميع : اسمعى يا فاطمة عيب كده احترمى خالتك أم بثرينة..

- أم بئينة : اسمع يا عبد السميع.. ابعد بنتك عن جوزى..  
فاطمة : يا وليه انتى بطللى طولة لسان..  
عبد السميع : اخلى يا فاطمه الدار عيب كده... أنا اللي غلطان انا  
سكنت فى آخر الجيزة مع عبد المطيع و الدار جنب  
الدار.. الرجل دا لسانه طويل لكن مراقه ست طيبه..  
أم بئينة : يا مقصوفة الرقية.. باللى مش متريبه..  
فاطمة : (صارخه) يلا يا ابيه ندخل أحسن إحنا مش  
حنخلص من لسانها وشها النحس..  
عبد السميع : عيب يا فاطمه..  
أم بئينة : أنا وشى نحس يا فاطمه يا بنت هنادى..  
عبد السميع : الله يرحمها.. كانت دايما تقول عليكى أحسن جاره  
وأحسن أخت..  
أم بئينة : يا خطافة الرجالة..  
فاطمة : الرجل بيطفش من عمايك يا أم بئينة..  
أم بئينة : الرجال راجلى ونائم فى حضنى ووسط عياله..  
مالك انتى ومالنا..  
عبد السميع : يا فتاح يا عليم يا رزاق يا كريم.. يا جماعة اهدوا..  
فاطمة : ست مزعجه..  
أم بئينة : أنا ست مزعجه يا عبد السميع!؟  
عبد السميع : يا فاطمه.. الست أم بئينة جارتنا وصاحبة أمك الله  
يرحمها..

- أم بثرنة : المسكينة ألف رحمه تنزل عليها.. كانت راجل  
بصحيح ممشيه البيت ..
- عبد السميع : كانت راجل ما تتخيرشى عنك.. لكن عيبها إنها  
كرهتنى فى خلف العيال.. كانت راجل زيك كده بس  
اتنى حاجة تاتيه.. راجل إيه.. إنما ست..
- أم بثرنة : لا.. دى كانت ممشيه البيت عدل.. ومن يوم ما  
ماتت والبنيت دارت على حل شعرها..
- فاطمة : اخرسى يا وليه.. اتنى أنا اللى دايره على حل  
شعرى..
- أم بثرنة : لا.. أنا.. مش شايفها يا عبد السميع لافى على  
الراجل إزاي..
- فاطمة : لو أنا لايغه عليه كنت اتجوزته غصب عنك وخلفت  
منه عشر عيال كل بطن اتنين اتنين..
- أم بثرنة : اطلعى يا هنادى من تربتك وشوفى بنتك فاطمه  
عايزه تخطف راجل قد أبوها وتخلف اتنين..  
اتنين.. اتنين..
- عبد السميع : يلا يا بنت بلاش قلة أدب.. ادخلى الدار.. فتك  
بعافية يا أم بثرنة..
- أم بثرنة : فوتى ادخلى الدار(مقلده) قال يعنى البنيت خافت..  
(تدخل فاطمه وعبد السميع)  
(إفلام)



## المشهد الثانى

(يفتح الستار على استعراض السوق)

يشتمل على احتكار التجار - ضياع الفقراء - عدم وجود تسمير وطنى.. يفتح المشهد على سوق المدينة وأغنية عن الكساد والحالة .. دكان مرسى وأبو مرسى للحراير والاقمشة.. ويلاحظ أن كل قماش.. عليه سعر دينار ونص دينار و ٣ دينار)

- زينات : يا أبو مرسى..
- أبو مرسى : أيوه يا ست زينات..
- زينات : والنسبى يا خويا عايزيه عشرين متر دبلان و ٣٠ متر حرير..
- أبو مرسى : الدبلان بدينار ونص المتر..
- زينات : هو فيه إيه.. كلكم عمالين بتقولوا المتر بدينار ونص.. يا ناس حرام عليكم.. الفقير ما يلبسش فى البلد دى..
- مرسى : فى إيه.. (ينهار)
- زينات : يا مرسى.. إلهى ربنا ما يرقد لك جته.. ادينى عشرين متر بفته.. و ٣٠ متر حرير للبت عايزة أنجد لها للجواز.

- مرسى : لا يا زينات.. القماش الحرير غالى عليك وعلى  
بنتك.. هوبنا بقى أحسن بطنى واجعالتى ومش فايق  
لك..
- زينات : طيب أدبنى بفتة للتجيد..
- مرسى : البفتة بدينار ونص المتر وانت عابزه عشرين..
- زينات : معايا خمستاشر دينار..
- مرسى : ما بنفعلش تشتري بيهم لا بفتة ولا حرير.. اتفضلنى  
ورينى عرض اكتافك.. هى العروسه لازم تنام على  
مراتب.. اشترى ليهم حصير على قد فلوسك.. آه يا  
بطنى (يخرج)
- زينات : ينوبك ثواب يا سى مرسى..
- أبو مرسى : ما قال لك ورينا عرض اكتافك..
- زينات : ربنا على القوى والمفتري..
- شرطى ١ : (فى الجانب) البطاطس دى وحشه..
- عبد المطيع : مين اللى قال إنها وحشه.. البطاطس حلوه وزى  
الفل..
- شرطى ١ : وانت مالك..
- البائع : والله البطاطس كويسه..
- عبد المطيع : ما هو قال لك البطاطس كويسه يا اخى..
- الشرطى : (لعبد المطيع) وانت مالك؟!
- البائع : مالكنشى دعوة بي.. يا عبد المطيع روح انت شوف

مصلحتك..

- عبد المطيع : أنا رايح.. السلام عليكم يا أهل السوق الطيبين..  
أبو مرسى : عبد المطيع.. يا عبد المطيع..  
عبد المطيع : نعم يا أبو مرسى..  
أبو مرسى : ما حدش شافك يعنى من زمان..  
عبد المطيع : مشاغل.. يا أبو مرسى.. إزيك وإزى مرسى وإزى  
إخوات مرسى.. البنين والبنات.. الأحياء منهم و  
الأموات.  
أبو مرسى : الحمد لله.. بقول لك إيه.. ماتلفش ولا تدور فى  
الكلام.. هات اللي عليك..  
عبد المطيع : على إيه..  
أبو مرسى : الفلوس اللي عليك.. بتاعة حنة القماش اللي  
أخذتها من سنه..  
عبد المطيع : أنا قلت لكم من الأول مامعيش فلوس.. فلتوا لى  
خدها وبالتقسيم اللي معاك ادفعه واى وقت ادفع..  
أبو مرسى : يا سلام يا اخويا.. وانت صدقت.. أى وقت تدفع  
ليه.. هو إحنا فاتحينها سبيل والا فاتحينها سبيل يا  
اخ عبد المطيع مادام ما انتش قد اللبس ما تلبسش  
سامع والا لأ..  
عبد المطيع : أنا حادىكم الفلوس بعد محصول الفول..  
أبو مرسى : ما هو جه محصول الفول وبعته..

عبد المطيع : مش محصول السنه دى..  
أبو مرسى : انت ماقلتش السنه الجايه..  
عبد المطيع : ولا قلت محصول السنه دى.. السنه دى السنه  
الجايه.. اللى بعدها.. أنا ماقلتش امتى..  
مرسى : (يدخل مرسى) دفعت اللى عليك والا لسه.. خلصنا  
مش ناقصين وجع دماغ..  
عبد المطيع : يا اخ مرسى ارجوك افهمنى كويس.. أنا راجل على  
باب الله فاصبر ان الصبر جميل..  
عبد السميع : (يظهر عبد السميع وهو يحمل دجاجة) صباح  
الخير..  
مرسى : صباح النور أهلا... أهلا يا أبو فاطمه اتفضل..  
عبد المطيع : إيه دا يا عبد السميع؟!  
عبد السميع : دجاج... فراخ..  
عبد المطيع : بتاكل دجاج وتشترى دجاج يا أبو فاطمه؟!  
عبد السميع : أيوه أنا حر أكل دجاج..  
مرسى : اتفضل.. اتفضل.. (يعطيه مقعدا) استريح يا عمي..  
يا أهلا وسهلا هلت الأنوار..  
عبد السميع : شكرا يا مرسى يا ابني.. طول عمرك ذوق (يجلس).  
أبو مرسى : عندنا حنة قماش.. إنما إيه تستهلك يا أبو فاطمه..  
مرسى : أبو فاطمه ده عزيز علينا قوى يا سلام عليه وعلى  
بنته فاطمه.. بنتك إيه من الآيات..

- عبد السميع : الحمد لله ان الناس كلها عارقه بنتى إيه.. وسعتها  
زى البافته..
- عبد المطيع : إيه مالك يا مرسى انت ومال فاطمه..
- مرسى : وانت مالك انت.. انت.. انت مالك... أما شئ بايخ  
صحيح.. أنا كنت إيه النهارده؟ بطنى بتوجعنى..
- عبد المطيع : بقى أنا مبالى.. مبالى ونص يا مرسى.. فاطمه  
جارتى والجار أولى بالشفعة..
- مرسى : يا سلام.. يا سلام.. يعنى إيه الكلام دا ؟ تقصد إيه  
بيه.. بطنى بتوجعنى النهارده... مش عارف إيه..
- عبد السميع : آه صحيح يعنى إيه الكلام دا يا عبد المطيع؟  
(يدخل رجال الشرطة والعسس)
- رئيس  
العسس : كله يقف صف.. كله يقف عدل.. بامر المحتسب  
الجديد الزينى بركات.. تدفع الضرائب ٣ شهور مقدم  
وتفتيش السوق وكل دار وكمان الزوار.. فى  
السوق كله يقف طأبور..
- عبد السميع : الزينى بركات.. ربنا بخله لنا.. إحنا مستعدين  
للتفتيش ودفع الضرائب.. أى حاجه إحنا فى خدمة  
السلطان ورجالته..
- رئيس العسس : تعالى انت وهو..
- عبد المطيع : بتدوروا على إيه قولوا لى..
- رئيس العسس : بتدور على حاجه مهمه .

(يمسكون عبد المطيع و عبد السميع)

- عبد السميع : فتشوني.. فتشوني..  
رئيس العسس : إيه دول..  
(يفتش يجد الدجاجتين)  
عبد السميع : فراخ.. فيه إيه..  
عبد المطيع : أنا قلت له ماتاكلشي فراخ... نصحته ميت مره..  
رئيس العسس : بتاكل فراخ كمان... خد يا عسكري.. (ياخذ الدجاج)  
عبد السميع : إيه دول.. اخدوهم ليه؟  
عبد المطيع : اسأله جاب فلوس الفراخ منين..؟؟  
رئيس العسس : بتاكل فراخ.. جيت الفلوس منين صحيح..؟؟  
عبد السميع : أقوله إيه..  
عبد المطيع : رد عليه.. جيت الفلوس منين؟  
مرسى : أنا ادبتله فلوس  
(يحاول مرسى ان ينفذ الموقف)  
عبد المطيع : مرسى بيديله فلوس.. ليه؟ علشان إيه..؟؟  
رئيس العسس : أيوه علشان إيه..  
مرسى : علشان.. علشان.. أخطب بنته.. آه بطني  
بتوجعني.. مش عارف ليه..  
عبد المطيع : اخرس قطع لساتك.. بنته مخطوفه.. قصدي  
مخطوبه.. يا حضرة رئيس العسس البنت فاطمه  
مخطوبه.. دا كذاب..

- أبو مرسى : مخطوبة لمين ان شاء الله يا عبد المطيع..؟؟
- عبد المطيع : قول لهم يا عبد السميع.. قول لهم انك خطيبها لى  
مش كده.. مش أنا طلبتها منك من خمس سنين..
- رئيس العسس : إحنا مش جايين هنا فى خطوبه.. تعالى اتفتش انت  
(لعبد المطيع) كمان..
- عبد المطيع : ما معيش دجاج.. ما معيش دجاج.. ما معيش  
فراخ.. هى الفراخ ممنوعه والا إيه الأيام دى..
- رئيس العسس : يمكن معاك حاجه كده والا كده..
- عبد المطيع : حاجة إيه.. ح اكون مخبى السلطان فى جيبى والا  
فى النعال.. والا فى بقى والا فى ودانى..  
(يفتش رجال الشرطه عبد المطيع بقوة)
- رئيس العسس : إحنا بنبحث عن أى دليل..
- عبد المطيع : يا ناس حرام عليكم حرام عليكم تبهدلونى..
- رئيس العسس : حتفتش يعنى حتفتش..
- عبد المطيع : اتفتش ليه.. فتشونى أنا أهه.. بس كمان أنا ح  
افتشك.. مافيش حد أحسن من حد أنا ما معيش  
حاجه.. وما أعرفش حاجه.. أنا يوم ما اتولدت  
سمونى عبد المطيع مع إن أبويا اسمه عبد المطيع  
وجدى اسمه عبد المطيع..
- عبد السميع : قطيعه تقطع العيله كلها..
- عبد المطيع : عيلة عبد المطيع طول عمرها خيرها على عيلة

عبد السميع.. بس الزمن..

حمد : (يدخل) فيه إيه يا جماعة.. فيه إيه..؟؟

عبد المطيع : ولا حاجة.. اتفتش لو كان معاك فراخ والا حيكون  
يومك منول بستين نيله..

حمد : يا ناس أنا ما معيش حاجة..

عبد المطيع : اثبت واقطع هدومك..

حمد : اقطع هدومي ليه..؟

عبد المطيع : انت مش مخبي حاجة كده والا كده..

رئيس العسس : أنا شفتك قبل كده..

حمد : شفتني فين..؟

رئيس العسس : انت.. انت.. من الجماعة إياهم..

حمد : أيوه.. جماعة لا اله الا الله..

رئيس العسس : آه.. من الجماعة إياهم اللي تعبونا..

حمد : لا اله الا الله..

عبد السميع : يا ناس خدوا الدجاج وسيبوني اروح..

مرسى : يا ناس سيبوا الراجل..

عبد المطيع : ما تسيبوهوشى هو ومرسى.. منين جابوا  
الفلوس..؟ أكيد الحكاية دى وراها حاجة أكيد..!!

رئيس العسس : (ياخد عبد المطيع جانباً) حاجة إيه؟ اتكلم قول..

عبد المطيع : ما دام معاهم فلوس يبقوا بيسرقوا جاموس.. صح  
والا لا..؟



رئيس العسس : مظلوط.. مظلوط (يدفعه ويخرج)  
 أبو مرسى : أنا جاى معاك يا رئيس العسس..  
 (ياخذ قطعة قماش لرئيس الشرطة)  
 رئيس العسس : عايز إيه..؟  
 أبو مرسى : عايزك فى كلمتين على جنب..  
 مرسى : (يُنظر لعبد المطيع) والله ساعات ابقى عايز اقطم رقبتك.  
 عبد المطيع : ما تقدرش تعمل معايا أى حاجة..  
 مرسى : (يمسك بطنه) أى.. أى.. أى..  
 عبد المطيع : اسمه الجبار المنتقم (يشير إلى السماء)  
 مرسى : أنا لازم أروح الحمام.  
 عبد المطيع : روح.. ربنا يشفيك ويزيح عنك..  
 مرسى : خللى بالك من الدكان يا عبد المطيع..  
 عبد المطيع : حاضر.. كله لله.. والاجر والثواب من عند الله..  
 مرسى : أنا ماشى.. بطنى.. بطنى.. (يمشى مرسى)  
 عبد المطيع : (يجلس فى الدكان بمفرده) ياه.. كل دى بضايح عندك يا مرسى وماتع عن الناس القماش ومغلى الأسعار..  
 زينات : فين مرسى..؟  
 عبد المطيع : راح الحمام.  
 زينات : وأبوه..؟

- عبد المطيع : مات.. قصدي راح.
- زينات : وانت يا اخويا صاحبهم..؟
- عبد المطيع : أنا صاحب الدنيا كلها.
- زينات : (تبكي) أعمل إيه.. بس.. اديني عشرة متر دبلان  
وخلص.
- عبد المطيع : بتعطي ليه بس يا ست.؟
- زينات : خدامتك زينات وما معيش غير ١٥ دينار ومرسى  
بيقول الدبلان المتر بدینار ونص.. وعایزه عشرين  
متر حریر والمتر بيقولوا بتلاته دينار وعایزه اتجد  
للبنات للفرح.
- عبد المطيع : لا يا ست تجدي للبنات والفرح بيها كله حبيبي تمام  
المتر من أي قماش بنص دينار يا بلاش بنتك ح  
تتجوز.
- زينات : ربنا يخليك..
- عبد المطيع : ولازم تتجوز على مرتبه..
- زينات : مرتبتين يا اخويا.. اهله شارطين علينا..
- عبد المطيع : دا أنا كنت متجوز على حصير على الأرض..  
ومخدرات متجدين بالخيش وجابوا لي شوية عضم  
من غير لحمه.. شوربة ليلة الفرح!؟
- زينات : دا على زماكم يا خويا.. بس البنات يتيمه..
- عبد المطيع : يتيمه.. لا.. لازم تتجوز على مرتبتين.. لا ثلاث

- مراتب خدى (ويقطع من القماش..)
- عبد المطيع : (ينادى) بنص دينار أى نوع وكل نوع يا بلاش..
- قرب قرب قرب قرب.. تخفيضات.. تخفيضات للقلايه
- واليستامى والفقرا اللى عندها بنت عابزه تتجوز
- تيجى تالخد واللى عنده عيل عريان بجى ياخذ..
- والفقير يتكسى بنص.. بنص دينار.. والبردان يدفا
- ياللا ياللا..
- زينات : يا تفيده.. يا نفيسة.. ياسنيه.. يالواحف.. ياكوتر يا
- عيشة (الناس تتجمع) القماش بنص دينار..
- رجل ١ : هات عشرين متر..
- رجل ٢ : هات عشرين متر..
- رجل ٣ : هات تلتين متر..
- عبد المطيع : شويه.. شويه.. كله بالهداوه.. كله بالهداوه..
- البضاعه موجوده والخير كثير..
- مرسى : (يظهر) إيه ده.. فى إيه..
- عبد المطيع : كله على نص دينار..
- مرسى : خربت بيتى يا عبد المطيع خربت بيتى.. ادونى
- القماش.. ادونى القماش.. القماش ده بتاعى..
- (يجرى مرسى حول الناس والناس تجرى منه)
- (ينهار مرسى تحت أقدام عبد المطيع)
- عبد المطيع : مالك يا مرسى.. بتعيط ليه..؟ دا أنا زكيت عن مالك

مرسى : عملت في إيه؟ وبتزكى عليّ ليه؟  
عبد المطيع : بامسح ذنوبك اللي عملتها يا مرسى حطيت شوية  
للغلاظة.. يا مرسى الناس عريانة في الشوارع  
وأنت مخبي القماش.. حرام عليك يا مرسى..  
مرسى : ح شتكوك للقاضي.. ح شتكوك للسلطان..  
عبد المطيع : أشتكى إيش ياخذ الريح من البلاط فين الحمار  
بتاعى.. فين الحمار.. أنا ماشى..  
مرسى : أنا لازم أفتح نفوذك..  
(يجري خلفه بعضا)  
(نهاية مشهد السوق)

### المشهد الثالث

(يدخل المنادى إلى خشبة المسرح)

المنادى : يا أهل القاهرة.. يا أهل المحروسة.. هللوا و  
أبشروا و الفرحوا و هللوا لقد وقع الأمير الشرير  
سلطان البلاد الهرمان العادل طومان باى و قتله  
رجال السلطان قتصوة الغورى و الأمراء المخلصين  
و هذا جزاء الأشرار هذا جزاء الحكام الذين  
يهربون من الوظيفة.. والآن أصبحتم أحرارا و  
توزع فى القلعة المشروبات و المأكولات و  
الحلويات و المذاقات..

(بهللون و يرقصون مع استعراض غنائى فرحاً  
بقتل السلطان وتولى قتصوة الغورى) (يتغير  
الديكور لبيت عبد المطيع.. ويدخل عبد المطيع على  
المسرح فتجده أم بثينة فتجرى إليه)

أم بثينة : أنت جيت..

عبد المطيع : جيت يا نفيسة.. ويا ريتنى ما رحت ، مشوار سخن  
يا نفيسة.. اعملى لى شوية مية سفنة أحط فيها  
رجلى..

أم بثينة : ما عنديش حطب أولع بيه..

عبد المطيع : ما قلتيش ليه من الصبح..؟  
 أم بثينة : كنت مشغولة..  
 عبد المطيع : مشغولة فى إيه إن شاء الله..؟  
 أم بثينة : كنت فى حرب..  
 عبد المطيع : حرب إيه..؟ مش فاهم..؟  
 أم بثينة : مش عارف يعنى إيه حرب.. ما تستعبطش على..  
 عبد المطيع : آه فهمت.. كنت مشغولة بالأولاد..  
 أم بثينة : باقول لك إيه يا راجل أنت لما أكلتك رد على عدل..  
 عبد المطيع : خدها يا رب.. يا ولية سخنى ليه شوية ميه بملح  
 أحط فيهم رجلى..  
 أم بثينة : مفيش حطب ولا ملح..  
 عبد المطيع : استلفى من الجيران شوية حطب و شوية ملح و  
 شوية ميه.  
 أم بثينة : الجيران.. أنهو جيران.. دول أحزان.. دا انت باتى  
 لى بيت فى آخر الجزيرة مفهوش جيران جاتبى  
 أحزان.. ما فيش جيران  
 عبد المطيع : يا وليه الجيران.. (يشير إلى منزل فاطمة)  
 الجيران..  
 أم بثينة : جيران.. هم فين.. مش شايقة جيران.. أنا شايقة  
 حيه و تعبان  
 عبد المطيع : يا نفوخى.. يا نفوخى (يهب واقفاً) روحى لفاطمة

- ولا لعبد السميع..
- أم بثينة : يا دماغى يا نفوضى.. مش رايحة لفاطمة ولا لعبد السميع.. أطلب منهم أنت (تقلده) يا ولية الجيران.. الجيران.. (تخرج أم بثينة يتأكد من خروج أم بثينة يهيب واقفاً يدق باب فاطمة.. وتظهر رأس أم بثينة تراقبه)
- عبد المطيع : فاطمة.. فاطمة.. (بصوت منخفض جداً)
- أم بثينة : (تعود بسرعة) يا راجل خبط جامد و نادى وقول يا عبد السميع يا عبد السميع..
- عبد المطيع : (يفزع) مالك يا ولية فيه إيه فجعتينى..
- أم بثينة : طيب يا مفجوع أنا ح أسيبك تخبط..
- عبد المطيع : (يعود ليتأكد من خروج أم بثينة ثم يدخل مرة ثانية ثم يعاود الكرة وينادى) يا فاطمة (بصوت منخفض)
- أم بثينة : (تدخل) أخبط لك أنا يا عبد المطيع..
- عبد المطيع : يا ولية فجعتينى فيه إيه مالك أنا ح أخبط..
- أم بثينة : (تخبط على الباب بشدة) التخبط كده.. كده..
- عبد السميع : مين العربجى اللى بيخبط فى ساعة زى دى..
- أم بثينة : أنا..
- عبد السميع : (يفتح الباب) مش تقولى فيه إيه عايزة إيه يا ست أنت مش تبطللى قلة أدب. (يفاجئ بعبد المطيع)
- عبد المطيع : أنا اللى باخبط يا عمى.

- عبد السميع : عما الدبيب.. نعم عايز إيه اتكلم.. انطق قول.. عايز حاجة.. أنا ما عنديش وقت.. أنا ما أعرفكش.. عايز إيه؟
- أم بثينة : اتكلم قل له..
- عبد المطيع : صباح الخير يا أبو فاطمة.
- عبد السميع : صباح النيلة..
- أم بثينة : نيلة.. الراجل بيقولك صباح الخير تقول له صباح النيلة.. رد عليه يا عبد المطيع.
- عبد المطيع : نعم.. بتقولى إيه يا أم بثينة..؟؟
- أم بثينة : بقول لك رد عليه أنت مش راجل و فى وشك شنب زيه.. رد عليه.
- عبد المطيع : صباح الخير يا أبو فاطمة..
- عبد السميع : صباح النيلة.. قلنا صباح النيلة.. عايز إيه تانى؟
- أم بثينة : سامع بيقول لك إيه.. يا راجل حس.. يا راجل رد عليه.
- عبد المطيع : خلاص ح أرد عليه يا نفيسة.. ح أرد.. هو قال إيه بالضبط؟
- أم بثينة : بيقول لك صباح النيلة..
- عبد المطيع : و أنا قلت له إيه..؟
- أم بثينة : قلت له صباح الخير..
- عبد المطيع : بلاش صباح الخير (برى فاطمة) صباح الورد يا



أبو فاطمة..

عبد السميع : صباح القطران..

أم بثينة : سمعت قال لك إيه..

عبد المطيع : سمعت..

أم بثينة : رد عليه..

عبد المطيع : روحى أنت بعيد شوية شوفى العيال عاملين إيه..

وأنا ح أرد عليه بطريقتى..

أم بثينة : يستحرقوا العيال.. رد على الرجل.. قلت له صباح الخير قال لك صباح الزفت.. قلت له صباح الورد قال لك صباح القطران.

عبد المطيع : خلاص أنا ح أوريه شغله.. ح أفرجه.. (يذهب نحوه) إزاي الأحوال يا عبد السميع..

عبد السميع : هباب.. الأحوال زى الهباب.. نعم يا أخويا عايز حاجة؟

عبد المطيع : (يهرش فى رأسه) لأ مش عايز..

أم بثينة : يا رجل حتفرسنى.. حتموتنى.. رد عليه.. الرجل بيشتك..

عبد المطيع : بيشتمنى أنا..

أم بثينة : آمال بيشتمنى أنا..

عبد المطيع : اللى بيشتم بيشتم نفسه.. و بعدين عبد السميع راجل مؤدب مش غلاط..

- عبد السميع : أنت عايز حاجة يا هباب أنت؟
- أم بئينة : سامع بيشتك..
- عبد المطيع : لأ ما بيشتمتيش.. دا بيهزر.. يا هبابه تعالى يا هبابه روى.. دى كلمته طول عمره معايا هزار..
- كان ينادينى بيها وأنا عيل صغير يا ولد يا هبابه روح يا ولد يا هبابه تعالى..
- عبد السميع : باقول لك إيه يا هبابه انت.. مش عايزك تخبط على السباب ولا تتادى باسمى ولا اسم بنتى ولا اسم حد من قرايبى ولا اسم صوتك سامع والا.. لأ
- عبد المطيع : (ينظر لأم بئينة فى اليسار وهو فى اليمين) شفتى.. كل دا هزار.. أنا عارفه اصل يا عم عبد السميع..
- عبد السميع : عم.. إيه.. إيه إيه.. انت بتقول إيه.. انطق..
- عبد المطيع : عم عبد السميع.. هى دى فيها حاجة.. هو انت غيرت اسمك والا إيه..
- عبد السميع : لا ما غيرتش اسمى.. عم دى مش بالعها.. مش شاربها.. يا راجل احترم نفسك سنك قد سننى و عمرك قد عمرى و تقول لى يا عم.. انت قدى.. وزى..
- عبد المطيع : (هامساً) بس انت ركبك وجعتك من عشرين سنه وما خلقتش الا باسم النبى حارسها فاطمه.. أما أنا جايب عشره ولما اتجوز فاطمه بنتك هاجيب لك

- عبد السميع : (مقاطعا) انت بتعايرنى يا عبد المطيع إن ربنا عطاك عشره وأنا بنت واحده.. حكمتك يا رب شوف عبد المطيع بيقول إيه..
- عبد المطيع : ربنا يخللى لك فاطمه.. ويزيدها جمال وكمال.. فاطمه دى تساوى عشر عيال وعشرين ست..
- عبد السميع : بقول لك إيه مالكش دعوه بفاطمه.. سامع لا تجيب سيرتها ولا تنادى عليها ولا تشوفها.. فاطمة دى اللى طلعت بيها من الدنيا .
- عبد المطيع : ربنا يخليكى يا فاطمه..
- أم بثينة : عبد المطيع انت بتقول إيه.. (تتنصت عليهما وهى تقترب منهما).
- فاطمة : ربنا يخليك يا سى عبد المطيع..
- أم بثينة : ادخلى يا بنت انت من الشباك.. الرجاله بيتكلموا مع بعض..
- فاطمة : رجاله حقه على.. ما أعرفش اتك بقيتى راجل.. أنا خارجه لك أهه.. (تخرج)
- عبد المطيع : حلوه.. حلوه يا فاطمه..
- أم بثينة : سامع يا عبد السميع بتك بتشتمنى.. بنتك بترد على.. أدى التربية..

- عبد السميع : هو إحننا حنلاحقها منك والا من مراتك يا عبد المطيع يا ناس ارحمونا شويه انخلى جوه يا بنت يا فاطمه..
- فاطمة : حاضر يا ايه.. عن إذنك يا سى عبد المطيع (تسير بدلال حتى تدخل الدار)
- عبد المطيع : اتفضل يا قمر (يتابعها بعينه وهى تتدلل) ما شاء الله ما شاء الله سبحانه من خلق وصور..
- عبد السميع : (يطلق الباب) ناس قللات الأناب (يطلق عبد السميع الباب فى وجهه)
- أم بثينة : قفل الباب فى وشك وسأكت له يا راجل رد عليه اعمل أى حاجة الراجل شتمك وبهدلك وأنت واقف قدامه لا بتصد ولا ترد..
- عبد المطيع : فلوس.. فلوس.. الله يحرق الفلوس و اليوم اللى ظهرت فيه الفلوس..
- أم بثينة : الفلوس هى كل حاجة فى الزمان دا.. (أغنية عن الزمان الذى يزن قدر الناس بالفلوس)
- عبد المطيع : الزمن اللى يعمل الراجل بفلوسه زمن سافل وجبان ومختل..
- أم بثينة : أنت اللى مختل العقل مش فاهم حاجة من الزمان دا..
- عبد المطيع : مش كفاية اللى عملتيه.. كنت عايز شوية حطوب

ومية وملح علشان رجلى عملت لى حكاية سيبينى..  
جنتى تعالئة.. سيبينى أمدد .  
(ينام على أرضية المسرح)  
أم بثينة : قوم يا خويا ما تتلمش فيها عايز تنام جوه.. نام  
جوه على السرير..  
عبد المطيع : لا حنام هنا فى الهوا..  
(يدخل رجل ١ يجرى ثم يدخل رجل ٢ يجرى)  
أم بثينة : فيه إيه؟  
رجل ١ : فيه لحمة بتتوزع فى القلعة..  
أم بثينة : لحمة؟  
(يدخل رجل ٣ يجرى)  
أم بثينة : فيه إيه يا ناس؟  
رجل ٣ : بيوزعوا لحمة.. فى القلعة..  
أم بثينة : ليه يا خويا..  
رجل ٢ : هدية السلطان قنصوة الغورى علشان استريح من  
السلطان العادل طومان باى..  
أم بثينة : كل الناس رايحة القلعة وأنت نايم؟ (تتظر إليه تجده  
نائماً.. تتجه إليه) قوم فز.. اتعمل.. اصحى..  
(تتجه إليه وتحاول جذب من قدمه ويقوم فزعاً)  
عبد المطيع : مالك يا وليه عايزة إيه.. أنا عايز أنام بره فى  
الهوا الطلق..

- أم بثينة : عايز تمام بره ما أنتش تايم عايزين لحمه م اللي بيوزعوها دي.. سمعت والا لا..
- عبد المطيع : سمعت وطنتشت علشان عايز أنام..
- أم بثينة : (تجذبه من قدمه) ولما سمعت حتنام إزاي.. حتصل إيه..؟
- عبد المطيع : ولا حاجة..
- أم بثينة : والأولاد..
- عبد المطيع : مالهم الولاد..؟
- أم بثينة : عايزين ياكلوا لحمه.. وفول و شعير للحمار..
- عبد المطيع : ربنا يفرجها..
- أم بثينة : عايزين لحمه من اللي بيوزعوها فى القلعة..
- عبد المطيع : لحمه بتقولى لحمه من اللي بيوزعوها؟ فيه حد بيوزع لحمه فى الزمان ده... لحمه يا نفيسة أنت جري فى مخك حاجة.. أتاريكى بتحلمى بيها كل يوم وأنا أصحى الصبح ألاقى نفسى معضوض.. أتاريكى كل ما العيال تتعارك مع بعضها تعضيهام يا نفيسة..
- أم بثينة : لحمه يا نفيسة و قدرتى تكوليهام.. عايزين لحمه..
- أم بثينة : يامسا نفسى أكمل أكل زى البنى آدمين.. لحمه مش شعير و فول.
- عبد المطيع : اسالى الجيران عندهم شوية شعير وإلا حتة لحمه سلف لحد ما ربنا يفرجها نديهم كام رطل بدلها..

- أم بثرنة : إزاي أقول لهم أدونى حنة لحمة سلف.. حد بيسلف  
حد لحمة..
- عبد المطيع : يا ولىة عبد السميع بيشتري فراخ أكيد بيشتري  
لحمة وممكن نستلف لحمة.. فيها إيه..؟؟
- أم بثرنة : وأنت مش زيه ليه؟
- عبد المطيع : الفقير اللي زى وزيك.. لازم يحلم باللحمة مش  
ياكل لحمة..
- أم بثرنة : أحلام الكسالى اللي زيك..
- عبد المطيع : سيبينى أنام شوية.. عايزانى أنام جوة حاضر  
(يذهب إلى بيت فاطمة) فاطمة يا فاطمة.. أنا جاي  
أنام عندكم..
- أم بثرنة : فاطمة إيه يا منول ما أنتش نايم لا جوه ولا عند  
فاطمة.. روح دلوقتى.. يعنى حتروح القلعة تجيب  
لنا لحمة سامع.. الناس بتجرى يمىن وشمال وأنت  
نايم. ولما صحبتك وقفت لى زى خيال المآة..
- عبد المطيع : أنا رحى يا نفيسة القلعة أول واحد ووقفت لما  
رجلى ورمت وتعبت قوى يا نفيسة..
- أم بثرنة : تروح تاتى يا حبيبى.. تروح علشان تجيب لعيلك  
لحمة يا عبد المطيع.. هو أنت وراك شغلانة  
غيرنا.. وراك عشر عيال وبنت على وش جواز..
- عبد المطيع : حاضر أنا ح اروح أهه.. (يمشى) إلهى ربنا ياخذك

يا أم بثينة الصبح قبل الظهر و الظهر قبل العصر  
والعصر قبل المغرب والمغرب قبل العشا والعشا  
قبل الفجر..



#### المشهد الرابع

(استعراض اللحمه.. والناس الجوعى والكل يصبح  
لحمه.. لحمه.. يتشكل هرم من الناس فى  
الاستعراض و الناس فى شكل طوابير و ازدحام من  
أجل اللحمه)

عبد المطيع : بالراحة شويه.. أى حاسب رجلى.. ماترقش يا  
أخى..  
رجل ٣ : هو أنا زقيت دا اللي ورايا بيزق..  
أم خليل : هى الستات ملههش فى اللحمه وإلا إيه..  
رجل ٤ : الستات طابورها خلص..  
أم خليل : طيب والعيال أعمل فيهم إيه عايزين لحمه..  
الشرطى : أنت (لعبد المطيع) الدور عليك خد..  
عبد المطيع : متشكر قوى.. ربنا يخلي لنا السلطان..  
(عبد المطيع ينظر إلى أم خليل يجدها تبكى)  
عبد المطيع : مالك يا ست انتى..  
أم خليل : العيال عايزين لحمه وجعاتين بقالهم يومين  
وماكلوش لحمه من شهرين (تبكى)  
عبد المطيع .. : خيالنا ماتعطيش يا أم خليل.. خدى اللحمه  
بتاعتى..

أم خليل : وانت يا خويا..؟  
 عبد المطيع : أنا نباتي والعيال ولادي بقوا نباتيين ياكلوا فول  
 لوبيا فاصوليا وشعير.. أكلهم النهاردة لحمه..  
 وعلمهم ياكلوا فول وبلاش اللحمه..  
 أم خليل : أصل أبو عيالي الله يرحمه كان جزار وكان معودهم  
 على أكل اللحمه كل يوم ومات وماعدتش الأولاد  
 تاكل لحمه..  
 عبد المطيع : لا مدام أبوهم معودهم على أكل اللحمه يبقى لازم  
 تأكلهم لحمه..  
 أم خليل : أنت راجل طيب قوى يا اسمك إيه..  
 عبد المطيع : عبد المطيع.. اسمي عبد المطيع..  
 أم خليل : لو كان كل الناس طيبين زيك كده يا عبد المطيع يا  
 طيب.. متشكرة قوى.. سلاموا عليكم..  
 عبد المطيع : وعليكم السلام.. لما أقف فى الطابور من تانى..  
 رجل ٤ : مش أنت أخذت لحمه..  
 عبد المطيع : عطيتها لست الغلبانة..  
 رجل ٤ : ضحكت عليك دى مش غلبانة دى أم خليل الحرامية..  
 عبد المطيع : نعم.. أم خليل الحرامية..  
 رجل ٤ : أيوه بتنصب على الناس..  
 عبد المطيع : يا راجل حرم عليك.. دى صعبت على كانت بتبكي  
 بحرقة..

رجل ٤ : الظاهر عليك رجل أهبل..  
عبد المطيع : أنا أهبل دا أنت ستين أهبل.. خدها يا رب هي  
السبب في الزنقة المهيبة دى..

عبد المطيع : أنا أهمل دا أنت ستين أهمل.. خدھا یا رب هی السبب فی الزنقة المہیبة دی..

رجل : خلاص.. خلاص خليك في الطهور..

**الشرطي :** ما عندناش غير ٣ اكوام واللى حرمى عليه كوم..

ياخذة ويمشى على طول.. واحد اثنين ثلاثة (يرمى  
كوم ياخذة شخص ويجرى) خداها يا رب واحد اثنين  
ثلاثة (يرمى لفة ياخذها شخص ويمشى) واحد  
اثنين ثلاثة (يرمى لفة تقع فى يدى عبد المطيع)  
(يستكومون على عبد المطيع فى هرج ومرج.. لا  
يظل معه الا تتنوفة لحمه)

عبد المطيع : يا رب أنا بالقول خذ نفسيه يارب مش اللحه قصدي نفسيه.. اللحه راحت إيه داا.. تتنوفه لحه.. تتفع سيجاره.. لأ.. زرار.. لأ.. احطها جرس على الباب.. تتنوفه لحه.. اشمها للعيال كل واحد شمه شمه.. أيوه.. والا أحسن حلاجه.. أتشفها ونصلها حجاب واحطها على الباب حرز وتتفع جوزه بدل المصل تتنوفه لحه الى طلعت بيها من عند السلطان.. عليه العوض ومنه العوض أرجع والسلام لأم العيال (بخرج) وإهو برضه في أيدي حلاجه..

(سستار)

### المشهد الخامس

(فى بقعة ضوء على المستوى الثانى)

(يدخل الزينى بركات وطومان باى)

الزينى بركات : اسمع يا طومان باى.. أنا بتألم على اللى حصل لعين السلطان.

طومان باى : وايه رأيك نعمل إيه قول.. ما انت الزينى بركات ومحتسب القاهره.. وعيون.. السلطان هى عيون الشعب كله..

الزينى بركات : شوف يا طومان باى لازم تصدر مرسوم فى الحال.. بأن كل البلاد ترتدى ملابس الحداد على عين السلطان.. وتصلى ركعتين بعد كل صلاة تطلب شفاء عين السلطان..

طومان باى : دا كلام جميل.. تصدر مرسوم فى الحال.. يا أهل المحروسه.. مرسوم من الزينى بركات المحتسب.. لا بأمر الأمير طومان باى نائب السلطان.. نائب الغوريه مرسوم بما هو آت.. (يظهر المنادى)

المنادى : سيدنا السلطان قنصوه الغورى شفاه الله وعفاه أصيبت عيناه.. يمرضى ودا.. ونظن الحزن العلم على عين السلطان وعلى كل العباد الرجال والأطفال

و النساء ارتداء الملابس السوداء ويمنع الاحتفال  
بالختان.. والأعراس والأفراح والليالي الملاح.. أو  
بأى احتفال لحين شفاء عين السلطان ويسمح  
بإقامة المآتم والجنائز ومراسم الاحزان ويصلى  
الجميع ركعتين بعد كل صلاة.. ويطلبون من الله  
شفاء عين السلطان.. وكل من لا يرتدى الملابس  
السوداء ستكون أيامه سوداء والكل يرتدى ملابس  
سوداء وكل من يخالف الأوامر سيعاقب من سيدنا  
طومان باى.. الفارس الهمام.

الراوى

: ما سمعش صاحبنا عبد المطيع باللى جرى واللى  
كان.. ولا سمع مرسوم ولا فرمان.. وراح عبد  
المطيع للجيزه ماشى على رجليه هو والحمار لأن  
الحمار كان تعبان.. صعب عليه.. رجعوا الاثنين  
ماشين تعب رقد تحت شجرة جميز فى القسطنط  
كثير جى ست ساعات..  
(يتحول الديكور إلى منزل عبد المطيع)

### المشهد السادس

- (يدخل الكاشف على المسرح يرتدى ملابس سوداء وهو مسرع الخطى يرق باب عبد المطيع)
- الكاشف : يا عم عبد المطيع يا عم عبد المطيع (الكاشف مضطرباً وحزيناً)
- بثينة : (تفتح الباب بعصبية) خير يا كاشف مالك فيه إيه؟
- الكاشف : فيه مصيبه فيه كارثة (يبكى)
- بثينة : بتبكي ليه يا كاشف..؟
- الكاشف : بعدما حضرت الشبكة واشتريت كنبه وقله وطشت نحاس وليفه وزير وغلخالين فضة أخذتهم من ستي علشان نتجوز يا بثينة يوم الخميس..
- بثينة : ياما نفسي يا كاشف نسكن أنا وانت فى أوضة لوحدنا بدل ما إخوانى العشرة كلهم نايمين جنب بعض مع امى وأبويا فى أوضه واحده..
- الكاشف : فكرتسنى بأبوكى.. مرسى اشتكى أبوكى عند القاضى..
- بثينة : اشتكاه ليه هو أبويا عمل إيه؟.. مرسى دايما يكره أبويا ويكره الناس كلها.. مايجيش الا نفسه.
- الكاشف : ويجب ياكل بطاطس وسوداتى ليل نهار..

- بثينة : (تمسكه من يده) سيبك من مرسى وأبويا خليتنا فى بيتنا.. عملت إيه وحضرت إيه..؟
- الكاشف : من ساعة ما أبوكى قال لى ح أجوزها لك يوم الخميس الجاى بيضت الأوضة بتاعة أمى وروقتها واشتريت وجهازت لكن الفرمان جه يا بثينة بوظ الدنيا ممنوع الأفراح والليالى الملاح.. باقول لك إيه ماتيجى تشوف برج الحمام..
- بثينة : باقول لك إيه أنا عارفك لا برج حمام ولا عشة فراخ..
- الكاشف : يابست اتنى مراتى وكاتب كتابك.. فاضل بس ليلة الدخلة (يمسكها)
- بثينة : ابعد ايدك عنى يا كاشف..
- عبد السميع : (يظهر عبد السميع يرتدى ملابس سوداء) إيه المسخرة دى..
- الكاشف : مسخرة إيه يا عم عبد السميع.. دى مراتى وأنا حر فيها..
- عبد السميع : لسه الدخلة يا ولد..
- الكاشف : باقول لك إيه مالكش دعوه بى..
- بثينة : جرى إيه يا عم عبد السميع.
- عبد السميع : فين أمك تيجى تشوف المسخرة دى..
- الكاشف : روح تشوف مصلحتك.. أنا طالع برج الحمام عايز

- حاجه دى بثينة مراتى (يخرجان)
- عبد السميع : قلة أدب (يطلق الباب)
- عبد المطيع : (يدخل عبد المطيع وهو يصيح) يا نفيسة.. يا نفيسة.. يا ولاد تعالوا.. يا بثينة.. يا بثينة.. اللحمه وصلت.. اللحمه جات يا أولاد.. يدخل يحمل فى يده (لفافه ورق كبيره) (تخرج أم بثينة ترتدى الملابس السوداء)
- أم بثينة : (تخرج من الدار وفى يدها عجينه) صحيح.. لحمه بصحيح.
- عبد المطيع : أمال لحمه بهزار.. يا نفيسة.. خدى..
- أم بثينة : (تمسك لفافه الورق) هى فىن؟ (تفتح الورقه)
- عبد المطيع : خللى بالك.. عايزك تعملى منها شوربه محترمه.. والعضم وزعبيه على الكلاب بعد العيال ما بمصمصوه.. واعملى لنا كباب وكفته.. وشويه فته محترمه وتحطى عليها الهبر..
- أم بثينة : (تفك ورقه فى داخل ورقه اخرى.. ثم تفك ورقه تجد ورقه اخرى وهكذا حتى تجد تنتوفه اللحمه) هى فىن اللحمه دى.. هى دى اللحمه.. دى اللى هاعمل منها كباب وكفته وشوربه..
- عبد المطيع : ما تتبتريش على نعمه ربنا يا نفيسة..
- أم بثينة : يا خبيثك يا نفيسة.. قومى يامه من تربتك



وشوفيني.

- عبد المطيع : قولى الحمد لله.  
(يحدث هرج ومرج مع دخول مرسى وأبو مرسى  
والصسس ورئيس الشرطة و أهل السوق زينبات وأم  
خليل وأولاد عبد المطيع)  
أبو مرسى : أهه يا رئيس الشرطة..  
عبد المطيع : شايقه يا نفيسة كل الناس لما عرفت إن عندنا لحمه  
جات تتعشا معانا..  
نفيسة : كل دول ح يتعشوا من دى..  
عبد المطيع : ربنا هايطرح فيها البركه..  
رئيس الشرطة : انت عبد المطيع؟  
عبد السميع : (يفتح عبد السميع الباب كالصاروخ) أيوه هو عبد  
المطيع أبن عبد المطيع..  
عبد المطيع : وأدى جارنا العزيز كمان عايز ياكل لحمه..  
أم بثينة : لحمه إيه (لعبد المطيع) اتتيل جتك وكسه فيه إيه..  
مرسى : فيه مصيبه.. فيه كارثة.. جوزك خرب بيتى..  
أم بثينة : جوزى أنا؟  
عبد المطيع : جوزى أنا؟ انت متجوزه واحد تانى يا وليه من  
وراي؟  
مرسى : (يمسكه) بالقول لك إيه ما تستعبطش..  
فاطمة : (تظهر فاطمه) فيه إيه يا مرسى؟

- مرسى : الحقى يا فاطمه.. الراجل الحرامى دا خرب بيتى..
- عبد المطيع : فاطمه كده حاف..
- أبو مرسى : نفذ الأمر يا رئيس الشرطة.. واقبض على عبد المطيع..
- الكاشف : (يظهر الكاشف وبثينه) فيه إيه؟
- أم بثينة : فيه إيه يا ناس..
- عبد المطيع : انت هنا يا كاشف..
- عبد السميع : أيوه هنا هو والمحروسه بنتك فوق فى غية الحمام المهجوره
- أم بثينة : بتقول إيه يا راجل..
- عبد السميع : باقول بنتك مع كاشف فوق السطح فى غية الحمام..
- عبد المطيع : جوزها وهو حر فيها..
- مرسى : الراجل ده يا أم بثينة سرق دكاتى.. (تدخل زينات)
- زينات : فشر يا عبد المطيع ماسرقتش.. وأنا شاهدة باع البضاعة لك بالفلوس وأنت أخذت تمنها منه..
- أم خليل : حرام عليكم الراجل ده كريم عطانى اللحمه بتاعته وأنا عملت شوية شوربة للعيال وعملت فتة بالخل وجبتها (تقدم لهم الحلة)
- أم بثينة : هو أنت بقى اللي بتاخدى اللحمه من الراجل.. يا أم خليل كل ما يجيب لنا لحمه.

- رئيس الشرطة : بس ولا كلمة..أنت المتهم عبد المطيع عبد المطيع؟
- عبد المطيع : أنا عبد المطيع.. عبد المطيع بس.. مش متهم..
- بثينة : عملت إيه يابه؟
- عبد المطيع : أنا اللي عملت إيه..!! إزاي تطلعنى مع الكاشف الغبية وتشتمنى الناس فى.. كنت فوق معاه يا بنت..؟
- بثينة : ماحصلش حاجة يابه اطمئن كنا بنهزر بس..
- عبد المطيع : زغررتى يا نفيسة بنتك كانت بتنهز على السطح مع جوزها زغررتى..
- أم بثينة : أزغرد إيه وأهيب إيه؟ إحنا فى إيه والا فى إيه..
- ده كاتب كتابه عليها.. أنت عملت إيه؟
- فاطمة : (لمرسى) عبد المطيع عمل لك إيه يا مرسي؟
- أبو مرسي : سابه فى الدكان وراح الحمام رجع لقاه باع القماش كله بنص دينار لحد ما فضى الدكان.. باع الحرير الهندى المعتبر بنص دينار..
- زينات : كل الناس بتدعي لك يا عبد المطيع والناس فرحانة بس خايفة علشان فرمان.. مش حنقدر نعمل أفراح..
- عبد المطيع : ليه.. أأتم كلكم لابسين أسود ليه؟
- رئيس الشرطة : أنت يا بنى آدم لابس إيه؟
- عبد المطيع : زى ما أنت شاييف..

- رئيس الشرطة : شاييف.. شاييف.. (يهز رأسه) أنت بتحب مولانا  
قنصوة الغورى؟
- عبد المطيع : بصراحة أنا ما شفتوش ولا أعرفوش.. ولا اقدر  
اقول لك أنا باحبه وإلا يكرهه.. قال لك تعرف فلان  
تقول آه قال لك عاشرته تقول لأ.. يقول لك يبقى  
ماتعرفوش..
- أم بثينة : بيحبه يا خويا بيحبه.
- رئيس الشرطة : أمال لابس الهدوم دى ليه؟
- عبد المطيع : (بخوف) مالها الهدوم.. والله أنا عندى حتة زفرة  
شايها للمناسبات..
- رئيس الشرطة : لونها ليه؟
- عبد المطيع : جلابية لونها أبيض مادفعتش ثمنها لحد دلوقت  
وأبو مرسى له دين عندى ثمن الجلابية..
- رئيس الشرطة : يا سلام!
- عبد المطيع : آه والله.. مادفع ثمنها بعد محصول الفول.. وأظن  
إنى مادفع ثمنها قبل كده.. بس ربنا يسهل..
- رئيس الشرطة : أنت بتستعيط !
- عبد المطيع : طيب بلاش.. حادف ثمن الجلابية الأسبوع الجاى.
- رئيس القلعة : ياله بينا على سجن القلعة..
- عبد المطيع : ليه.. أنت مش مصدقنى؟
- رئيس الشرطة : طومان باى نائب السلطان عايزك هناك..

عبد المطيع : بشحمه ولحمه نائب السلطان عايزنى أنا؟  
 رئيس الشرطة : أيوه عايزك أنت..  
 عبد المطيع : أنت بتهزر (بتنظر لجندى ٢) مش هو بيهزر؟  
 جندى ٢ : لأ ما بيهزرش..  
 عبد المطيع : يعنى عايزنى شخصياً؟  
 رئيس الشرطة : أيوة..  
 عبد المطيع : بس أنا مش عايزة.. حلو دى يا جماعة  
 (بضحكون)  
 رئيس الشرطة : إحنا ما بيهزرش..  
 عبد المطيع : يا عم أنت وهو.. أنا ما أعرفهوش.. يعنى قال لكم  
 أنا عايز عبد المطيع!!  
 رئيس الشرطة : أيوة..  
 عبد المطيع : أنت قلت لى اسمه إيه التلى عايزتى؟  
 جندى ١ : هو مين؟  
 عبد المطيع : نائب السلطان..  
 رئيس الشرطة : طو ملن باى..  
 عبد المطيع : (بخاف قليلاً) ما تعرفش هو عايزنى ليه؟  
 رئيس الشرطة : أصله معجب بهنومك جداً جداً  
 عبد المطيع : هدومى.. دى.. معقول..!!  
 رئيس الشرطة : أيوه..  
 عبد المطيع : بس دى هدوم مش نظيفه..

- رئيس الشرطة : بس معجب بيها..
- عبدالمطيع : إيه.. يا راجل قول كلام غير ده !
- رئيس الشرطة : والله معجب بهدومك جدا
- عبدالمطيع : أنا فهمت إن الواد مرسى زعلان وعمل واسطة لنائب السلطان
- رئيس الشرطة : ياله قدامى..
- عبدالمطيع : إيه رأيك أدخل البيت ألقع هدومي وأديها لكم تديها له وأنا ألبس الحتة الزفرة.. وبالسلاطة تسلموا لى عليه على الأقل لما يعرف أنكم شربتم كوبيتين شاي وقمنا بالواجب حيفرح والجائزة اللى يديها لكم خدوها.. وزعوها على بعضكم.
- رئيس الشرطة : أنت لازم تروح له بنفسك وتديها له دلوقت..
- عبدالمطيع : أديها له فين.. وإذا عطيتها له ح أمشى عريان فى الشارع.. يا راجل عيب..
- رئيس الشرطة : لأ مشش عيب.. حتىجى معنا سجن القلعة من غير دوشة ولا إهانة..
- فاطمة : تهمة إيه؟
- رئيس الشرطة : أولاً تسديد أموال المدعو مرسى.. ومطالبته بتعويض ألف دينار عن بضاعته اللى كانت فى الدكان..
- زينات : حرام عليك.. الراجل كسا العريان..

عبد المطيع : أنا زكيت عن ماله.. ألف دينار يا مرسى مرة واحدة..

فاطمة : أنا ح أخلى مرسى يتنازل عن القضية..

رئيس الشرطة : وإذا مرسى اتنازل.. عبد المطيع متهم بقضية ثانية..

الجميع : إيه هى...؟

رئيس الشرطة : قلب نظام الحكم ودى الجناية العظمى والوقوف ضد مصلحة مصر وقيادة حزب للمعارضة ممنوع من ممارسة أى نشاط.. وهو الحزب الأبيض للملابس..

عبد المطيع : أنا..!! علقت حزب أبيض..

رئيس الشرطة : أيوه والدليل إن الناس كلها لابس أسود وأنت الوحيد اللى لابس أبيض يا مواطن..

تغنى فاطمة : اللون الأبيض شنفوه والقلب الأبيض خطفوه والحزب الأبيض منعه. (وهى بمفردها على المسرح)





## الفصل الثامن

### المشهد الأول

(ستار سكوندو.. أمامها يظهر الراوى الأول و  
الثانى مثل الفصل الأول مع استعراض القصر..  
يظهر السلطان وهو يغنى ويرقص مع جواريه..  
تثبيت الكادر ثم حديث الراوى (١) و الراوى (٢)  
مع تحريك وتثبيت الكادر)

راوى ١ : يا عينى يا ولداه.. أخذوا عبد المطيع من الدار  
للنار..

راوى ٢ : يقولوا لللى مش حيلس هدم سوده.. أيامه  
حتكون سوده..

راوى ١ : هو إحنا شوقنا أيام أسود من دى..

راوى ٢ : أيوه شفقنا كتير أيام صعبة وقرأ التاريخ.. ولكن  
على أى حال مع أن الضرائب قسمت شهر الخلق..  
طومان باى بيلم الضرائب من الناس..

راوى ١ : السلطان عينه وجهته من السهر.. كان خايف ينام  
أحسن السلطان القديم يطلع له..

راوى ٢ : وقالوا لأمومة دخلت فى عينه..

راوى ١ : علشان كده طومان باى.. هو الذى عطا الأوامر بأن

الناس تلبس أسود.

راوى ٢ : وكانت القاهرة كلها لابسـة أسود.. إلا عبد المطيع..  
لأنه ميعرفش.. لأنه كان نايم ومش دريان.. وإحنا  
مابتهزرش.. الحكاية دى حقيقية..

راوى ١ : حد يقدر يكذبك.. ما إحنا عارفين..

راوى ٢ : كانت أرض المحروسة مستهدفة.. إسماعيل  
الصفوى فى العراق عايز يحتل مصر.. وكان  
الإنجليز لهم أطماع فى أرض مصر.. وعايزين  
يحتلوها ويستولوا عليها.. ولهم أتباع وعملاء من  
المماليك..

راوى ١ : وكان الفرنسيين لهم أطماع أيضا.. وعايزين يحتلوا  
مصر قبل مايحتلها الإنجليز.. سباق بين فرنسا و  
إنجلترا..

راوى ٢ : وكان العثمانيين يعنى الأتراك.. عينهم على مصر  
برضه وكان لهم أتباع أولهم الزينى بركات..  
وآخرهم سايـس خيل على باب القسطنطينية.. وعلى  
فكرة العثمانيين دول مسكوا مصر بعد فترة صغيرة  
قوى من الحكاية دى..

راوى ١ : كل ده.. والسلطان قنصوة الغورى.. قاعد يتدلع مع  
بعض الجوارى ويجمع الأموال.. ويعالج فى عينيه  
الحمرة الملتهبة..

- راوى ٢ : يا مولاي قنصوة الغورى.. الصفويين فى إيران..  
عازين أرض مصر..
- قنصوة الغورى : بقالى يومين حاسس إن بطنى وجماعى وعندى  
آلام.. وغازات.. غير وجع عيى..
- راوى ٢ : يا مولاي سلطان البلاد قنصوة الغورى.. العثمانيين  
ناويين يحتلوا مصر قبل الصفويين..
- قنصوة الغورى : نفسى فى أكلة ملوخية بالأرانب يا طومان باى..
- راوى ١ : الفرنسيين دخلوا السلاح ولهم أتباع فى البلاد..
- قنصوة الغورى : حضروا لى الحمام والجوارى وميه سخنه..  
والقطرة كمان..
- راوى ٢ : يا مولاي.. الإنجليز داخلين البلاد عن طريق  
المماليك وناويين يحتلوا مصر..
- قنصوة الغورى : عيى بترف.. ورأسى يتلف.. وعقلى فاضل له  
دقيقة ويخف ..
- راوى ١ : يا أمير البلاد طومان باى.. الحق.. أهلى الاندلس  
بيدبحهم ملك أسبانيا.. والمسلمين فى بحر من  
الدم..
- طومان باى : (يظهر أيضا طومان باى مع قنصوة الغورى) يا  
مولاي السلطان قنصوة الغورى.. الحق الناس  
يتبتيح فى أسبانيا.. الأسبان بيدبحوا المسلمين  
بالآلاف والملايين..

قصوة الغورى : للدرجة دى.. دا شئ مثير.. إزاي كده؟  
طومان باى : ابعت جيوش الممالك البحرية.. والا ابعت جيوش  
الممالك النيلية..؟  
قصوة الغورى : لأ.. جيوش لأ.. ابعت إحتجاج شديد اللهجه.. أه يا  
عينى.. قولهم أنا زعلان عشاتهم قوى.. والسلطان  
من كتر ما يبيكى على المدايح التى فى الاتدلس..  
عينه احمرت ووجعته من العياط على الاف القتلى..  
وهو مريض وابعت رسول يحتج لملك اسبانيا  
صديقى.. ماهو أنا وملك اسبانيا اصدقاء.. ده لسه  
حتى باعت لى جوارى روميات.. يفتحوا النفس..  
ابعت له احتجاج شديد اللهجه قصدى رفوق  
اللهجه.. اصل إحنا أصحاب.. ده كمان بيعت لى  
غلام بيغنى أجمل من الفتيات..  
راوى ١ : وزى البوسنه و الهرسك والشيشان مع روسيا..  
والتاريخ بيعيد نفسه.. كل ميت سنه بتحصل  
مدايح.. وآه يا ارض مصر.. حيتان من الخارج  
عايزه تنهشك.. وحيتان من الداخل.. حيتان من  
الداخل خونه.. وعلاء للفرنسيس والإنجليز و  
العثمانيين والصفويين وملك اسبانيا.. وممالك من  
كله لون وكل صنف.. يتأخذ جعونات ومساعدات من  
الخارج..

راوى ٢ : وزهران.. زعران يعنى شطار.. يعنى صبيح  
وبلطجه.. وكانوا فى الوقت دا الف الفين تلاته ولا  
اكتر شويه.. مش حاقول كام كانوا.. كثير كثير..  
أكثر من عشرين ألف..

راوى ١ : أما عبد المطيع الغلبان.. مش دريان باللى بيجرى  
حواليه.. كان منخوم بالقمة العيش وبولاده  
العشره.. وأخذوه للسجن من قدام الدار زى ما  
شفتوا.. وفاهمين اته ضد السلطان ونافم على  
الاحوال.. وعاليز يغير النظام.. وهو ولا هو  
فهمان..

راوى ٢ : ومراته عماله بتبكي عليه وتصوت وتصيح وتعدد  
ليل نهار.. وهو كان فى السجن هناك..

راوى ١ : فى السجن كان هناك..  
(موسيقى مع تغيير الديكور.. يفتح على السجن  
والزنازات.. عند دخول الزنازات استعراض السجن  
واستقبال.. بعد استقبال المجموعه له فى  
استعراض يحتفى بعد المطيع كبطل وقائد..)

عبد المطيع : آه يا ضهرى.. آه يا بطنى.. آه يا راسى..  
ضربونى.. عذبونى

عبد المطيع : (رجل عجوز طيبه) اته طريبه.. جيت أعالج السلطان  
واخذ مكافأة ألف دينار.. أخذت ألف علقه..

- الحارس : اول مره نشوف واحد يتحدى السلطان جهارا  
نهارا..
- (الجميع يحيونه.. ويجلسونه ويتحدثون معه على  
أنه قائد وبطل ومعظم)
- حسن : أنا عارفك وانت مش عارفنى.. صح..؟.. مش انت  
عبد المطيع اللي اتحديت السلطان؟..
- عبد المطيع : أنا اتحديت السلطان.. ! انت غطت يا اخ فى  
العنوان..
- حسن : اطمئن.. اطمئن قوى ماتخفش.. أنا مش من  
العسس.. أنا اسمى حسن من اتباع مولانا اسماعيل  
الصفوى..
- عبد المطيع : اسماعيل الصفوى مين..؟ السلطان..؟ مش ده  
السلطان بتاع كل فول وطعميه بإطمئنان.. واقرا  
الفتاحه للسلطان.. ده الفول عنده بالبصل الاخضر  
يجنن.. والا شوربة العدس..
- حسن : لأ.. ده سلطان الدولة الصفويه فى العراق..
- عبد المطيع : وانت جاي من طرفه عشان تعالج عين السلطان..  
تمام..؟
- حسن : لأ.. أنا جاي مخصوص عشاتك.. ودخلت السجن  
عشان أبلغك رسالة..
- عبد المطيع : تبلغنى أنا.. !

- حسن : أيوه.. إحنا عايزينك معانا.. وحنديك المال  
والسلاح..
- عبد المطيع : (يضحك) أنا..!؟
- حسن : أيوه انت.. دا انت بقيت بطل والناس عملينك رمز  
لهم... عايز كام يا بطل.. وإيه نوع السلاح اللي  
نفسك فيه؟.. قول ولا يهمك.
- عبد المطيع : أى حاجة نفسى فيها تجيبها؟
- حسن : انت تأمر مالكش دعوه..
- عبد المطيع : نفسى فى حنة لحمه.. وادفع كمان الف دينار  
لمرسى وأبوه الحرامى اللي دخلوني هنا..
- حسن : مابلتش تلف وتدور معايا.. ادخل فى الموضوع..
- عبد المطيع : ما أنا جوه الموضوع أهه..
- حسن : ما تقلقش.. إحنا هندخل السلاح.. و المال.. إحنا  
لنا أجنحة فى كل مكان.. جناح بحرى.. جناح  
قبرى..
- عبد المطيع : أيوه.. أحب أكل الأجنحة قوى.. عبد السميع ياكل  
فراخ.. و إحنا ناكل أجنحة.. أدى بتاع الفراخ نص  
دينار.. يدينى خمسين جناح.. وفيه ناس بتشتري  
فضل الفراخ..
- حسن : مش هو ده بيت القصيد.. بيت القصيد هو..
- عبد المطيع : (مقاطعا) يبقى تشوف لنا بيت بحرى أربع أوض..

- عشيان العيال وامهم..
- حسن : مش مهم.. المهم السلاح اللي انت عايزه.. أى سلاح..
- عبد المطيع : (يلعب فى دقته) موس.. موس أخلق بيه..
- حسن : المهم انت معانا والا مش معانا؟
- عبد المطيع : أنا مع الله.. سيبتى يا أخى استريح شويه.. (ينام عبد المطيع.. يقترب منه مكرم)
- مكرم : أنت.. مش انت عبد المطيع البطل.. اللي اتحدى السلطان والممالك وأعوان الفرمان.. وطلع على الناس لآخاف من عسس ولا من كائن كان..
- عبد المطيع : لأ مش أنا..
- مكرم : لأ.. انت البطل.. انت الفارس عبد المطيع.. انت اللي عليك العين بتدور..
- عبد المطيع : أنا عبد المطيع وبس.. من غير فارس..
- مكرم : انت متواضع يا كبير..
- عبد المطيع : الكبير هو الله..
- مكرم : يا عظيم..
- عبد المطيع : العظمة لله..
- مكرم : يا لليم.. يا سهتات.. يا معلم.. دا انت طلعت ميه من تحتك تخرج لك أمسك (يناوله جاتبا كمين نكود)
- عبد المطيع : ده كيس مال.. بتاع إيه ده..؟



- مكرم : إلا بتاع إيه.. بتاعك.. ده أول الغيث..
- عبد المطيع : ده أول الغيث !.. أمان لما يجى الغيث هنحصل إيه!..  
طب ودا علشان إيه..؟
- مكرم : علشان توزعه على اعواتك... وتقول لهم الحل هو  
الفرنسيين.. الناس كلها مستتبك يا بطل..  
وحيسلوك إيه هو الحل..
- عبد المطيع : بينى وبينك واحد من شويه قال لى.. إن الحل هم  
الصفويين.. أى واحد حيسلوك إيه هو الحل  
حالفولة الحل الصفويين..
- مكرم : لأ.. دول مش الحل.. الحل هو الفرنسيين.. الناس  
الحلوة.. والقعدات الحلوة.. واللقة الحلوة.. ده  
غير البنات الحلوة يا عبد المطيع.. الفرنسيين  
عينهم على مصر وأنا حالفولهم يدوك قصر فيه  
بنت حلوة..
- عبد المطيع : أحلى من فاطمه.. يا سلام.. أنا بقى أحب القعدات  
الحلوة.. وأنا بدلدل رجلى على النيل ما أحلى أنك  
تقعد على شط النيل وتلدل رجلك فى الميه الباردة  
وتشوى دره وتاكل سمك..
- مكرم : سمك إيه..؟ وميه إيه..؟ ودره إيه؟ إحنا هندي لك  
قصر.. قصر يا عبد المطيع..
- عبد المطيع : قصر إيه يا عم.. وانت شكلك جربان وكحيان

وتعبان..

- مكرم : أنا متذكر يا زعيم.. متذكر..  
عبد المطيع : كده.. طب خذ فلوسك المزوره وأبعد..  
مكرم : دى مش مزوره.. دى مبعوته لك من الفرنسيين..  
عبد المطيع : هما كام؟..  
مكرم : الف دينار.. (يرمى الصرة مرة أخرى)  
عبد المطيع : كام؟.. لا يا عم..  
مكرم : عايز كام؟  
عبد المطيع : (يشير عبد المطيع بكفه خمسة)  
مكرم : حا أقول للمسئول وأرد عليك..  
(يدخل الحارس)  
الحارس : عبد المطيع..  
عبد المطيع : نعم..  
الحارس : زياده.. أتفضلنى يا ست..  
(تدخل زينات منحنية الرأس)  
عبد المطيع : فاطمه..  
زينات : لا مش فاطمه..  
عبد المطيع : نفيسة.. معش يا نفيسة..  
زينات : ولا نفيسة..  
عبد المطيع : الله.. تبقى بثينة.. بنتى حبيبتى..  
زينات : ولا بثينة بنتك..

عبد المطيع : أمال انتى مين؟..  
زينات : أنا زينات..  
عبد المطيع : زينات مين؟  
زينات : زينات اللي بتع لها القماش وسترت بنتها وما فضحتهاش قدام الجيران..  
عبد المطيع : خير يا ست زينات.. واياه اللي جابك هنا..  
زينات : انت عملت جميل كبير قوى يا سى عبد المطيع..  
مش ممكن اتساه..  
عبد المطيع : وجيتى هنا إزاي؟..  
زينات : جوز بنتى.. خاله بيشتغل هنا كناس فى السجن..  
جبت لك فضلة خيرك شوية جنبه قديمه ورغيفين وطماطمتين..  
عبد المطيع : كتر خيرك..  
الحارس : يلا يا ست.. ما تودنلش فى داهيه..  
زينات : حاضر يا اخويا.. حاضر (تخرج زينات) فوطك بعافيه يا سى عبده..  
عبد المطيع : الله بعافيكى مع السلامة.. ياه الدنيا لسه فيها خير..  
بس ما جتش ليه أم بثينة ولا بثينة.. ولا فاطمه..  
معطوله.. لازم أكيد ماتعين الزياره عنى.. ماهى الست زينات عندها واسطه.. كناس السجن حاجه جامده برضه... لكن الفقير اللي زى مالهوش

واسطه.. لما اتام واريج جتتى.. يا ترى انت عامله  
إيه من غيرى يا فاطمه..

(بنام عبد المطيع ويحلم بدخان.. يبدأ استعراض  
الحلم مع ظهور الدخان.. أضاءه زرقاء يحلم بأن  
فاطمه قادمة تناديه بثوب ملائكي ومعها ملائكة  
يلبسون أثوابا جميلة تغنى معه ويغنى معها وتظهر  
فجأة فى الحلم أم بثينة نفيسة وهى تمسك عصا فى  
يدها وتهجم عليه وعليها وتقول لها يا خطافة  
الرجاله)

(الاستعراض كلماته بين الحب والمرح عبد المطيع  
يقول لفاطمه احبك زى المنجه وتقول له احبك يا  
جارى.. يا حلمى ونارى.. وأم بثينة تقول حوشوا  
عنى خطافة الرجاله الحراميه.. ويستيقظ عبد  
المطيع من الحلم على عبد السميع وهو يجذبه هو  
ومرسى ويخلعان ملابسهم ويلقيانه فى السجن  
وتبتعد فاطمه عنه بشده.. ينتهى مشهد الحلم وهو  
نائم فى السجن)

عبد المطيع : حرام عليكم.. أنا برئ.. أنا برئ..  
كمال : (يوقظه) مالك يا بطل.. فيه إيه يا زعيم؟  
عبد المطيع : بلاش زعيم.. مشيوا يا فاطمه أنا جنبك.. يا  
فاطمه.. أنا فين؟

كمال : أنت هنا فى سجن القلعه..  
 عبد المطيع : اللهم ما الخزيك يا شيطان..  
 كمال : وصلتنا أخبارك الحلو..  
 عبد المطيع : انت تعرفنى!؟  
 كمال : طبعاً أعرفك.. البطل عبد المطيع.. وعشاق كده  
 إحنا اخترناك تبقى معنا..  
 عبد المطيع : نعم.. بتقول إيه؟  
 كمال : إحنا اخترناك..  
 عبد المطيع : انتم مين؟  
 كمال : إحنا رجالة السلطان سليم الأول بتاع استامبول..  
 عبد المطيع : إزى سليم وإزى أبوه.. وإزى امه..؟  
 كمال : دمك خفيف..  
 عبد المطيع : وانت دمك ثقیل..  
 كمال : عاوز نطلع لك أمر الفراج.. يطلع حالا.. رجالتنا  
 كثير جوه القصر..  
 عبد المطيع : أبوس راسك.. طلعنى..  
 كمال : بس على شرط..  
 عبد المطيع : أنا موافق..  
 كمال : لازم تعرف.. الحل هو العثمانيين..  
 عبد المطيع : صح.. الحل هو العثمانيين.. حتجوزنى فاطمه؟  
 كمال : سهله قوى..

- عبد المطيع : وتخطفوا لى نفيسة..
- كمال : بسبطه قوى..
- عبد المطيع : بلاتش الصقويين وبلاتش الفرنسين.. الحل  
العثمانيين انتم عايزين تصلوا إيه..؟
- كمال : العثمانيين هم اللي لازم ياخدوا مصر..
- عبد المطيع : صح ياخدوها.. بس ياخدوها إزاي..؟
- كمال : ياخدوها..
- عبد المطيع : مش فاهم.. تاكل سريس وجبنه قديمه..
- كمال : انت باين عليك غويط قوى (بتركه)
- حمدان : (باتيهار) يا أخ عبد المطيع.. يا أخ عبد المطيع.. يا  
أخ عبد المطيع.. أنت الآن أمام مسئوليه تاريخيه  
ودينيه.. وأمام الله مسئول عن شرح القضيه  
للناس..
- عبد المطيع : صح.. بس اتهو ناس..؟
- حمدان : عاجبك الممالك.. عاجبك اللي بيعمله السلطان  
قتصوه القورى عاجبك والعايز بالله الحانات  
وشاربى الخمور.. عاجبك الفساد.. عاجبك عمال  
الممالك فى القصور.. ما الحل..
- عبد المطيع : سهله.. الحل يا سيدى الفرنسيين..
- حمدان : استغفر الله.. شاربى الخمور ولاعبى الميسر..
- عبد المطيع : بلاتش الفرنسيين.. الصقويين..

حمدان : استغفر الله..  
 عبد المطيع : مش عاجبك الفرنسيين.. ولا الصقليين بلتش..  
 يبقى الحل عند سليم بتاع الجين الاستامبولي..  
 حمدان : لأ.. اعوذ بالله.. دول الاتراك.. لا يا أخ عبد  
 المطيع..  
 عبد المطيع : آه ياترى يا ولادى عندكم اكل ولا لأ..  
 حمدان : على كل حال إخوانا عطينا ولادك فلوس وهدوم..  
 وانت لازم تكون معنا إن شاء الله.. وحنقرج عنك  
 بعد دقائق بس قول آه..  
 عبد المطيع : آه..  
 حمدان : الحمد لله.. الان فهمت يابنى ان الحل هو الحنابلة..  
 لا لخروج النساء (يسرد خلفه) لا للخمرات.. لا  
 للفساد.. لا للرشوة..  
 عبد المطيع : لا للخمرات.. لا للنساء.. لا للرشوة (عند الباب  
 مناديا الحارس) خدوني طلعوني.. أنا عايز اخرج  
 من هنا واسيب المكان ده فى الحال.. أنا تعبت من  
 كل الكلام اللي حوالى.. مش عارف أى كلمة ولا  
 أى حاجة.. كله عايزنى معاه ومحدث عارف أنا  
 عايز إيه.. اروح فين..  
 الحارس : (يدخل) عبد المطيع.. عبد المطيع.. عبد المطيع..  
 عبد المطيع : نعم..

- الحارس : إفراج..
- عبد المطيع : أنا إفراج.. إفراج.. أنا طالع (يرتدى زيا أسود)  
(ينقلب الديكور.. عبد المطيع يجد نفسه فى زفة  
اولاد البلد التى يقيمها الزعراية أمام السجن)
- عبد المطيع : فين.. فين فاطمه.. فين نفيسة.. فين بثينة.. فين  
العيال.. فين عبد السميع.. ماحدش مستينى..
- عكروت : (رئيس الزعران) إحنا اللي مستينك إحنا شطار  
القاهره وهنعم لك احتفال على طريقتنا يا زعيم  
(يحملونه) إحنا الحل.. أبوه إحنا الحل..
- عبد المطيع : جاكو حل وسطكم أنا مش فاهم حاجه.. الحل إيه؟  
العثمانيين.. الحنايله.. الفرنسيين الانجليز  
الزعران.. كل دا علشان ليست جلابيه بيضه..  
ادبنى ليست جلابيه سوداء.. الأسود هو الحل وان  
معجبكوش أقعدوا مع بعض علشان تقولوا لى..  
الحل إيه؟
- عكروت : الحل هو مرجان تشرب وتصهلل وتفن يلا بينا.. يا  
زعيم
- عبد المطيع : اتنوا كمان عابزينى (وهو مندهش مما يدور حوله)
- عكروت : عاش البطل عبد المطيع..
- الجميع : عاش البطل عبد المطيع..
- عكروت : يلا يا ولاد على حانة مرجان..



- الجميع : على حانة مرجان.. بلا يا شطار.. بلا يا زعران  
على حانة مرجان..
- (يتحول الديكور إلى حانة مرجان وعند خروج عبد  
المطيع مع المظاهره التي استقبلته من الزعران  
كلهم يرتدوا ملابس بيضاء وهو يرتدى ملابس  
سوداء.. يظهر راوى ١ وراوى ٢ والمتنادى)
- المتنادى : مرسوم.. مرسوم.. يا أهلى القاهره.. تم بحمد الله  
وبعون الله شفاء عين السلطان فتصوه القورى  
اقيموا الاحتفالات.. والليلي الملاح واقيموا الافراح  
والزينات وارتنوا الملابس البهيجه وارموا ملابس  
الحداد اللعينه..
- راوى ١ : ما سمعش المرسوم عبد المطيع..
- راوى ٢ : أبوه كل البلد سمعت وهو طالع من السجن لابس  
أسود..
- راوى ١ : وكان فرحان ومبسوط.. افكروه متمرد على  
السلطان.. لأنه خرج من السجن لابس أسود  
والناس لابسه أبيض..
- راوى ٢ : والزعران أخذوه على حانة مرجان يا سلام أفس  
وفرشه ونعشه
- راوى ١ : شئ ولا فى الاحلام..
- راوى ٢ : واتفرج يا سلام..



### المشهد الثالث

#### (الحانة)

(فى مدخل الحانة كتب خانة مرجان.. للأفس  
والأمان.. فى اليسار يجلس إدريس تاجر العبيد  
ومعه جارية جميلة.. ويجلس ايضا فى اليسار ابن  
الزمان الشاعر المخمور.. وتجلس معه بوسة  
تاجرة النساء وصاحبة الدور الثانى من الحانة  
ويجلس تاجر الحشيش قرنفل ويجلس حكيم المؤرخ  
الاسباني الذى جاء للقاهرة لبحث عن دعم قنصوة  
الغورى للمسلمين فى الأندلس.. يقف مطرب يقف  
ومعه مطربة فى اليمين وعلى منصة متواضعة  
ومعهم العود والإيقاع والناس وبعد الأغنية)

ابن الزمان : (يقف وفى يده الكأس) سمع هس يا بلد تحب الزمر  
والرقص والمغنى.. والشاعر عندكم مالوش معنى..

اسمعوا قصيدة لى

المجموعة : قول يابن الزمان قول..

ابن الزمان : أبوس ايدك يابلى ولا تبوس ايدى..

فى الصعب ما أفوتك.. فى الصعب تفوتينى..

نستايا يا بلدى... نستايا الإخلاص

نستايا يا بلدى... نستايا أشرف ناس

أكتبى تاريخك تاتى.. وعيدى كتابة الاسامى  
من أحضان التراب.. لأعلام البلاد  
أبوس ليدك يا بلدى  
(يدخل الزعران وعكروت يحملون عبد المطيع)  
عكروت : عاش عبد المطيع.. عاش عبد المطيع  
بوسة : (تقوم تجرى إلى عكروت) مين ده يا عكروت مين  
المدھول ده؟  
عكروت : هش.. ده أجدع راجل فى مصر والشام والعراق..  
ده عبد المطيع اللى قال للسultan لأ..  
بوسة : تشرفنا يا عم لأ.. عارف أنا مين !! أنا بوسة..  
عبد المطيع : نعم..  
بوسة : بوسة..  
عبد المطيع : عيب يا ست الكلام ده.. بوسة..!! أول مرة  
تشوقينى عايزة بوسة؟  
عكروت : ده أسمها بوسة.. مش هى عايزة بوسة..  
بوسة : أنا بطلت.. عجزت يا أسمك إيه.. لكن لو لك مزاج  
يعنى.. مايعرض..  
عبد المطيع : لأ.. يضر.. أنا هربان من نفيسة.. القى بوسة..  
بوسة : (تهمس له) عندى قمرات فوق (تهمس) فى الدور  
الستاتى.. أنا مأجرة الدور الأول والتاتى.. الدورين  
من مرجان.. مشغلاه لحسابى..

عبد المطيع : وفين مرجان ده؟  
عكروت : أهوه قساعد هناك أهوه.. (تشير إلى رجل بشارب كبير)  
عبد المطيع : وهو عارف أنك مشغله الدور الفوقاني بوس..  
وعلى شنابه يقف صقرين.. وعلى كتافه يقف سبعين.. يا حلاوة الزين يا حلاوة الزين.. على مرجان أبو قرنين..  
بوسة : ضحككتي يا اسمك إيه..  
عكروت : عبد المطيع.. ياعيش..  
الجميع : ياعيش.. يا عيش..  
بوسة : طلبات الزعيم عبد المطيع على حسابي..  
عكروت : عيب يا بوسة.. ده ضيف الزعران الليلة دي.. أتتى بكره..  
عبد المطيع : هو لسه فيه بكرة..؟  
عكروت : الاحتفالات أسبوع.. اسبوع كامل حتقعد فى حانة مرجان.. ليل ونهار رقص وغنا.. ويحي لك الناس وبعدين نوصلك بالسلاطة لببتك يا زعيم..  
عبد المطيع : لأ.. أسبوع كتير.. فاطمة وبثينة يزعلوا.. ونفوسة كمان..  
بوسة : عكروت يا عكروت.. هو لابس اسود ليه..؟ هو ناسى الفرمان ولا إيه..

- عكروت : سيبه هو كده.. هما يقولوا ابيض يلبس اسود..  
يقولوا البس اسود يقلبها ابيض.. هو الزعيم اللي  
قرر يقول لا للسلطان.. إحنا مانقدرش نخالف  
أوامر السلطان.. إلا هو.. اللي يقدر.
- إدريس : (يدخل ويمسك في يده همسة فتاة ١٨ سنة)..  
مساء الخير يا زعيم..
- عبد المطيع : أهلا وسهلا..
- إدريس : أقدم لك أحلى بنت.. همسة.. ١٨ سنة تعرف تغني  
وترقص وتطبخ.. وتتقف.. وتعمل كل حاجة.
- عبد المطيع : أهلا وسهلا يا ست همسة.. أهلا يا بنتي..  
(يضحكون) مالكم بتضحكوا على إيه..؟
- عكروت : ده إدريس تاجر العبيد.. ودي جاريته عايز بيعها  
لك..
- عبد المطيع : دي جارية..؟
- عكروت : آه..
- إدريس : وأنا ح أكرمك في التمن عشان عكروت.. بـ  
١٥٠ دينار وبالتقسيط كمان ولا تزعل.. المهم  
رضاك علينا..
- عكروت : ده سعر تمام.. أشتريها وأنا أبعتها لك بألف دينار  
بعد شهر لما تزهر منها بألف دينار..
- عبد المطيع : بتبيعوا بنى أدمين يا إدريس..

- إدريس : دى تجارة.. أنا تاجر..  
عبد المطيع : لأ.. أنت فاجر.. وعاهر.. تخطف العيال والبنات  
وتبيعهم وتقول تجارة.. ماعندكش عيال..  
ماعندكش رحمة.. ماعندكش دين ولا  
إنسانية.. ماعندكش قلب..
- إدريس : جرى إيه يا عكروت.. ماله الزعيم.. زعلان منى  
وإلا إيه؟  
عكروت : ماتخدش على خاطرك لسه ماشرش الكاسين..  
هات ياولد المشروب للزعيم.. هات يا مرجان..
- مرجان : حاضر.. أنا جاي بنفسى (يدخل مرجان يحمل فى  
يده المشروب) أحلى شراب للزعيم عبد المطيع..
- عبد المطيع : إيه يا مرجان.. على شتاك بيقفوا صقرين.. وعلى  
كنتلك يقفوا سبعين.. وعلى رأسك يقفوا قرنين.. يا  
حلاوة الزين.. يا حلاوة الزين..
- مرجان : أشرب..  
عبد المطيع : أشرب.. (ياخذ كاسا و يشربه.. فيصاب بالفزع) إيه  
ده..؟ إيه ده..؟
- عكروت : ده أحلى وأغلى مشروب فى الوجود..  
عبد المطيع : دى نار..
- مرجان : نار يا حبيبي نار.. (بطبلون ويرقصون)  
عبد المطيع : أنا مولع..

- عكروت : (يمسك كاس آخر) طفيها بالتأتى..
- عبد المطيع : هات.. (يشرب) إيه ده..
- ابن الزمان : حتى أنت حولوك.. حتى أنت غيرونك..
- يا صاحب القلب الأبيض.. والحزب الأبيض..
- لحقوا يعكرونك..
- عبد المطيع : مين الأخ ده؟..
- عكروت : ده الشاعر ابن الزمان.. شاعر غلبان.. كحيان ساكن فى القسطنطين.. وطويل اللسان وببشتم فى الحكام.. والسلطان غضبان عليه.. قاعد يسكر ليل ونهار ويقول لده قصيدة.. وده قصيدة.. كل قصيدة بكاس..
- ابن الزمان : كل قصيدة بكاس..
- عبد المطيع : يازمن محتاس.. وأهوك اسمه عباس (بضحكون)
- عكروت : (يقدم كاسا) كمان كاس يازعيم..
- عبد المطيع : هو ده يضر..؟
- عكروت : لأ.. ما يضرش..
- عبد المطيع : أمال بيلسع ليه..؟
- عكروت : من حلاته..
- عبد المطيع : هات (يشرب.. ينتظر.. يجد شخصا جالسا فى هدوء) أنت ما بتشرىش ليه؟ لاقدامك أكل ولا شرب.. ما عندكش فلوس ادوله أكل وشرب..



- عكروت : أمرك يا زعيم... (يشير إلى مرجان) هاتوا الشراب والطعام..
- حكيم : اشرب إزاي واهلى بيندبحوا فى الأندلس.. ألوف من الناس بتندبح ألوف المسلمين بتندبح فى الأندلس.. والمسلمين بالملايين متشردين.. ومشنوقين.. وجيت للسلطان فتصوة الفورى ماعرفتش أقابله.. خلصت فلوسى.. ورسالتى قطعوها ورموها.. كل الدول العربية الإسلامية بعنت رسائل تشجب وتستنكر.. وفى بلدكم رفضوا وقتلوا لى.. أنت جاي تعمل فتنة فى البلاد..
- بوسة : أبوك السقامات.. (يضحكون)
- عبد المطيع : استنى يا بوسة.. لما أفهم حكاية الراجل ده..
- بوسة : عيون بوسة.. قلب بوسة.. سكت أهه..
- عبد المطيع : إزاي يا عكروت الحكاية دى؟
- عكروت : الناس كلها فى مصر متضايقه من اللى بيجرى فى الأندلس.. بس نصل إيه..؟ إذا كان المماليك ساكتين وطلعوا بيقات.. يقولوا إحنا زعلانين ومش ساكتين وحزناتين..
- عبد المطيع : يعنى إيه..؟ السلطان مش فاضى.. وإحنا قاعدين..
- هو السلطان شغلته إيه؟
- الجميع : هو السلطان شغلته إيه؟

- قرنفل : السلطان شغلته بشوف مزاجنا وبروقنا وبراعى  
مزاج شعبه..  
عبد المطيع : أنت مين...؟  
قرنفل : (هامسا) قرنفل تاجر المزاج.. وصاحب السلطان..  
عبد المطيع : قرنفل تاجر المزاج.. وصاحب السلطان!..  
قرنفل : قرنفل تاجر المزاج اللذيذ.. إذا قلت مزاج قرنفل..  
قالوا أحنى مزاج.. وبصراحة السلطان بتاعنا أجدع  
سلطان شافه بر مصر قنصوة الغورى.. إحنا مالنا  
ومال الحرب.. طول عمرنا بنحارب علشان غيرنا..  
ليه.. أهو جالنا سلطان مروقتا وشايف مزاجنا..  
نزعل منه...؟  
الجميع : لأ..  
عبد المطيع : لأ.. نزعل..  
قرنفل : ليه...؟  
عبد المطيع : علشان.. علشان مايصحش عبد السميع ياكل لحمه  
وأنا مأكلكش لحمه.. أزعل منه علشان الناس دول  
بتتوع الأندلس.. وأزعل منه علشان سايب أديس  
يخطف العيال وجاى على الغلبان اللى اسمه عبد  
المطيع (يترك قرنفل ويذهب لعكروت) أنا قلقان من  
الراجل ده (يقصد قرنفل).  
عكروت : أدبجهولك دلوقت يا زعيم..

عبد المطيع : لأ.. الديح لأ.. وبعدين إيه حكاية يا زعيم..  
عكروت : انت دلوقت الزعيم.. إحنا عايزينك معنا..  
عبد المطيع : بابنى أنا ما أعرفش أسرق ولا أنط على الأسوار  
زيكم..  
عكروت : أنت دلوقت نجم القاهرة..  
عبد المطيع : لأ.. أنا قمر.. فاطمة بتقول كده.. يا قمر..  
عكروت : فاطمة مين.. مراتك..؟  
عبد المطيع : هاتبقى مراتى.. بس أبوها معصلج شوية..  
عكروت : أخطفها لك يا زعيم..  
عبد المطيع : يخرّب عقلك.. سهل كده تخطفها..؟  
عكروت : تحب أمتى.. الليلة دى..؟  
عبد المطيع : باراجل.. أنا بأهزر..  
عكروت : خلاص يا زعيم أتلفتنا.. أنت الزعيم الكبير.. وأنا  
أساعدك..  
عبد المطيع : تساعدنى على إيه..؟  
عكروت : السرقة.. سرقة الأمراء و الأغنياء و التجار..  
عبد المطيع : وتوزعوا اللي تسرقوه على الفقراء..  
عكروت : فقراء مين يا عم.. الفقراء كمان نسرقهم..  
عبد المطيع : تسرقوا كمان الفقراء.. هما عندهم حاجة تتسرق..  
عكروت : آه.. بنهجم كل يوم على سوق شكل.. ونسرق اللي  
بائع حمار.. واللى بايع قمح..

عبد المطيع : تسرقوا كل الناس..  
عكروت : لو عايزنا نسرق القاهرة كلها نسرقها..  
عبد المطيع : تسرقوا الناس ليه؟  
عكروت : ماهى الممالك بتسرق وحلميها حراميهها.. اشمعنى  
إحنا الزعران.. لقينا الحل هو السرقة فى البلد  
دى.. مادام الكبار بيسرقوا..  
عبد المطيع : وتسرقوا إيه بقى..؟ وتسرقوا مين؟  
عكروت : خلق الله..  
عبد المطيع : يعنى الفقراء بيتسرقوا من الممالك.. وبيتسرقوا  
من الزعران.. يروح فين الغلمان فيكى يا مصر..  
يروح فين..!!؟  
عكروت : عاش عبد المطيع الزعيم..  
الجميع : عاش عبد المطيع الزعيم..  
بوسة : رقصنى مع الزعيم..  
عكروت : رقصها مع الزعيم.. وغنى غنيوة فرايحى شوية..  
تشيل النكد..  
(موسيقى وغناء.. يظهر الراوى مع تجميد المشهد  
أثناء الرقص)  
الراوى : كان السلطان قنصوة الغورى.. فيه خصلتين.. إنه  
يجيب صاحب خزنة المال ويقول أنا عايز مائة ألف  
دينار فى يومين.. اتصرف.. أو يجيب حد من

التجار ويطلب منه ميت ألف دينار.. وإذا ما  
جهز الفلوس يقطع رقبتة.. مافيش هزار..  
يالدفع بالموت.. وكان فيه خصلة تانية لما يموت  
حد من الأغنياء أو التجار أو الأعيان أو المملوك  
يكون هو الوريث رقم واحد له نص الورث والباقي  
يتوزع على الورثة.. بصراحة كان مش فاضى .

(يتغير الديكور)



#### المشهد الرابع

(منزل عبد المطيع.. تجلس فاطمة أمام منزلها  
وكذلك عبد السميع وبثينة والكاشف.. الجميع  
يرتدون ملابس سوداء)

- فاطمة : ياسيد الرجالة.. غايب وسايبنا ولا نعرف عنك  
خبر..
- أم بثينة : بتتكلمي عن مين باشاطرة..
- عبد السميع : عن خالها عبد الستار..
- أم بثينة : خالك مات يا حبيبتي من عشر سنين..
- فاطمة : أنا حرة.. أتكلم عن خالي وقت ما أنا عازمة..
- أم بثينة : أنت فين يا أبو عيالي.. ياسمعي.. (تتصنع البكاء)
- فاطمة : يا طيب القلب..
- أم بثينة : (تتوقف عن البكاء) مين ده اللي طيب القلب..
- فاطمة : خالي..
- عبد السميع : خالها عبد الستار الله يرحمه..
- أم بثينة : ما تتكلمي يا بثينة..
- بثينة : آه يابه.. الناس سابتنا ولا سألت فينا.. ياترى أنت  
حي ولا ميت..
- عبد السميع : ما إحنا معاكى أهو يا بنت.. يا ست أم بثينة إحنا

مقصرون فى حاجة.. والله أنت ست طيبة.. وأم  
فاطمة الله يرحمها كانت دائما تقول أم بثينة ما فيش  
منها..

أم بثينة : أبعدوا عنا انتوا بس عشان نستريح..  
فاطمة : الجار للجار يا بثينة يا حبيبتي..  
الكاشف : متشكرين قوى يا ست فاطمة على الروح الحلوة  
دى..

بثينة : (تقلده) متشكرين قوى يا ست فاطمة على الروح  
الحلوة دى.. وأنت مالك أنت.. تدخل فى كلام  
السنات ليه؟!

الكاشف : يا بثينة.. أنت زعالة ليه بس..؟

بثينة : مش زعالة ولا حاجة..  
(يدخل مرسى ووالده)

مرسى : السلام عليكم..

الجميع : وعليكم السلام ورحمة الله وبركاته..

أم بثينة : أنت جيت يا مرسى أنت وأبوك..؟

أبو مرسى : (يقدم لها بعض اللقافات) خدى يا أم بثينة (يبكى)

أم بثينة : إيه ده يا أبو مرسى بتعيط ليه..؟

أبو مرسى : دى لحمة ورز وملح ودقيق عشان تصلى قرص  
تظلمى القرافة.

أم بثينة : قرافة.. قرافة لما تفرطك انشاء الله أطلع القرافة



- مرسى : الحق علينا ياأبا.. خذ الكفن اديه لواحد غلبان ميت..
- أم بثينة : يالتهوى.. كفن لمين.. قول اتكلم.. انطق سببت ركبى..
- مرسى : بصراحة إحنا جايين نقول لكم إن عبد المطيع رحنا له السجن نقدم له تنازل عن القضية ونعمل الواجب ونفرج عنه.. قالوا لنا ده خرج.. خرج إزاي يا إخواننا ؟ مش عارفين.. خرج إمتى؟ من أسبوع.. شوفنا الدفاتر مالقتناش اسمه.. سألنا عنه.. قالوا مجاش وماحدث شافه.. فسألنا واحد من العسس المخبرين.. قال مادام اسمه مش فى الدفاتر..
- أبو مرسى : سبقوا قتلوه ودفنوه.. الباقية فى حياتكم.. (يمسك ورقة) والله أدى الورق أهه والتنازل عن القضية..
- أم بثينة : يامصيبتى.. ياخرابى.. بتقول إيه.. عبد المطيع مات..!
- بثينة : يالتهوى يا أبا.. يا حبيبى ياأبا.. يا عقلى ياأبا..
- أم بثينة : عبد المطيع مات.. (يغمى عليها)
- بثينة : يا أمه.. يا أمه.. الحقونى يا ناس..
- فاطمة : الوليه بلوى عليها ماتت..
- عبد السميع : دخلوها عندنا الدار وشممها بصله..

(يحملها كلا من فاطمة وبثينة للدار)

- بثينة : عيني علينا.. سلامتك يا أمه..  
عبد السميع : لاحول ولا قوة إلا بالله.. الرجل مات أمتي يا أبو مرسى
- (يقف عبد السميع بين مرسى وأبو مرسى)
- أبو مرسى : مات من أسبوع.. يعني أنت من دلوقت لازم تفكر وتقرر إنك تجوز فاطمة لابني مرسى.. وأنت عارف اللي بيدخل السجن اليومين دول مابيطلعش منه.. وسألنا عليه قالوا خرج من أسبوع... طيب هو فين أنت عارف.. اسمع البكا على الحى وأنا محتاج لك.. يا عبد السميع محتاج لك قوى..
- مرسى : وأنا زى ابنك وخدأملك.. كل الفلوس اللي عندي.. حرير وأصواف.. وأصحابى المماليك وكبار الأعيان أنا أبيع لهم قماش.. وأبويا يفصله.. وأنت توزعها..
- أبو مرسى : أنا عارف إنك محتاج فلوس.. ومحتاج واحدة ست.. ولما فاطمة تتجوز البيت يفضى لك وتتجوز أنت كمان..
- عبد السميع : أتجوز مين؟  
مرسى : أتجوز نفيسة.. أهي جارتك وعارفك.. والدار جنب الدار..

- عبد السميع : بس دى عندها عشر عيال..
- أبو مرسى : ولا يهملك نشغلهم فى السوق.. اللى عند خياط..
- واللى عند نجار.. واللى عند جزار.. والباقي
- يشحت.. يجيبوا لك فلوس يأما.. عيل توقفه عند
- الحسين وعيل عند السيدة زينب..
- مرسى : نقرأ الفاتحة يا أبو فاطمة بقى..؟
- عبد السميع : بس.. يا جماعة..
- أبو مرسى : (مقاطعا) مايشش ولا حاجة.. أدى خمسين دينار
- مهر المحروسة بنتك فاطمة..
- (يتركهم ويدخل)
- (يدخل أبو مرسى وعبد السميع للدار)
- عبد السميع : مهر بنتى ميتين دينار يا مرسى.. سامع..؟
- مرسى : خلاص ماشى الكلام إدي له يا أبه الفلوس..
- أبو مرسى : موافقين (يعطيه النقود)
- عبد السميع : نقرأ الفاتحة بكرة..
- مرسى : عن إنك.. رايحين نجيب شوية قماش وراجعين
- (يخرجان) (تظهر فاطمة)
- فاطمة : الولية نامت فى سرير أمى..
- عبد السميع : خليها تنام فى السرير تدفى شويه.. أحسن السرير
- يطلع من يوم ما ماتت أمك..
- فاطمة : عبد المطيع مات يا أبه.. ماتملنيش العذاب..

عبد السميع : اسمعى يا فاطمة.. كل الناس حتموت يا بنتى وانتى لازم تفكرى فى مستقبلك.. مرسى طلب ايدك.. وأنا موافق..

فاطمة : مرسى ده يا ايه راجل فلاتى..

عبد السميع : الراجل ما يعيبهوش الا جيبه.. مرسى معاه بدل الدينار ألف.. وح يملك دار فى الوراق على النيل.. وأنا خلاص عطيتك كلمة والخميس الجاى فركك..

فاطمة : ليه يا ايه عملت كده..؟ إيدنى فرصة أسبوعين على الأقل.. ولا حتى شهر لحد مايربعن عبد المطيع على الأقل علشان مراته وولاده .

عبد السميع : يا بنتى أنتى بتكبرى.. وأنا عطيت كلمة خلاص..

فاطمة : يا ايه أدينى فرصة..

عبد السميع : خلاص.. انتبهينا.. روحى ادبحى كام فرخة للعيال..

فاطمة : انهوا عيال..؟

عبد السميع : عيال نفيسة يا فاطمة.. مش دول بقوا يتلمى دلوقتى وأنا زى أبوهم..

فاطمة : ده إيه الحنية دى كلها.. وبعدين فيه ناس كتير عطيت لعياله فلوس وهدوم وحاجات ومحتاجات..

عبد السميع : اعملى اللي باقى عليك عليه.. (يدخل مرسى) بسرعة..

مرسى : يا أبو فاطمة..  
عبد السميع : تعالى يا مرسى.. شوقيه يا فاطمة ده عايز يكلمك..  
(يتركهم ويخرج)  
مرسى : إزيك يا فاطمة.. (تخرج فاطمة)  
فاطمة : إزيك يا مرسى.. عايز حاجة..؟  
مرسى : خدى الكلام دينار دول واشترى بيهم حاجات لولاد  
عبد المطيع.. وخدى.. دول كام حقة قماش وزعيمهم  
عليهم.. أعملى لهم فساتين وقفاطين.. مهما كان  
الله يرحمه كان جاركم العزيز..  
فاطمة : إيسه الحنيه دى كلها.. ده أنت كنت بتتخاتق مع  
أبوهم ودخلته السجن اللى مات فيه..  
مرسى : أصلك ماتعرفيش ولاد البطل الشهيد عبد المطيع..  
ده كان زى أخويا..  
(تدخل بثينة تبكى)  
بثينة : استريحت يا مرسى.. أهو مات ائلى كان مزعلك..  
مرسى : والله أنا كنت متنازل عن القضية.. وعايز أطلعه..  
والله والله..  
بثينة : (مقاطعة) ماتحلفش بالله أبويا لما كان حى.. ما  
كانش حد يدفع له ولا درهم دين عليه.. ولما غاب  
شسوفنا نساك ماتعرفهاش.. نطرح أشرابنا وأخير..  
كلهم جايين وجايبين صواتى أكل وقماش وفلوس..

- مرسى : إحنا أهل برضه يا بثينة..
- بثينة : أنهوا أهل.. اللي داسوا أبويا.. أبويا ملكتش
- حرامى يا مرسى..
- الكاشف : (يدخل) أيوه الحرامى يا مرسى اللي بياخد بيوت الناس ويعملها مدارس ومستشفيات.. ويقول دى أعجال وأفعال خير.. الحرامى الحقيقى يا مرسى اللي بيسرق أرض الناس ويبنى عليها جوامع.. ويبقى راجل صالح قدامهم وهو حرامى..
- مرسى : أنت بتقصد السلطان فتصوة الغورى يا كاشف.. عن إندك يا فاطمة لما أروح أتفق مع مفرى.. يقرأ ربع والأربعين على روح الله برحمه..
- (يخرج)
- الكاشف : استنى.. استنى.. حتعمل إيه.. لما آجى معاك؟؟
- (يخرج خلفه)
- بثينة : كنت واقفة معاه بتقولى إيه يا فاطمة..
- فاطمة : مرسى طلبنى من أبويا..
- بثينة : وانت والفقى؟
- فاطمة : أعمل إيه.. قدامى إيه..؟
- بثينة : أنتى مش كنتى حتجوزى أبويا وبتحبيه.. ما صدقتى إيه مات وحتجوزى مرسى..
- فاطمة : أبوكى.. ده كان زى أبويا..

- بثينة : لا.. ماكنتيش بتقولى كدة..
- فاطمة : ماكنتيش أقدر أموت حلمه قدامى.. وهو بيحبنى وطاير بى.. كان يصحى بدى عشتانى ويحلق دقنه.. ويغنى.. ويستناتى لما أطلع من الشباك.. لو قلت له أنت عجوز وزى أبويا كان ضاع فيها.. أنا كنت الشمعة الوحيدة اللي منورة فى حياته.. هو قال لى كده..
- بثينة : يا حبيبتي يا فاطمة.. (تحضنها)  
(فيد آوت)  
(ضوء على الراوى)
- الراوى : فى عهد السلطان الأشرف أبو قنصوة الغورى.. حصلت العجايب والغرايب.. أمير اسمه مصر باى.. حاول مع عشرين من المماليك عمل انقلاب على السلطان قنصوة.. ولكن فشل الانقلاب.. وقال مؤرخو السلطان مات الكفرة.. وكان الله مع السلطان..
- الراوى ٢ : وحكاية تانية عن ناصر الدين بن الصفدى.. ناظر بيت المال يعنى وزير الخزانة.. طلب منه السلطان فلوس.. فكرر الراجل واحتار.. مافيش فلوس فى بيت المال.. ولو قال للسلطان الكلام ده حايروح فى داهية.. فاتتحر بأنه بلع فص من الماس.. ناس

تموت بالماس.. وناس تموت بالجوع.. وفى نفس  
اليوم خرج فيه عبد المطيع من الحانة إلى البيت..  
نسى عبد المطيع إن نزل فرمان يقول اليه  
أبيض.. وماتلشوش أسود.. لكن صاحبنا مشى  
بهدومه.. السوداء فى أيامه السوداء..



## المشهد الخامس

(عودة لمنزل عبد المطيع)

- عبد السميع : (نفيسة تنشر الغسيل وعبد السميع يناولها الملابس) يا ست نفيسة اسمعنى..
- أم بثينة : اسمع إيه يا سى عبد السميع.. عيب الكلام اللي بتقوله ده.. الراجل لسه ميت..
- عبد السميع : مرسى حايستجوز البنت فاطمة الليلة دى.. وبدل ما أقعد لوحدى.. تقعدى معايا فى البيت تونسبنى..
- أم بثينة : بس الناس تقول على إيه.. أتجوزت وهى عندها عشر عيال..
- عبد السميع : الناس غاوية تتكلم عمال على بطل..
- أم بثينة : يا خويا.. والعيال حنوديهم فين..؟
- عبد السميع : فى الدار زى ما هم.. يناموا فى مكاتهم.. وآخر الليل تيجى عندى.. وألا أقول لك.. نفتح الدار دى على الدار دى.. ونوسع الدارين..
- أم بثينة : يا سلام عليك ياسى عبد السميع.. أما عليك دماغ.. فكرة..
- (تدخل زفة عريس وعروسة.. أم بثينة تزغرد.. طقوس والفراح.. العريس مرسى والعروسة

- فاطمة.. وأولاد عبد المطيع الصغير يفرحون ويرقصون.. تدخل فاطمة ومرسى الدار)
- أم بثينة : مبروك يا فاطمة.. مبروك ليكى  
(من الجهة الأخرى يدخل عبد المطيع ومعه زفة كبيرة وناس تسير خلفه..)
- الجميع : عاش البطل.. عاش البطل عبد المطيع..
- عبد المطيع : شايفين الناس محتفلة بى إزاي.. أنا مش مصدق.. أنا مش مصدق.. حتى بيت عبد السميع حواليه الزينة.. أنا فى حلم ولا فى علم.. يا نفيسة.. يا نفيسة..
- نفيسة : إيه ده.. ده صوت عبد المطيع..
- عبد السميع : عبد المطيع إيه؟ ده زمانه مات وشبع موت.. (تخرج وتفتح الباب)
- عبد المطيع : افتحى الباب.. (تفتح الباب)
- نفيسة : أنت حى.. مش ممكن.. مش معقول.. (يغمى عليها.. يستنדה عبد السميع)
- عبد السميع : (يرتبك) أنت عفريت أكيد.. قللوا إلك مت..
- عبد المطيع : عفريت فى عينك قليل الأدب.. شيل إيدك من على مراتى.
- (يذهب إلى نفيسة).. نفيسة.. يا نفيسة..
- عبد السميع : الحق يا مرسى.. الحق يا مرسى عبد المطيع حى

- عبد المطيع : فيه إيه.. (يختلى عبد السميع ويجرى الأولاد إلى أبيهم)..
- عبد المطيع : ولادى حبابسى.. ولادى.. شحيمر.. شيخون.. بلية.. دوقرم.. تعالوا فى حضنى.. بثينة فىن.. والكاشف..؟
- دوقرم : بثينة أتجوزت الكاشف يا با..
- عبد المطيع : أتجوزت.. عال.. عال.. ده فرحها..؟
- دوقرم : لا بابا ده فرح فاطمة ومرسى بابا.. بثينة أتجوزت الكاشف واتعاركت مع أمى ومشيت..
- عبد المطيع : فرح فاطمة ومرسى.. أنت بتقول إيه..؟ فاطمة ومرسى.. مش معقول..
- مرسى : (يخرج مرسى).. أبوه فرح فاطمة ومرسى.. عايز إيه يا عبد المطيع؟
- عبد السميع : (يقف معه) أبوه فرح مرسى على فاطمة يا عبد المطيع..
- عبد المطيع : فاطمة.. طيب هى فىن.. أكيد جوزتوها غصب عنها.. أكيد بعثتها يا عبد السميع.. فاطمة دى الحاجة الوحيدة الحلوة فى حياتى..
- أم بثينة : (تستيقظ) اظهر وبان يا بتاع النسوان.. الناس قالوا إنك مت واستريحنا منك.. إيه الذى جابك تاتى هنا..

عشبان تنكد على فاطمة يوم فرحها..

عبد المطيع : استنى استنى.. الناس قالوا إنى مت.. انهوا ناس؟

أم بئينة : مرسى هو الذى قال..

عبد المطيع : أنت يا مرسى الكلب.. قلت أنى مت (يذهب اليه)

مرسى : أوعى ايدك.. انت بلين عليك أتجننت وألا أتجننت..

عبد المطيع : وإيه الذى أنت لابساه ده يا نفيسة..

أم بئينة : خير رينا.. من ساعة ما جالنا خبرك والهدايا نازلة

علينا ترف. هدم للعيال.. وفساتين لبئينة.. وأكل

وشرب..

عبد المطيع : يعنى وأنا ميت.. أنتم عايشين أحسن من وأنا حى..

أم بئينة : دى الحقيقة.. ولو زعلت.. ازعل..

عبد السميع : من ساعة ما جانا الخير.. ورينا فرجها عليهم..

عبد المطيع : ياه.. ياه على النفوس.. ياه يا عبد السميع تجوز

فاطمة للخسيس مرسى؟!

مرسى : بالقول لك إيه.. متقلطش.. أنا بلحترمك أنت راجل

قد أبويا..

عبد المطيع : فاطمة.. آه.. مش معقول.. يا فاطمة.. يا فاطمة..

تعالى.. قولى لى إزاي باعوكى.. وإزاي وافقتى..

ماهم يبيبعوا مصر يا فاطمة للفرنساويين والإنجليز

والعثمانيين والصفاويين.. فاضل أنت كمان

يبيبعوكى.. ياه..

- مرسى : (يحدث عبد السميع) الرجل اتجنن.. أنا حا أروح أشوف أبويا يخلصنا منه..
- عبد السميع : يخلصنا منه إزاي.. الرجال حى.. الجوازتين حيتفرکشوا.. بدل من الأفراح حتتقلب أحزان.. وبدل ما يقتوا يا ليلة بيضا.. حيقنوا يا ليلة سودا..
- مرسى : سودة.. أنت مش شايف لابس إيه.. لابس أسود..
- عبد السميع : ده ماسممش الفرمان..
- مرسى : حسا أخلى أبويا يبلغ الزينى بركات فى الحال ونائب السلطان طومان باى ورئيس الشرطة وأخرب بيته..
- عبد المطيع : وآه ياظلمة.. يا فجرة.. ياقتلة.. أخذتم ولادى.. حتى نفيسة مش عايزاتى.. زعالة اتى رجعت والعيال قاعدين يقنوا.. وبثينة اتجوزت الكشاف ونسيت أبوها.. آه يا زمان غريب.. فين حمارى.. فين حمارى.. أنا عايز أشوفه وأتكلم معاه شويه.. يمكن يقول لى كلمة تريحنى.. فين الحمار يا نفيسة؟
- أم بثينة : الحمار من ساعة أنت ما مشيت.. وهو ماشى يدور عليك طول النهار ويرجع آخر الليل فى الدار ينلم..
- عبد المطيع : مش قلت لك.. وفسى.. مع إنه حمار.. صدقتينى دلوقت.. هو فين؟
- أم بثينة : مات يا عبد المطيع..
- عبد المطيع : إيه.. مات.. قتلته وبعثوا لحمه للكلابجى..

أم بثينة : إحننا لابهتنا لحمه ولا تقتناه.. هو اللي ماكانش راضى ياكل من إيد حد غيرك.. مائت اللي عودته على كده.. لحد ما مات..

عبد المطيع : فاطمة والحمار فى يوم واحد.. آه يا راسى.. أنا عايز أمشى.. عايز أروح عند الأهرام.. أنا هناك بعيد عنكم..

(يدخل أبو مرسى ورئيس الصكر وبعض الصاكر)

أبو مرسى : آهو.. لابس أسود..

رئيس الصكر : أنت تاتى برضه..

عبد المطيع : (ينظر لأبى مرسى) تاتى.. فيه إيه؟.. قولى فيه إيه؟..

أنتم تاتى تاتى يا أبو مرسى..؟

رئيس الصكر : (لأبى مرسى) الراجل ده مش وطنى وضد السلطان.. لكتاتى مرة تتحدى السلطان وتلبس ملابس سودا وأنت عارف أننا أصدرنا فرمان بعدم ارتداء الملابس السوداء وكافة الأحزان..

عبد المطيع : أصدرتم فرمان تاتى.. ماحدثش قال لى..

رئيس الصكر : مشاكل ومخالف المرة دى حتقطع رقبتك قدام السلطان.. عبرة لمن يرفض المثول لأوامر السلطان.. شدوه..؟

(أثناء شد الصكر له.. تدخل بثينة والكاشف)

بثينة : أبويا.. أبويا.. أنت حى؟!!

عبد المطيع : لحد دلوقت حى.. بس بعد ساعة ممكن أموت بجد  
يا بثينة..

الكاشف : هما ماسكينك ليه..؟

عبد المطيع : من تهمة لتهمة يا قلب لا تحزن..

الكاشف : هو أنت لحقت..

عبد المطيع : التهم جاهزة بس اللى يشيل..

الكاشف : يا عصى أنا مش عارف أقول لك إيه..؟ ولا أعمل  
إيه..؟

عبد المطيع : ماتصلش حاجة.. العمل عمل الله.. خللى بالك من  
بثينة.. وماتزورش حملتك كتير..

بثينة : أنا اتلفتت مع الكاشف يا أبه أن أول عيل حا أجيبه  
حا أسميه عبد المطيع..

عبد المطيع : لأ.. لأ.. يا بنتى سميه عبد القوى.. عبد القوى  
المصرى..

رئيس الشرطة : ياللا.. اتفضل امشى قدامنا..

بثينة : يا أبه.. يا أبه

(يخرج عبد المطيع مع الشرطة والعسكر)

(أغنية قصيرة جدا تعبر عن سوء حظ الإنسان فى  
زمن تعبان. يتغير الديكور إلى قصر قنصوة  
الغورى)

### المشهد الأخير

(يجلس عبد المطيع فى مقدمة المسرح.. خلف  
السلطان قنصوة الغورى.. طومان باى.. رجال  
الصفويين والعثمانيين والفرنسيين والإنجليز  
وعكروت.. وكأنه فى محكمة)

طومان باى : ما فهمتش الدرس.. أنت تأمرت للمرة الثانية  
واتحديت أوامر السلطان.. ولبست لبس أسود فى  
الوقت الذى البلد كلها لابسه أبيض.. فرحت إن  
اسمك بقى على كل لسان.. وبقيت بطل فى عيون  
الناس.. أنت مش بطل بصحيح أنت بطل من  
صفيح.. الحل إيه فيك؟ انطق قول الحل إيه..؟

عبد المطيع : الحل..  
رجل ١ : الحل العثمانيين..  
عبد المطيع : العثمانيين..  
طومان باى : خاين..  
عبد المطيع : الحل الفرنسيين..  
قنصوة الغورى : خاين..  
عبد المطيع : الحل الإنجليز..  
طومان باى : خاين..  
عبد المطيع : الحل الزعران..  
قنصوة الغورى : خاين..  
عبد المطيع : الحل الصفويين.. الخنابلة.. الزعران.. الإنجليز.. كل



## فلاح مصرى يحكم البلد؟!

**أَيُّوَة .. أَذْهَوْنُنَا .. أَذُونَا مَصْر ..**

عبد المطيع

## قنصوة الغوري

عبد المطيع

عبد المطيع

## قنصوة الغوري

## قنصوة الغوري

عبد المطيع

عبد المطيع

## نهاية



**رحلات ابن بسبوسة  
في البلاد الموكوسة**

**تأليف  
السيد حافظ**



## **الإهداء**

أهدى هذه المسرحية

**إلى الدكتور / فوزى فهمى**

**المبدع.. المفكر.. الإنسان**

كان الوطن العربي إمامي حلماً جميلاً رائعاً. دخلت  
الحلم مع عشرة ملايين مصري مثلي، في فترة  
السبعينات، فرأيت الواقع مريراً قبيحاً. ولهذا السبب  
سقطت بغداد على يد الأمريكان الآن. لأننا أمة ضحكت  
من جهلها الأمم منذ قديم الزمان، ولكن سيبقى الوطن  
العربي حلماً بعيداً، وقيماً جميلة في ذكريات وطن  
غير جميل .

## الفصل الأول

(يرفع الستار على فراغ.. الديكور فى هذا العمل  
يجنح إلى البساطة الشديدة والفنية العالية والقدرة  
غير العادية لرؤية مهندس ديكور مبدع ومستنير)  
(علم الدولة العربية الشرقية عبارة عن علم أبيض  
وجنسيات ذهبية ناصعة - الباب الخارجى لإحدى  
السفارات كتسب لافتة ممنوع الزيارات وكروت  
الزيارة وعدم الممانعة حالياً)  
شرطى الحراسة يقف.. يدخل عبد الله ويقف عند  
باب السفارة.

المكان

الزمان

الشرطى

عبد الله

الشرطى

عبد الله

الشرطى

عبد الله

الشرطى

عبد الله

: ليلاً .  
: أنت يا جدع انت واقف عندك ليه؟  
: واقف.. فيه إيه لما اقف ما هى كل الناس يا إما  
واقفه يا إما نائمة يا إما قاعدة  
: ياقول لك إيه روح اقف لك فى مكان تاتى  
: أنا عايز اقف فى المكان دا  
: الله ما طولك يا روح.. بابنى الوقوف هنا ممنوع.  
: طيب أقعد (يجلس على الرصيف)  
: انت حتتجزر معايا.. والقعاد هنا ممنوع  
: ليه مش ده رصيف وشارع ملك الحكومة وأنا

- مواطن
- الشرطى : يابنى ما تعكرش دمي.. جأى الساعة اتنين بعد  
نص الليل ترازى فيّ ليه؟
- عبد الله : وأرازي فيك ليه.. هو أنا أعرفك ولا انت تعرفنى  
حنوه دى
- الشرطى : (يعدل حزامه) ناخدها معاك ميرى.. معاك بطاقة يا  
مواطن؟
- عبد الله : معايا
- الشرطى : وريها لى
- عبد الله : اتفضل
- الشرطى : (يمسكها) عبد الله عبد المطيع
- الشرطى : جواز سفرك
- عبد الله : أيوه (يمسك الشرطى الجواز)
- الشرطى : (يفتحه) الاسم عبد الله عبد المطيع - مواليد  
١٩٥٦
- عبد الله : (مكلاً) محل الميلاد قرية عروبة الغبانية محافظة  
السويس
- الشرطى : وجأى هنا ليه؟
- عبد الله : جأى أقدم طلب عمل عشان أسافر بلد العروبة  
الغنية الشرقية مش دى سفارتها برضه والا أنا  
غلطان؟



- الشرطى : (يضحك) جأى الساعة اتنين بعد نص الليل تقدم  
طلب للعمل فى بلد العروبة القنية الشرقية؟!
- عبد الله : (يضحك) ما هو قالوا لى اللى يصحى بدرى يسافر  
الأول
- الشرطى : أنت فاكسر السفر سهل كده؟! (يضحك)
- عبد الله : ما هو أنا عارف إن كل مصرى شايلى جوازته فى  
جيبه مستنى بس لمح كده ويقط وينط على بره..  
ماحدش عايز يقعد هنا كله عايز يسافر.. كأنه فيه  
شوكه بتوجعهم لما بيقدوا فى البلد دى
- الشرطى : والنبي انت نقطة.. اقعد.. (يشير له بالجلوس)
- (يحضر له كرسيًا ويجلس عبد الله) (عبد الله يشعر  
بالسعادة)
- الشرطى : (يجلس) وانت حتشتغل إيه بره قصدى حتقدم على  
شغلانة إيه؟
- عبد الله : مدرس
- الشرطى : يا سلام.. أستاذ يعنى..  
قم للمعلم وفه التبجيلا كاد المعلم أن يكون رسولا
- عبد الله : دا كان زمان.. دلوقتي العيال بتضرب المعلم على  
قفاه وإذا المعلم رفع العصايا الواد يبلغ الوزارة  
ويتعمل محضر ضده ويدخل السجن
- الشرطى : يا شيخ ما تبالفش فى الكلام ده قوى.. قول حاجه

### معقولة

- عبد الله : انت مش مصدقتى؟  
الشرطى : بقى العيال بتضرب المدرسين دلوقتى؟ •  
عبد الله : أبوه عشان كده ما عدش فيه احترام لحد.. الواد لا  
يحترم مدرسه ولا أبوه ولا أى حد  
الشرطى : يا أستاذ قول كلام معقول  
عبد الله : دى الحقيقة عارف يا عم انت اسمك إيه قلت لى؟؟  
الشرطى : أنا عمك حسنين.. انت يا بنى حتسافر ليه؟  
عبد الله : شوف يا عم حسنين أنا قررت أسافر لأنى شفت  
بعضى ما حدش قالى  
الشرطى : شفت إيه؟  
عبد الله : شفت العجائب والغرائب.. أنا مواليد ١٩٥٦  
(يتحول المسرح إلى استعراض مجموعة من  
الشباب تحمل أعلاما ويرقصون كالدرابيش ويقفون  
مصر فخرنا وعزنا ومجدنا وهم يقفون.. يتشكلون  
إلى هرم بشرى.. ويجلس أحدهم على كتف الآخر  
ويقول)  
الهتيف : إخوانى.. أحمد عرابى.. غلطان  
المجموعة : غلطان وستين غلطان.. ما كنتش فاهم  
الهتيف : إخوانى مصطفى كامل غلطان  
المجموعة : غلطان وستين غلطان.. ما كنتش فاهم

الهدية	: سعد زغلول غلطان
المجموعة	: غلطان وستين غلطان.. ما كنتش دارى
الهدية	: مصطفى النحاس غلطان
المجموعة	: غلطان وستين غلطان.. ما كنتش واعي
الهدية	: محمد فريد غلطان
المجموعة	: غلطان وستين غلطان.. ما كنتش قوى
الهدية	: محمد نجيب غلطان
المجموعة	: غلطان وستين غلطان.. ما كنتش ثورى
الهدية	: جمال عبد الناصر غلطان
المجموعة	: غلطان وستين غلطان.. ما كنتش فهلوى
الهدية	: محمد أنور السادات غلطان
المجموعة	: غلطان وستين غلطان.. ما كنتش دارى
الهدية	: مجانية التعليم غلط
المجموعة	: غلط.. غلط.. ويجب إفلأوها
الهدية	: القطاع العام غلط
المجموعة	: ويجب بيعه نبيعه.. نبيعه
الهدية	: الوحدة مع سوريا غلط حربنا مع اليمن غلط
المجموعة	: غلط وستين غلط
الهدية	: السد العالي غلط ويجب هدمه
المجموعة	: نعم.. نعم يجب هدمه.. نهده.. نهده.. نهده
الهدية	: قساة السويس غلط ويجب إعادتها للأجانب وبيعها

- عشاشان نسد دىون مصر
- المجموعة : يجب بيع القناة
- الهتيف : مشروع فرنسى لجمع قمامة القاهرة وتحويلها  
لأسمدة يدفعوا لنا كام عملوه وإلا تلغيها.. والزبالة  
مزوقه الشوارع
- المجموعة : نخلي الزبالة مزوقه الشوارع
- الهتيف : قال إيه السبايا عابزة تستصلح مليون فدان  
وتزرعهم قطن وتنفع ٥٠% لنا و ٥٠% لهم  
لمدة ٩٩ عام طيب فين العمولة والتسهيلات للجانب  
ما فيش المشروع دا لغينا
- المجموعة : لغينا لغينا لغينا
- عبد الله : أنا المواطن عبد الله عبد المطيع يسأل مين فى  
تاريخنا الأمين والسليم ومين فيكم الصح ويقول أنا  
دماغى حتفجر من إيه مش عارف
- الهتيف : ضرب (بشي إلى عبد الله على إنه مجنون) ضرب  
ضرب
- المجموعة : ضرب ضرب ضرب
- (إفلام على المسرح عودة من اللوحة إلى السفارة  
والشرطى حسنين بجوار عبد الله)
- الشرطى : وعشاشان كده عابز تسافر.. يابنى الحاجات دى  
عادية وسهلة ياما حتشوف

عبد الله	:	شفت
الشرطى	:	شفت إيه؟
عبد الله	:	شفت النهاردة
الشرطى	:	النهارده
عبد الله	:	أيوه وفى الشارع سليمان فى القاهرة
		(ستوغرافيه.. سوق.. رجل مع ابنه وابنته يشتري ثوبا للفتاه.. الثوب معطى.. الأب يقف ويدفع كل ما فى جيبه للبائع حتى يخرج للبائع الجيبين فارغين.. الفتاه ترقص فرحة بالفستان.. جيوبه فارغه يخلع الجاكت ويعطيه للبائع الابن يطلب من أبيه شراء جاكت.. الأب يطلب من البائع الجاكت للولد.. يخلع ساعته.. نظارته.. يخرج الأب بملابسه الداخلية يرتعد ويقع على الأرض من البرد)
الطفله	:	بابا
الطفل	:	بابا
		(صوت الضجيج والشوارع وسيارة الإسعاف يدخل رجلان من الإسعاف رجل طويل عريض المنكبين يتحسس نبضه)
الرجل	:	دا مات
عبد الله	:	ينوبك ثواب وديه المستشفى والا البيت
الرجل	:	دا مات

عبد الله : ينوبك ثواب وديه المستشفى والا البيت  
الرجل : مش تخصصى.. أنا إسعاف وبس أسعف الأحياء  
مش الأموات  
عبد الله : ينوبك ثواب وديه المستشفى والا البيت  
الرجل : مش تخصصى.. أنا إسعاف وبس أسعف الأحياء  
مش الأموات  
عبد الله : الله  
الرجل : ملناش دعوه.. شوف له عريبة الميتين مخصوص  
تتاجر بميتين جنيه  
عبد الله : ما معهوش فلوس  
الرجل : خليه مرمى.. مين قلّه يموت فى الشارع وكمات  
مفلّس  
عبد الله : (يصرخ) يا ناس الحقونا (عودة من الحدث)  
(الشرطى يقف ويضرب كفاً على كف)  
الشرطى : ودا ياما بيحصل كل يوم  
عبد الله : كل يوم  
الشرطى : الله الفجر شأشأ والنهار طلع (يدخل أفراد يراحمون  
يملأون المسرح باعة جائلون حول السفارة.. زحام  
شديد باعة جرائد.. باعة طصية..) (الأنارة تتحول  
إلى الصباح) (تدخل لجنة من بلد العروبة الغنية.  
يلبسون عمام ويجلسون)

- رجل ١ : اسمك؟
- عبد الله : عبد الله عبد المطيع الشهير بابن بسبوسة
- رجل ٢ : وجدك العاشر اسمه إيه.. اسم العائلة؟
- عبد الله : عبد المطيع من أيام المماليك جدى العاشر كان فى قصر قنصوه الغورى مشهور بابن بسبوسة
- رجل ٣ : وجدك التاسع؟
- عبد الله : عاش مع الزعيم محمد على وحارب معاه فى الصومال وتركيا ودخل معاه فرنسا
- رجل ٢ : وجدك الثامن؟
- عبد الله : مات فى حفر قناة السويس أيام الخديوى إسماعيل
- رجل ١ : وجدك السابع؟
- عبد الله : مات فى فلسطين
- رجل ٢ : وأخوك الصغير؟
- عبد الله : عبد المطيع استشهد فى حرب ١٩٧٣
- رجل ١ : ما قيش فى عيلتك سفير ولا وزير ولا أمير؟
- عبد الله : لا سفير ولا وزير ولا أمير كلهم فلاحين ولا حتى واحد اشتغل غفير
- رجل ١ : ليش بتريد تروح عندنا؟
- عبد الله : بصراحه بصراحه
- رجل : واحنا ما نحب غير الصراحة
- عبد الله : علشان أعى زكايب فلوس

رجل ٢ : من الزيت؟  
عبد الله : أيوه من الزيت  
رجل ٢ : صبح الزيت دا بتاعنا  
رجل ١ : تشتغل مدرس سامع  
عبد الله : سامع  
رجل ١ : بكام؟  
عبد الله : انتوا بتدفعوا كام؟  
رجل ٢ : اللي نجول عليه إحنا مالك شروط مالك رأى..  
سامع والا.. لأ  
عبد الله : اللي تجولوا عليه (موسيقى مع تغيير الديكور مطار  
القاهرة الدولي (ضوء على عبد الله فى مطار  
القاهرة الدولي ويحمل الحقائب وينادى)  
عبد الله : يا سميرة مدى شويه  
سميره : أنا مش قادرة يا عبد الله الشنط ثقيله... (تدخل  
على المسرح)  
موظف الجوازات : معاك تصريح سفر؟  
عبد الله : اهه معايا تصريح سميره اهه  
موظف الجوازات : الختم مش واضح  
عبد الله : مش واضح إزأى؟  
سميره : والنسبى واضح يا سعادة الباشا.. الهى ما يرقدلك  
جته



- موظف الجوازات : زى بعضه. معاك تصريح العمل؟
- عبد الله : أيوه معايا ودا تصريح سميره
- موظف الجوازات : معاك ورقه تثبت أنك لغيت التموين؟
- سميره : لغيناه لغيناه التموين اتنازلنا عن ٢ كيلو سكر وباكوا شأى وحته صابون
- موظف الجوازات : مظلوط معاك عقد العمل؟
- عبد الله : معايا ايه؟
- موظف الجوازات : معاك تصريح سفر من الشغل؟
- عبد الله : معايا ودا تصريح سميره
- سميره : دوخوني عليه يا بيه والجزمه انقطعت
- موظف الجوازات : خلاص.. خلاص.. معاك ورقه تثبت أنك دفعت رسوم دخول المطار؟
- عبد الله : معايا ايه ودى بتاعت سميره
- سميره : هي الرسوم دى بتعملوا بيها إيه يا بيه؟
- موظف الجوازات : نعم يا ستى بنعمل إيه.. مش دى بلدك ادفعى واتنى ساكتة
- عبد الله : حقاك علينا
- موظف الجوازات : معاك ورقه تثبت تحويل عمله على الجواز؟
- عبد الله : مفيش عمله معايا.. ودى ورقه تثبت ودى سميره
- موظف الجوازات : معاك ورقه تثبت أنك قرفان ومش حترجع هنا تانى؟

عبد الله : معايا ااهه أنا وسميره  
 : (ظلام ضوء يدخل على المسرح) (لافتة كتب عليها  
 مطار بلد العروبة الغنية الشرقية الأعلام لونها  
 ابيض مرسوم عليها جنبيها ذهبية.. المطار مقسم  
 إلى عدة إماكن... أبناء بلد العروبة الغنية الشرقية  
 أبناء مجلس بلد العروبة الغنية الشرقية.. " دخول  
 الأجانب "... على المسرح بعض العمائم للبلد  
 الشرقية.. يقف عبد الله وسميره تقف يحضر  
 الشرطي (الشرطي شاب فى سن ١٧ سنة)

الشرطي : انت يا ولد  
 عبد الله : مين الولد؟  
 الشرطي : انت  
 عبد الله : أنا مش ولد.. أنا راجل عيب عليك لما تقول يا ولد  
 الشرطي : باقول لك انت ولد  
 عبد الله : وبعدين يا سمييره  
 سمييره : ولد ولد يا خويا  
 عبد الله : هو اللي ولد.. أنا أكبر منه  
 الشرطي : أنا ولد وانت ولد  
 عبد الله : انت ولد وأنا راجل  
 الشرطي : ماله ها الريال يا مره؟  
 سمييره : نعم

الشرطى : ها الولد ماله يا مره؟  
سميره : أنا مره؟  
الشرطى : أبوه مره  
سميره : عيب عليك لما تقول يا مره تقول يا مدام يا ست  
عيب لما تقول يا مره  
عبد الله : أنا ولد وهى مره عيب عليك  
الشرطى : انت يا ولد أجنبى مش ولد الديره.. روح هناك مع  
الأجانب  
عبد الله : (يشير للطابور الآخر).. دول هنود وإنجليز  
وصينين وكوريين وأجانب وأنا عربى.. أنا  
مصرى.. مش أجنبى..  
الشرطى : انت معاهم أجنبى  
عبد الله : انت مالك ومالنا مش انت لما تيجى مصر بتقف فى  
الطابور معنا كلنا ولاد تسعه  
الشرطى : بلا تسعه بلا عشره... اجف فى الطابور... عدل  
من كفيلك يا ولد؟  
عبد الله : رجع يقول يا ولد  
سميره : معش يا عبد الله رد عليه  
عبد الله : عايز إيه؟  
الشرطى : مين كفيلك؟ الضامن  
عبد الله : كفيلى ربنا اللى يضمنى

الشرطى : مين كفيلك يا ولد؟  
 عبد الله : بيقول إيه يا سميره؟  
 سميره : بيتكلم اتجلىزى يا عبد الله  
 الضابط : (فى شبك الجوازات) انت يا ولد  
 سميره : انت يا عبد الله  
 عبد الله : هم كل ما يقولوا يا ولد ببقى أنا يا سميره؟  
 سميره : أيوه  
 عبد الله : طيب.. نعم  
 الضابط : وين بتشتغل؟  
 عبد الله : مدرس  
 الضابط : ليش جأى؟  
 عبد الله : جأى اكمل تعليمى  
 الضابط : زين  
 عبد الله : تمام  
 الضابط : وها الحرمة؟  
 عبد الله : يا سميره.. قال ها الحرمة ما قالتش مره  
 سميره : اخرس  
 : (يدخل شاب يحمل لافتة وزارة التربية)  
 سميره : دا بيدو علينا يا عبد الله  
 عبد الله : طيب.. يا أخ.. يا أخ.. أنا مدرس  
 المسئول : مرحبا.. اتفضلوا.. هيا.. هيا

(يقدم لهم نموذجاً لمنزل صغير لعمه)	
المستول	: البيت يتاعكم
عبد الله	: يتهزر
المستول	: هذه غرفه النوم.. وهذه الصاله.. وهذه دورة المياه وهذا مكيف.. هذه بارد وسخن.. هذه ثلاجه
عبد الله	: شايقه يا سميره
سميره	: شايقه يا سميره
المستول	: هذه غرفه النوم.. وهذه الصاله.. وهذه دورة المياه وهذا مكيف.. هذه بارد وسخن.. هذه ثلاجه
عبد الله	: شايقه يا سميره
سميره	: شايقه إيه دى لعمه
المستول	: السنه الجايه لما يكون عندكم جهال (عيال) نديكم شقه أوسع
عبد الله	: يا سلام.. يا سلام ادى الكرم والا فلا
المستول	: السنه الجايه لما يكون عندكم جهال (عيال) نديكم شقه أوسع
عبد الله	: يا سلام.. يا سلام ادى الكرم والا فلا
المستول	: شكرا سلاموا عليكم
عبد الله	: انت بتستعيط علينا رايح فين؟
المستول	: ايش فيك؟
عبد الله	: العقد فيه شقه وسكن كامل

- المستول : الشقة فى ايدك والسكن كامل فيها
- عبد الله : أنا عايز حد يفسر لى العقود دى
- المستول : أنا عايز المستول الكبير
- المستول : (يخرج من جيبه عقال ويرتديه) نعم
- عبد الله : يا حضرة المستول الكبير العقد بينى وبين الوزارة
- بيقول فيه إن لمّ حق سكن كامل شوف عاطينى
- لعيه ويبقول دا سكن
- المستول : دا السكن الموجود عايز سكن تاتى - موجود -
- تديك بدل سكن وانت اسكن
- المستول : (يخلع المستول البشت ويخرج بمسحه ويرتدى
- لحيه) نعم
- عبد الله : عندك سكن؟
- المستول : نعم.. عندى
- عبد الله : بكام؟
- المستول : ٢٥٠ دولار
- سميره : ٢٥٠ دولار. دا الحكومه عطياته بدل سكن بخمسين
- دولار
- المستول : مفيش سكن بخمسين دولار
- سميره : يعنى تدفع من مرتبنا ٢٠ دولار
- المستول : أبوه
- عبد الله : إذا كان مرتبنا أنا ومراتى ٤٠٠ دولار

- المسئول : وأنا مالى.. السكن الى عندي ارحص سكن
- عبد الله : وبعدين يا سميره
- سميره : حتدفع مرتبك يا عبد الله؟
- عبد الله : امرى لله يا سميره
- (يخلع المسئول ذقنه ويرتدى جاكيت)
- المسئول : عايزه سياره؟
- عبد الله : ما معيش فلوسها
- المسئول : مأكو فلوس خد سياره جديده وادفع أقساط على أربع سنين
- سميره : حلوه يا عبد الله سياره جديده
- المسئول : جديده على الزيرو
- سميره : يا حلاوه
- المسئول : حتدفع لنا مائه دولار فى الشهر
- سميره : ربع المرتب
- عبد الله : يكفيننا ربع المرتب نأكل ونشرب
- سميره : يلا يا عبد الله
- (يدخلون لبیت عبد الله)
- يتحول الديكور إلى فصل.. فى المدرسه.. مكيف
- زينات الفصل.. وشاشات تليفزيون.. وتليفون..)
- شاب ١ : الله بالخير
- شاب ٢ : الله بالخير

- شباب ٣ : الله بالخير
- شباب ٤ : هلا يا شباب
- الجميع : هلا يا شباب
- عبد الله : صباح الخير
- الشباب : لا يرد
- عبد الله : النهارد امتحان اخر السنة
- (يدخل اثنان من الصكر في زى فانتازي أحدهم  
ببالطو والآخر ببيون (يرقصان - يضحكان)
- عبد الله : فيه إيه؟ (يدخل العريف صائحاً)
- العريف : الطالب فلان ابن حنتوسه
- (يدخل ابن حنتوسه يحمله أربعة من الخدم على  
هودج محمول)
- ابن حنتوسه : هلا.. هلا
- الجميع : هلا وستين هلا
- (يخرج الخدم)
- (يدخل أربعة من العبيد الزوج ملابسهم عاربه  
يحملون الأعلام)
- العبيد : بسيس ابن بسبوسه
- عبد الله : بسيس بن بسبوسه عندنا يا مرحبا يا مرحبا
- بسيس : هلا.. وهلا.. الله بالخير
- الجميع : الله بالخير وميت هلا



عبد الله	:	أهلا وسهلا
	:	(يدخل شاب سمين ومعه ثلاثة من الهنود الحمر)
هندي	:	جرمان بن جرمان فاتح الهند والسودان
عبد الله	:	ابن مرجان عندنا يا هلا هلا
	:	(يجلس الطالب الثلاثة)
المسئول	:	امتحان.. امتحان.. (يعطى عبد الله الأوراق)
عبد الله	:	(يوزع الأوراق) كل واحد يكتب اسمه ورقم
	:	جلوسه.. ورق الامتحان قدامكم (يعطيهم الورق)
	:	جرس يضرب
	:	(صمت في الفصل.. لا يتحركون ولا يكتبون)
طالب ١	:	أستاذ
عبد الله	:	نعم
طالب ١	:	صبي يعورني.. اجعد واكتب لي
عبد الله	:	ما اقدرش.. ممنوع
طالب ١	:	ممنوع.. شنهو.. ممنوع.. اجعد (يجلس) جابوب
	:	الاسئلة انت ليش جاي من بلدك؟ (معناها لماذا انتم
	:	تأتون للعمل هنا) (يجلس عبد الله يفتح القلم
	:	ويجاوب) (الطالب يقف يشخط فيه) جابوب
عبد الله	:	حاضر.. (يجابوب بسرعه عبد الله حتى يلهث)
	:	خلصت
الطالب ١	:	زين

- طالب ٢ : (يشير لعبد الله تعالى
- عبد الله : مالك؟
- طالب ٢ : هذه قلم ذهب اكتب بيه واعهولى اوعى تكسر سنه
- عبد الله : زين (يشير للطالب ٢)
- الطالب ٢ : زين
- عبد الله : طيب إزأى
- الطالب ٢ : بسرعه.. يلا.. بسرعه.. بسرعه
- (يطبلون ويرقصون وهو يجاوب)
- طالب ٣ : تعالى جاوب
- عبد الله : طيب.. يذهب (جرس الحصة يضرب)
- المستول : الامتحان خلص لم الورق
- طالب ٣ : حاتم ورقتى فاضيه
- عبد الله : الوقت خلص
- طالب ٣ : الظاهر لازم نتفتش
- عبد الله : يعنى إيه أتفتش؟
- طالب ٣ : تنطرد
- (يخرجون من الفصل)
- عبد الهادى : (زميل عبد الله فلسطينى الجنسيه) مالك ياخوى عبد الله؟
- عبد الله : مش عارف يا عبد الهادى الواد بيقول لى حفتشك لأنك ما جوبتش

- عبد الهادى : بسيطه جاوبها وانت فى لجنة التصحيح
- عبد الله : ودا ينفع؟
- عبد الهادى : كل شىء ينفع
- عبد الله : أنا مش عارف جيت ليه هنا؟
- عبد الله : جيت علشان المصارى الفلوس يعنى
- عبد الله : انت عايش إزأى وبتقبض كام يا عبد الهادى؟
- عبد الهادى : أنا بقبض ١٢٠٠ دولار فى الشهر بس
- عبد الله : كام.. الف وميتين.. أنا بقبض ٤٠٠ دولار بس
- عبد الهادى : العربى يقبض قد المصرى مرتين ثلاثة.. أربعة
- عبد الله : ليه العربى أى عربى أكثر وضعت المصرى.
- عبد الهادى : من غير ليه اخوى عبد الله زى ما بيقول
- عبد الوهاب (لحن عبد الوهاب من غير ليه)
- (يضحكان) يسير على المسرح.. ديكور شارع..
- لسل.. يسير خادم هندى ورجل التجنىزى وعبد الله
- ويقف رجلان من الشرطه
- شرطى ١ : تفتيش.. كله يقف طابور.. الهويه.. الهويه
- عبد الله : (يقف فى صف الأجانب) الحقونى
- (يقف عبد الله فى الصف ورجل يتكلم بلهجه
- عريبه)
- الشرطى : انت وهو تتكلم التجنىزى
- رجل ١ : ستوكا.. بيكا.. ميدور

- الشرطه : انت شنهو جنسيتك؟  
 رجل ١ : يا سنووريتا.. مالينا كاليبي  
 الشرطى : دش قى السياره (يجذبونه على السياره) (ياتى الدور على الهندى)  
 شرطى ١ : وانت يا الهندى (يجذب الهندى بيدو سكران)  
 شرطى ٢ : ايش فيك سكران تشرب المتكر وين سيارتك؟  
 الهندى : (يشير إلى السياره)  
 شرطى ١ : (يجرى إلى الخارج ويحمل صندوقا) ويسكى..  
 تشرب الخمر يا ملعون سجن عشرين سنه.. خدوه إلى السجن  
 شرطى ٢ : (يجذبه إلى السياره) يلا يا ملعون  
 الشرطى : (الأشقر السكران) أبوه  
 الأجنبى  
 شرطى ١ : ماى نام ازجون (اسمى جون)  
 الشرطى : انت سكران ما يصير تسويها تاتى اتفضل روح نام احسن تسوى حوادث يا جون.. مع السلامه..  
 (لزميله) روح وصله للنبيت  
 شرطى ٢ : على الخاشم (يخرج مع مستر جون) (الدور على عهد الله) وانت.. وين هويتك؟  
 أهى :  
 شرطى ١ : مصرى.. مصرى

- عبد الله : أبوه  
شرطى : خسى  
عبد الله : مثن فاهم  
شرطى ٣ : (يدخل) وين بتشتغل؟  
عبد الله : مدرس  
شرطى ٣ : خسى  
عبد الله : لازم خسى.. خسى كلمه حلوه وانت كمان خسى  
الشرطى : ايش بتجول.. هذا شرجاوى وأنا شرجاوى  
عبد الله : خسى عليكم كلکم  
شرطى : (يمسكاته ويضرباته) انت تسبنا يا ملعون  
شرطى ٢ : انت تسب أسیادك؟  
عبد الله : فيه إيه هو أنا سببت حد؟  
شرطى ١ : والله يا المصرى ما اسیبك لیطردوك تسب  
الحکومه؟  
الرجل المهم : (يدخل مندفعاً) وين الولد الهندى؟  
شرطى ١ : أى ولد يا طويل العمر؟  
شرطى ٢ : ماكو ولد هنا غیر ها الولد المصرى؟  
الرجل المهم : الولد الهندى یا كلب باللى ما تستحون على  
وجوهکم  
شرطى : ها الولد الهندى سكران  
الرجل المهم : سكران والا مو سكران.. ها الولد الهندى بیشتغل

عندى

- شرطى : والله ما ندرى (برتشان)  
الرجل المهم : وين صندوق الويسكى اللى معاه؟  
شرطى : إيه حزننا (أى احتفظنا به كدليل اتهم)  
الرجل المهم : الصندوق مالى وفيه ١٢ بوتل زجاجة لونجس  
واحدة اجص رجبييتكم جص (أى لو تنقص زجاجة  
ويسكى واحدة سأقطع رقبتكم وأقصها)  
شرطى ١ : أمرك يا طويل العمر  
شرطى ٢ : أمرك يا طويل العمر  
شرطى ١ : (يخرجان يحضران الهندى وصندوق الخمر) تمام  
يا طويل العمر  
شرطى ٢ : تمام يا طويل العمر  
الرجل المهم : اياكم توقفون تانى لأى خادم عندى.. أى خادم  
عندى مهم حكمن خادم الراجل المهم مهم..  
تحسبون حسابه (أى اياكم توقفون أى خادم  
عندى.. يمتلنى فهو رجل مهم)  
الشرطيان : تمام  
الرجل المهم : (ينظر لعبد الله) وايش هذا؟  
شرطى ١ : هذا مدرس مصرى يسبنا (يسبنا أى يشتها)  
الرجل المهم : سببتهم يا ولد (يتحدث إلى عبد الله)  
عبد الله : أنا ما سببتش حد هما سألونى - انت مصرى

قلت لهم آه.. قالوا لى خسى سألتهم انتم شرقاويين  
قالوا آه لهم خسى زعلوا ومسكوا فى (خسى أى  
واطى)

الرجل المهم : (ينفجر فى الضحك) والله خوش ولد انت.. (يعنى  
كويس)

عبد الله : الله يخليك

الرجل : تعرف ها الممثلين المصريين

عبد الله : باشوفهم فى السينما والتلفزيون

الرجل المهم : فيهم ناس تمام

عبد الله : يا سلام

الرجل المهم : وايش بتشتغل؟

عبد الله : مدرس

الرجل المهم : نسيت هما قالوا لى (بيدو أن الرجل المهم ولكنه  
يتماسك)

الرجل المهم : وايش رأيك تشتغل عندي؟

عبد الله : اشتغل إيه عايز درس لأولادك

الرجل المهم : ولادى كلهم فى أمريكا يتعلمون

عبد الله : كلهم فى أمريكا.. وليه ما يتعلموش هنا؟

الرجل المهم : يسقطون.. وأنا عايزهم ينجحوا.. لأن دماغهم فوق  
فوق

عبد الله : يا سلام عباقره يعنى؟

الرجل المهم : عباقره.. تحت شويه  
عبد الله : نوابغ؟  
الرجل المهم : لأ  
عبد الله : ممتازين؟  
الرجل المهم : تحت.. تحت شويه  
عبد الله : مش فاهم عاديين؟  
الرجل المهم : تحت.. تحت  
عبد الله : مش فاهم  
الرجل المهم : أقل بكثير  
عبد الله : يا حول الله يارب يا حول الله يارب عيالك متخلفين  
(يبكى)  
الرجل المهم : (يبكى وهو سكران) لامو متخلفين.. لعبيين  
شقيين.. موفاضيين للدراسة.. فاضيين للوناسة  
عبد الله : مش فاضيين للدراسة فاضيين للوناسة.. يتونسوا  
إزاي؟  
الرجل المهم : (يجذبه من أذنه يحدثه) ياه  
عبد الله : ياه  
الرجل المهم : (يجذبه مرة أخرى)  
عبد الله : ياه.. ابنك الكبير يخسر على طرايبزة القمار ٢  
مليون دولار  
الرجل المهم : وطى صوتك



عبد الله : وابنك الصغير اشترى قصر للممثلة مارلين مونرو  
 بـ ١٧ مليون دولار بس مارلين مونرو ماتت  
 الرجل المهم : يجولسون ما ماتت مستغيبه وهو شايقها جدامه..  
 بشعرها الأصفر وعينيها الزرجة وخدودها البيضاء  
 عبد الله : يا سلام.. يا سلام.. قالوا عايشة وهو صدق  
 الرجل المهم : ابني ما يكذب حد من الحريم  
 عبد الله : يا سلام  
 الرجل المهم : جلّت إيه تشتغل عندي؟  
 عبد الله : اشتغل إيه؟  
 الرجل المهم : تونسنى  
 عبد الله : اونسك مش فاهم  
 الرجل المهم : تجعد معايا واجعد معاك  
 عبد الله : لا يا عم.. الله الغنى  
 الرجل المهم : شوف يا ولد لما تفكر حاجتينى انت بتاخذ كام فى  
 الوزاره ح الدفع لك جد الوزاره عشر مرات عشرين  
 مره ثلاثين مره جلّت إيه؟  
 عبد الله : يفتح الله يفتح الله يا عم أنا الزمن مونسنى والأيام  
 مونساتى ويلدى مونساتى وانت كمان عايز تونسنى  
 تبقى مصيبه أتونس وأنا راجل وفى وشى شنب  
 الرجل المهم : زين.. سيبوا ها الولد  
 الشرطى : تمام يا طويل العمر

- شرطى ٢ : تحب نوصله  
عبد الله : لا أنا حاوصل نفسى  
(يسير والديكور يتحول إلى شقة أصحابه العزاب)  
(ضوضاء.. أحدهم يهسل.. أحدهم يسمع شريط..  
أحدهم يسجل شريط)  
(عندما يشاهدونه يتغامزون ويتلامزون)  
رجل ١ : أهلا يا أستاذ عبد الله من زمان ما شفتكش إيه يا  
أستاذ عبد الله مالك شاييل طاجن ستك على دماغك؟  
عبد الله : إزأى يعاملوننا كده.. الشرقيين دول ياما ساعدناهم  
وهما فقراء مصر ياما ساعدتهم  
رجل ١ : الشرقيين دول ناس طيبين.. ركبوا الجمال وهوب  
ركبوا الطيارات فحصل لهم زلزال نفسى واقتصادى  
وغيره  
عبد الله : أنا مالى بالزلزال إزأى يعاملونا كده؟  
رجل ٣ : ما تزعلش نفسك يا صديقى بكره تتعود المهم أول  
الشهر وتحويل القلوس  
رجل ٤ : شوف يا حبيبى.. شوف يا خويا.. خليك واقعى انت  
بتكسب كام فى مصر؟  
عبد الله : مش دى القضية  
رجل ٤ : آمال إيه القضية؟  
عبد الله : إزأى يتعامل المصرى بأقل أجر وأسوأ معاملته؟

- رجل ٥ : (يمسك جريده) ادى وزير الخارجيه الشرقاوى  
منصور مع وزير الخارجيه المصرى مشهور  
ويقول تحت الصوره مصر لها أفضال على الأمم  
العربيه وهى قلب العروبة ولا تتخلى عنها
- عبد الله : الكلام دا كذب.. أكيد السفاره ما بلفتش الوزير  
بتاعنا باللى حصل
- رجل ٦ : يابنى الوزاره عارفه
- عبد الله : ببقى فيه حاجه مش عارفينها
- الجميع : هى إيه؟
- عبد الله : الشرقاويين عندهم مثل بيقول كلب الراجل المهم..  
مهم واحنا اذا كان المواطن بتاعنا كلب خارج مصر  
ببقى أى واحد كبير عندنا
- الجميع : اخرس
- عبد الله : ليه؟
- الجميع : الرقابه تقفل المسرحيه ويقولوا سوء استخدام  
الديمقراطيه
- عبد الله : أنا تعبان جداً مش فاهم حاجه
- رجل ٥ : مالك يا أستاذ عبد الله وحد الله.. أنا عندى لك  
مشروع كويس
- عبد الله : خير
- رجل ٦ : أنا لى رأى انك تتجوز واحده شرقاويه تديك

## الجنسية

- عبد الله : اتجوز على سميره إزاي؟
- رجل ٦ : شوف وجرب الطريقه دى جواز المصرى من الشرقاويه باطل (يرقص الرجال الستة فى الحجرة ويهتفون جواز المصرى من الشرقاويه باطل ويحكم عليه بالاعدام)
- سميره : (بعد الاستعراض يخرجون من على المسرح جميعا يتغير الديكور لمنزل عبد الله وتظهر سميره وقد ارتدت ملابس المطبخ وفى يدها مغرفة طعام.. جرس الباب.. تتجه لفتح الباب)
- عبد الله : طيب.. طيب
- سميره : (يدخل مختنفاً) حر.. حر.. يا سميره
- عبد الله : حر.. شر.. يا عبد الله
- سميره : حضرتى الأكل؟
- عبد الله : ما انت شايف لسه راجعه من الدوام
- سميره : يعنى مش حنتغدا؟
- عبد الله : قدامك ساعه بالضبط
- سميره : يا سميره.. يا سميره.. ميت مرة أقول لك اعملى الأكل بالليل
- سميره : يادى بالليل والنهار.. تعبانة تعبانة يا عبد الله
- عبد الله : العيال بيطلعوا عينى.. بيقولوا يا مصرى يا فوال

- سميره : وأنا العيال بيطلعوا عيني يا عيني ويشتموني ويقول  
لى يا مصريه يا بتاعة العربيه الفيات
- عبد الله : قبضتى؟
- سميره : قبضت
- عبد الله : فين قبضك؟
- سميره : أهه (تخرج من حقيبتها الملقاة على الأرضه مبلغا  
من المال وتعطيه له)
- عبد الله : إيه دا.. دول ربع المبلغ
- سميره : أبوه.. قسط العربيه نص المرتب وربع المرتب  
جبت بيه حاجات من الجمعيه.. ما هى البركه فى  
مرتبك
- عبد الله : ما هو شرحه قسط العربيه نص المرتب وربع  
المرتب جبت بيه شوية هدايا
- سميره : إيه رأيك يا عبد الله نوفر بدل عربيتين عربية  
واحدة
- عبد الله : أنا شغلى فى الشمال وانت شغلك فى الجنوب  
بنمشى بالعربية ساعة ونص
- سميره : والوزارة مش عايزة تنقلنا
- عبد الله : بنأكل ونشرب ونجيب هدايا.. احنا جايين هنا ليه يا  
سميره؟
- سميره : إيه رأيك نوفر الأكل لأنه غالى؟

عبد الله : إلا الأكل دا ماقدرش يا سميره.. اشتغل وكل يوم  
يتحرق دمي وماكلش ليه.. ليه يعني  
سميره : عبد الله (بدلال)  
عبد الله : نعم  
سميره : عبد الله إيه رأيك فيه عندي لك خبر حلو  
عبد الله : إيه حلو شفت لى شغلته بعد الظهر لى عند جوز  
واحدة صاحبتك؟  
سميره : لا  
عبد الله : أمال إيه؟  
سميره : أنا حامل  
عبد الله : انت إيه حامل.. احملوني  
(يقع على الأرض مغشى عليه)  
(يستحول الديكور إلى السفاره المصريه فى البلاد  
الشرقية)  
(عمال وموظفون يقفون صفًا طويلاً.. حارس امن  
طويل عريض المنكبين يمسك عصا فى يده)  
الحارس : اقف عدل يا مواطن انت وهو  
عبد الله : (يدخل ومعه سميره) صباح الخير  
الحارس : صباح النور  
عبد الله : أنا عايز اعمل شهادة ميلاد لابنى  
الحارس : اقف فى الطابور دا (يضرب رجل صعيدى) اقف

- عدل ابن الرفدى عايز تنط الدور
- الصعيدى : بتضربنى ليه.. عايز منى إيه.. انت فاكر نفسك فى مصر والا إيه؟
- الحارس : سواء فى مصر أو فى الشرقية أو فى الغربية اديكم بالقديمة يا ولاد اللئيمة.
- الصعيدى : يابوى هى الإهاته ورأنا ورأنا حتى هنا
- عبد الله : بس المدام لسه خارجه من المستشفى من أسبوعين
- الحارس : أنا ماليش دعوه خارجه ولا مش خارجه حتكى لى قصة حياتك اقف فى الطابور
- عبد الله : حاضر
- (تدخل ورده خلفها رجل شرقاوى يجذبها من شعرها)
- ورده : الحقونا يا سفارة الحقونى يا سفارتى.. (يتجمع الناس يخرج السفير)
- السفير : فيه إيه؟
- سالم : ح اقلتها المصرىة الملعونة
- السفير : استنى شويه
- سالم : ما استنى
- السفير : روق شويه
- سالم : ما أروق.. ح اضربها فى السفارة اهنيه

- السفير : يا أستاذ هدى نفسك  
 سالم : ما هدى  
 (يصفع سالم وردة وتصرخ وسط الناس)  
 السفير : عيب كده  
 سالم : انتم يا المصريين ما تستحجون الا كده جوازك معايا  
 اهه ما اعطيكى اياه (يمزق الجواز) ما اطلعك من  
 الديره.. ابجى خلى السفاره تنفلك (يخرج)  
 وردة : يا بيه (للسفير)  
 السفير : شايك ايه.. انتم كده نسوان قلالات الأدب وسفله..  
 ولاد ستين.. بلتش.. ايه اللي جوزك واحد زى دا.  
 راجل قد أبوكى يلعن.. بلتش  
 وردة : الفقير يا بيه ما كنتش عايزاه.. هو فك كام الف  
 جنيه حطهم قدام ابويا على الطرابيزة عقله اتلحس  
 يا بيه.. أبويا باعنى يا بيه  
 السفير : اذا كان أبوكى باعك عايزه الحكومه تعملك ايه؟  
 وردة : الحكومه تشترينى يا بيه مش أنا مواطنه  
 السفير : يا سلام.. عايز الحكومه تدفع لكل واحد فلوس  
 علشان ما يجوزش بنته من اجنبى ثم احنا كلنا  
 عرب  
 وردة : لا يا بيه.. تعمل قانون يحميننا.. نقول قوانين  
 لحماية المصريين من الجواز من اجنبى



- السفير : انت حتعلمينا يا واطيه يا قليلة الأدب
- ورده : حقتك على يا بيه
- السفير : هو أى واحد صايح يشتريكم وتقولوا تعالوا يا حكومه احمينا
- ورده : دا مش صايح دا وكيل سيارات ميكى ميكى
- السفير : معقول وكيل سيارات ميكى ميكى.. دا ابنى نفسه يشتريها انتى اسمك إيه؟
- ورده : ورده
- السفير : شوفى يا ورده.. أنا من رأى إن الصلح خير وأنا ح اصالحكم على بعض. وانت تفتحنى مخك عايز خصم ٢٥ % على العربية اللي ابنى حيتجنن عليها ميكى ميكى
- ورده : حتبعضى علشان عربية ميكى ميكى
- السفير : رجعنا لقلعة الأدب تاتى خليه يذبحك (تبكى وهو يضحك)
- سميره : (تذهب إلى ورده) مالك بتبكى كده ليه يا حبيبتي؟
- ورده : بابكى على بختى المايل
- سميره : حد ببقى هنا ويبقى بخته ماول
- ورده : أنا.. لما اتخرجت من الثانوية ما جبنتش مجموع قلت لأبويما اشتغل بالثانوية. ما لفتش شغل بالثانوية.. ابن عمى مالفاش شقه الا بعشرين الف

جنيه مكران الشباب اللي عملتها الحكومه بسعر  
رخيص عشرين الف جنيه ما هي تساوى فى  
القطاع الخاص تسعين الف تدفع عشر تلاف الأول  
والباقي بالتقسيط على عشر سنين. ندفع فى الشهر  
ميت جنيه طيب مرتب سامى ٨٠ جنيه يعنى  
عايزين فوق المرتب عشرين جنيه وما نكلش ولا  
نشرب ولا نروح شغل ولا نعمل حاجه.. فركشنا  
الجوازة.. وأبويا قال نجوزها لواحد غنى.. سالم  
جه بفلوس جاب لأمى غوايش ذهب وجاب لأخويا  
الصغير عجله وكوتشى وجاب لأبويا كام جليبه  
وراديو ومسجل وتلفزيون وفيديو وجاب لى عربييه  
وقال ح اكتبها بأسمك وطلع كلامه كله كذب فى  
كذب.. بعث لأخويا عقد عمل فراش فى مكتبه  
وأخويا التانى عقد عمل عامل نظافة فى شركته..  
اشتراهم.. اشترانى.. جيت هنا شفت الويل من  
نسوانه وشتيمة اهله فى.. يا أجنبية يا مصريه  
ياللى صفتك ياللى نعتك. سبونى شتمونى طهقت  
زهقت اللي شتمنى شتمته واللى قل ادبه رديت  
عليه.. ليه وليه ارد. إزأى المصريه ترد هي  
المصريه ما تردش ليه.. ضربونى ضربتهم  
شتمونى شتمتهم خبا جوازي وحيسنى فى البيت

من غير أكل ولا شرب ما صدقت إنه نسي يقفل  
الباب كان سكران زى عادته هربت وجيت السفاره  
جرى ورايا ودخل السفاره قدامكم وضربنى  
وشتمنى وهو سكران وفى السفاره شتمونى  
وضربونى زى ماتت شايقه لا الحكومه عايزاتى ولا  
اهلى عايزينى اروح فىن يارب اروح فىن يا ربى؟

- موظف : (الورده) يلا يا بنت انت شوفى مصلحتك وابعدى  
السفاره عننا على الصبح  
ورده : منك الله.. منكم الله (تخرج)  
موظف : (لعبد الله) عايز إيه يا حضرة خلصنا  
عبد الله : عايز أعمل شهادة ميلاد لابنى  
موظف : هات حق الدمغه ٢٠ دولار  
عبد الله : عشرين دولار دى اتنين جنيه  
الموظف : تمنها فى مصر اتنين جنيه هنا عشرين دولار  
عبد الله : ماشى  
الموظف : وضريبة مبيعات ٢٠ %  
سميرة : مبيعات ليه بيقول لك شهادة ميلاد  
الموظف : دى تعليمات واشتراك فى القنصلية على السنة  
ثلاثين دولار  
عبد الله : كمان ثلاثين دولار اشتراك فى السنة؟!  
الموظف : أيوه

- عبد الله : اشتراك قنصلية يعنى إيه؟
- الموظف : مش القنصلية هنا بتخدمكم وبتقوم بواجبها وتحميكم
- سميره : يلا يا خويا.. يلا (تحدث عبد الله)
- (رجل يسقط من الطابور.. ضوضاء)
- الموظف : فيه إيه؟
- رجل ١ : الراجل مات
- الحارس : مات (ينتفحص الرجل) أيوه مات إنا لله وإنا إليه راجعون يا سعادة البيه
- السفير : (يخرج) راجل مات إزأى؟
- الموظف : يا حول الله بقاله تلت شهور بيجي كل يوم عايز يطلع شهادة ميلاد لابنه
- السفير : اتصلوا بالإسعاف تيجى تأخذه وشوفوا قرايبه أو بلدياته يلموا له فلوس علشان يشحنوه
- عبد الله : دا مات فى السفاره ومصرى ولازم السفاره تقوم بالتواجب معاه وتبعته بلده
- السفير : حتفهمنى شغلى يا حضرة
- عبد الله : لا بس احنا بندق فلوس خدمات فى القنصلية ثلاثين دولار فى السنة
- السفير : أيوه
- عبد الله : مش دى خدمات؟

السفير	: لا مش خدمات.. الخدمات المبنى الى ساكنين فيه السفاره إيجاره ثلاثين الف دولار فى الشهر مرتبنا كمان.. مش دى خدمات
عبد الله السفير	: الرجل الذى مات مسئولية مين؟ مسئولية الناس الطيبين أمالك تبرع له بحاجه ولموا من المصريين الحلوين (يخرج متديلاً) تبرعوا.. تبرعوا لدفن المواطن المصرى الذى مات بضربة شمس فى سفارة الدوله الشرقيه. اليوم له وغدا لك تبرع يا فاعل الخير والثواب عند الله
عبد الله المخبر	: مش معقول الذى بيحصل دا يا سميره (يخرج) لا
عبد الله المخبر	: (لعبد الله) إيه مش عاجبك بتشتب مصر يا خاين؟ لا أنا مش خاين.. أنا مصرى ووطنى كمان
عبد الله المخبر	: الخرس
عبد الله المخبر	: خرست
سميره المخبر	: انت جأى هنا تعمل إيه؟
سميره المخبر	: جالنا ولد عقبالك ياخويا
سميره المخبر	: حضرت دمغه ٧٢ دولار؟
سميره المخبر	: ٧٢ دولار دمغه. قول سبعة جنيه ونص دمغه. دا غير ضريبة المبيعات
موظف	: أبخلوا على بلدكم يا سيدى.. يا سيدى ادفع وخلصنى

- سميره : ادفع ياخويا وخلصنا
- رجل صعيدى : ياخوى عازين ورقه عشان نطلع بيها جثة عوضين
- سميره : عوضين مات.. يا مصيبتى.. يا سبى يا جملى
- عبد الله : يا سميرو احنا ما نعرفش عوضين بلاش الحاجات دى
- موظف ٢ : هي السفاره كمان مسئوله تدفنكم؟
- عبد الله : (للرجل الصعيدى) السفاره بتقبض من المصريين بس. تاخذ ماتديش.. علينا تدفع وبس
- موظف ١ : انت بتسألش يا أستاذ؟
- عبد الله : ابدأ والله.. أصل أنا دلوقت فهمت
- عبد الله : السفاره فى الخارج.. تودى جوابات وتجبب جوابات المسئولين وتجمع فلوس المصريين
- موظف ٢ : بطل فلسفه.. حتسمى الولد إيه وخلصنا؟
- عبد الله : محارب
- موظف ٢ : محارب.. محارب.. (يلزع الموظف)
- سميره : أيوه ياخويا محارب واسم ينفع مع الأيام دى.. اللعبة الجايه حرب.
- موظف ٢ : مش ممكن نسمى الاسم دا فى شهادة الميلاد
- سميره : ليه ياخويا؟
- عبد الله : ما هى الناس كلها هنا بتسمى محارب وحرب

## وحرمان وحروب

- موظف ١ : مش تسميه أحسن سلام وسويلم وسليم ومهادن  
وخاندل ومطيع وساكت وناسى.. وراضى وقابل  
وخانع وخاضع.. اختار
- عبد الله : فين السفير.. فين السفير.. فين السفير.. أنا اسمى  
ابنى زى ما أنا عايز ح اسميه محارب فين السفير؟
- الرجل : أيوه.. فين السفير عايزين ورقه ندفن عوضين..  
الصعيدى : عوضين مات
- السفير : لميتوا حق شحن الجثة فى المطار والإجراءات  
والذى منه
- الرجل : حصل يا باشا لمينا الفلوس من على القهاوى  
الصعيدى : والبيوت بتاعة العراب
- السفير : خلاص مفيش مشكلة.. خد منه الرسوم يا علاء  
واديله الورق
- الموظف : حاضر يا سعادة السفير
- السفير : مدوخنا معاكم
- عبد الله : الله يكون فى عونكم.. دايما نتحكم معانا وانتم  
بتدونا الورق
- سميره : وخلصونا من شهادة ميلاد عنتر الواد بلاش  
محارب سموع عنتر.
- السفير : وخلص الناس دول (يشير لعبد الله وسميره)

(تدخل مظاهرة تحيط بالسفارة.. لافتات مكتوب عليها تسقط الحكومة.. يسقط.. يسقط.. لا للخيانة)

عبد الله : إيه دا.. المظاهرة دي ليه (ويهتفون فى المظاهرة.. يسقط المصريين.. يسقط الخونة)

السفير : (لعبد الله) شايف المظاهرات بتشتعلنا

عبد الله : هما بيشتموننا؟

السفير : مش سامع بيهاجموا القيادة بتاعتنا

سميره : يا لهوى!

السفير : أرسل إشارة للقاهرة

الرجل : وقولهم عوضين فى الطريق

الصعيدى

عبد الله : بلا نهرب يا سميـره.. بلا نرجع لبلدنا تانى.. نرجع لمصر تانى

سميره : بلا ياخويا (ستار اللوحة) (يفتح الستار.. قسم الشرطة.. كتب على لوحة مخفر.. يجلس الضابط وشرطيان يقفان.. ضوضاء فى الخارج)

عبد الله : هو الغلطان

شرقاوى : انت الغلطان

الضابط : إيش فيه؟

عبد الله : خربلى العربية بتاعتى الفيات وهو بعريته الأمريكانى كسر هالى يا بيه



- الضابط : (يظهر لعبد الله) بس.. ولا كلمة (ينظر بتودد وحنان للشرقاوى) إيش اللي صار.
- الشرقاوى : ها المصرى ماشى على سرعة سلاحف.. ضربته قدامى هو الغلطان.. ماكوو حد هنا يمشى بسرعة ثلاثين كيلو
- عبد الله : دا كان ماشى بسرعة ١٤٠ كيلو فى الساعة
- الشرقاوى : وانت شنهو.. شاكو
- الضابط : مين اللي ضرب التاتى من الخلف بالسيارة
- عبد الله : هو.. ببقى هو الغلطان.. مش دا قانون الدولة
- الضابط : أيوه لما بيحى اتنين شرجاويين يدعمون بعضهم يسبقى اللي ضرب من الخلف غلطان.. ولما يجر واحد أجنبى هو اللي دعم من الخلف ببقى غلطان حتى ولو مدعوم من الخلف يكون غلطان
- عبد الله : يعنى الأجنبى غلطان.. سواء من الإمام أو من الخلف
- الضابط : الله ينور عليك
- عبد الله : دا منتهى العدالة
- الضابط : أى نعم.. والحين هاتلك كفيل شرجاوى يكفلك
- عبد الله : مش فاهم.. يكفلنى يعنى إيه؟
- الضابط : يعنى بضممنك
- عبد الله : الوزارة أنا شغال عندكم فى وزارة التربية

الضابط : الوزراة ما تكفلك لازم واحد شرجاوى  
عبد الله : أنا معرفش حد شرجاوى  
الضابط : زين ما انت طالع.. دش السجن  
عبد الله : أنا عندي فكره  
الضابط : جول  
عبد الله : هو يجيب واحد شرجاوى يكفلني وأنا أجيب واحد  
مصري يكفله أعرف مصريين كتير وهو يعرف  
شرقاويين كتير  
الضابط : تتغشمر معايا.. تهزر  
عبد الله : ما بهزرش معاك  
الضابط : انت الحين حتكون في السجن  
عبد الله : ممكن اكلم مراتي في التليفون  
الضابط : كلمها  
عبد الله : (يمسك الهاتف) آلو  
سميره : (بصوت من خارج المسرح بعد الهاتف) أبوه يا  
عبد الله كل دا رايح تشتري عدس من الجمعية  
بتتكلم منين؟  
عبد الله : من المخفر  
سميره : مخفر؟!  
عبد الله : الحقييني يا سميره.. جاوزين كليل شرجاوى  
سميره : ليه.. عملت إيه قتلت حد؟

عبد الله : لا واحد شرقاوى ضربنى وبوظ لى العربية وقالوا  
لى انت غلطان وهات لك كفىل  
سميره : كفىل  
عبد الله : روحى لخالك وروحوا المدرسة.. يشوف لى الناظر  
سميره : حاضر (يضع السماعة)  
الشرقاوى : أنا ماشى  
الضابط : مع السلامة فى إمان الله  
عبد الله : يمشى إزاي؟  
الضابط : وانت ايش بتريد منه.. يمشى.. عايز إيه منه؟  
عبد الله : وعربيتى اللي بوظها؟  
الضابط : واحنا مالنا (تدخل سميرة ومعها خالها ورجل  
شرقاوى شاب عنده ٢٧ سنة بدوى)  
الخال : ليه فيه إيه  
عبد الله : جيبتوا لى كفىل؟  
سميره : أيوه يا عبد الله  
عبد الله : محسن.. محسن صديقى.. بواب المدرسة الزين  
الشرقاوى بواب المدرسة الزين  
محسن : وايش فيك (يحدث الضابط كشريط يجرى بسرعة  
وبلهجة غير مفهومة منها أى شىء)  
محسن : هاشى ماشى... شواشى  
الضابط : دا درتش.. ما تماش.. ما عماش

محيسن : شماس.. شاشى  
الضابط : فاشى.. فاشى  
الضابط : فاشى.. فاشى  
محيسن : الله بالخير  
الضابط : الله بالخير  
محيسن : سلامو عليكم  
الضابط : سلامو عليكم يا محيسن  
سميره : يلا يا أستاذ عبد الله  
سميره : يلا يا أستاذ عبد الله  
الخال : بسوطة بسوطة.. بس العربية باظت خالص..  
(يخرجون.. عبد الله (يقنى بلادى بلادى) (يفتح  
الستار على مطار القاهرة الدولى.. ينزل عبد الله  
من الطائرة) .  
موظف : حمد الله على السلامة  
عبد الله : الله يسلمك  
موظف : معاك فيديو؟  
عبد الله : لا  
موظف ١ : معاك أدوات كهربية؟  
عبد الله : تلفزيون ١٦ بوصة ومكوه ومسجل  
موظف ٢ : ١٦ بوصة يبقى حسابك ٢٨٠٠  
عبد الله : ٢٨٠٠ جنيه ليه؟

- موظف : دا قاتون الضرايب.. دا دين بسوط يسدد لبلدك اللى بتحميك فى الغربه
- عبد الله : انت شايف كده بتحمينى طبعاً طبعاً فى الغربه طبعاً طبعاً
- موظف : طبعاً
- عبد الله : لو رحت هناك مش حتلاقى حد يحبك لو رحت هناك فى السفاره حتلاقىهم بيحموك حمايه ما حصلتش بالعصا
- موظف ٢ : خلصنا
- عبد الله : أنا ممعيش فلوس مش عايز التليفزيون
- موظف ١ : عايزه مش عايزه حتدفع
- عبد الله : خدوه.. خدوا التليفزيون
- موظف : برضه حتدفع.. ما دام جليبه
- عبد الله : ادفع حاضر
- سميره : ادفع يا عبد الله وخلص
- عبد الله : حاضر أنا عايز ابلغ عن اللى بيحصل للمصريين هناك
- موظف ١ : بلا يا خويا خلصنا بقى.. بلغ بدين
- عبد الله : ابلغ مين؟
- موظف ١ : المسئولين.. بلغ الحكومه
- عبد الله : هم فين المسئولين.. هي فين الحكومه

- موظف ٢ : ايش عرفنى خلصنى  
عبد الله : يلا  
موظف ١ : الشنط دى فيها ايه؟  
عبد الله : كتب  
موظف ٢ : كتب.. افتح الكتب.. لازم نعرف الكتب دى بتقول  
ايه.. تأليف مين هدفها ايه.. الكتب دى  
عبد الله : يعنى ايه؟  
موظف ١ : الرقابة.. عايزين الرقابة على المصنفات تيجى هنا  
حالا

(انتهاء الفصل)

## الفصل الثانى

(يفتح الستار على علم الدول الغربية.. علم أحمر  
وفى وسطه دولارات واضحة.. الباب الخارجى  
للسفارة كتب عليها السفارة بخط عربى لوحة  
قمائش أهلاً بك يا أخى العربى / المصرى فى بلدك  
الدولة الغربية)

- |          |   |  |
|----------|---|--|
| الزمن    | : | صباحاً مع صلاة الفجر                               |
| الشرطى   | : | (يتقدم عبد الله) نعم                               |
| عبد الله | : | مش دى برضه السفارة بتاعت الدولة العربية<br>الغربية |
| الشرطى   | : | أيوه.. أنا اتهايا لى شفتك قبل كده                  |
| عبد الله | : | وأنا كمان  |
| الشرطى   | : | أنا زى شفتك فين شفتك فين                           |
| عبد الله | : | وأنا فاكّر شفتك.. شفتك فين                         |
| الشرطى   | : | إنت بتشتغل إيه؟                                    |
| عبد الله | : | مدرس.. وإنت؟                                       |
| الشرطى   | : | (يضحك) زى ما انت شايف شرطى حراسة سفارات            |
| عبد الله | : | حراسة سفارات.. كنت واقف من قيمة سنتين عند          |

## الدولة العربية الشرقية

- الشرطى : آه مضبوط  
عبد الله : الله إنت سافرت وجيت؟  
عبد الله : وجيت.. وجيت.. (يبكى)  
الشرطى : جيت وتبكى ليه؟  
عبد الله : جيت قلت بلدى وإن جار الزمن على عزيزة  
الشرطى : ما طلعتش عزيزة؟  
عبد الله : طلعت نفيسه  
الشرطى : إزأى يابنى.. قل لى  
عبد الله : أنا أول ما جيت رحت البنك اسأل على الفلوس اللى  
بأحولها على شركة الحاج شعبان للصرافة  
والاستثمار لقيتهم مسكوا الحاج شعبان وقبضوا  
عليه وسجنوه طيب يا جامعة فلوسنا وحاجتنا قالوا  
عند الحاج شعبان رحنا للحاج شعبان فى السجن  
قال لنا طلعونى وأنا أدبكم فلوسكم وأبيع أنا الحاجه  
اللى عندى وأسدد ديونكم.. يا حكومة طلعي الحاج  
شعبان من السجن علشان يدينا فلوسنا قالوا لك هو  
يقول لنا شايئها فين واحنا نديها لكم.. يا حاج  
شعبان إنت شايئ فلوسنا فين علشان الحكومة تديها  
لنا.. الحاجه شعبان يقول أنا عندى قاتمتين قاتمة  
بأسماء المسئولين وكبار الرجال فى الدولة من



سياسيين وفنانيين وصحفيين ولاعبة كوره ورجال  
وعلماء دين ودا اسمه "كشف البركة" .. دول  
سحبوا فلوسهم مع اتهم وصلتهم فلوسهم فوايد..  
أدونى الفلوس دى بأوزعها بالعدل يا حكومة فيه  
كشف اسمه البركة ضربونى وقالوا بطل حركات..  
يعنى اللى شقيت بيه ضاع.. قالوا لك الحكومة مش  
حتسكت (مشهد لعذاب الناس بين الحكومة وبين  
الحاج شعبان خلف القضبان)

- الشرطى : أيوه الحكومة مش حتسكت كل يوم الجرايد بتكتب  
عبد الله : والكتابة دى فايدتها إيه؟  
الشرطى : يا ابنى انت لسه قايل بلادى وإن جارت على عزيزة  
عبد الله : فيه شاعر تونسى اسمه محجوب العيارى بيقول  
بلادى وإن جارت على فليست عزيزة. وأهلى إن  
ضنوا فليسوا كرام.  
الشرطى : يعنى إيه؟  
عبد الله : يعنى كل اللى حولته ضاع فى انتظار حل المشكلة  
بين الحكومة والحاج شعبان. ودى مشكلة أكبر من  
مشكلة لبنان.. قلت لك روح يا عبد الله البلاد  
الغربية مش عايزة كارت زيارة ولا عدم ممانعة ولا  
كفيل ولا عويل  
الشرطى : برضه أحسن

- عبد الله : مين دا اللي جاي هناك؟
- الشرطي : دا عمك متولى راجل عجوز كل يوم يجيء يسأل عن ابنه اللي سافر من سنتين
- متولي : سلامو عليكم
- عبد الله : وعليكم السلام
- متولي : أظن فيه أخبار عندكم النهاردة.. (ينظر لعبد الله) عندك أخبار؟
- عبد الله : لا والله يا عمي
- متولي : أمال انت مين.. مش السفير
- عبد الله : لا أنا مش سفير ولا حتى غفير أنا حتة موظف كحيان باشتغل مدرس واسمى عبد الله
- متولي : مدرس يعني حاجه حلوة فى حياتنا.. انت ماسك فأتوس منور العقل
- عبد الله : فأتوس.. فى زريبة عجول يا عم متولى الفصل فيه ٧٠ و ٨٠ عيل قاعده على الأرض من غير تخت..
- عيل بققاطين وعيل عريتين خليني ساكت
- متولي : شوف يا أستاذ أنا كنت صول فى السواحل يعنى فأتوس يحمى الموانى والصكرى دا فأتوس يحمى كل مؤسسة
- عبد الله : هو الصكرى كمان فأتوس.. انت بتشتغل بباع فواتيس

- متولي : احنا بنحمى البلد انت عقلتها وأنا باحميها من العدو  
والراجل دا بيحمى البلد من اللصوص اللي جوه  
عبد الله : أيوه اللصوص اللي جوه ما يقدرش يصكرو دا  
الراجل الغلبان الطيب يحميها.. حتى الفاتوس مش  
قادر عليهم.. القاتون بقى ضعيف شايف شرير..  
عايز فاتوس  
متولي : أنا عارف القاهرة شارع.. شارع.. حارة حارة..  
بيت بيت.. من غير ما اشوف تعرف ليه لأنها  
ببساطة هي بلدى ودول ناسى.. واللى ينسى إيه  
معنى بلاده ولا ناسه يبقى على الدنيا السلام  
عبد الله : على الدنيا السلام.. دا مظلوط.. الحكاية خلاص  
فلتت من إيدنا  
متولي : يبقى كل واحد يبقى وحش.. مين ينام ومين يقوم  
كل جار يبقى شايل لجاره خوف وقلق  
عبد الله : والا فاتوس.. يا راجل يا فاتوس الناس بتسرق لحم  
الناس الغلابة قوت الغلابة وسط النهار.. احنا فى  
عالم دبابه عايشين فى غابة  
متولي : ليه يابنى ليه تقول كده روح وفوت على الحسين  
والقلعة والا اتزلك عندى جنب المجاورين المتكر كل  
اللى مات واللى سرق واللى اتسرق كله مات  
والحساب يوم الحساب.

- عبد الله : والوطن لما اتسرق.. واللى سرق إيه معنى  
الوطن.. الوطن يبقى رخيص نضيف مفهوش رمل  
مفهوش دود مفهوش زلط الوطن يبقى سكن مش  
معقول باسمنت تالف.. الوطن يبقى فرحة يبقى  
رافقه.. يبقى إمان
- متولي : يبقى فرحة.. يبقى قمحة.. يبقى مصر اللي دخلها  
الهكسوس والفرنسويين والاتجليز والصهاينة واللى  
فضلت هي هي
- عبد الله : فاتوس برضه
- متولي : فاتوس مصر هي هي في عيون بنتي بنية يوم ٩ و  
١٠ يونيه ويوم ١٨ و ١٩ يناير ويوم ٦ أكتوبر  
ابني عدي وكان بطل لما جه لقي البطل واحد بس  
هو فين؟
- عبد الله : الله يرحمه.. وآه يا زمن (يدخل موظف السفارة)
- متولي : نعم؟
- موظف : ابني
- متولي : ابنيك يا حاج اسمه شويه.. ما جالناش خير
- موظف : يعني بعنوا تسألوا عليه؟
- متولي : آه والله.. هاتي للحاج يا ورده حاجة ساقعه
- موظف : يا سلام يا سلام.. هي دي العروبة مش زي البلد  
عبد الله : الثانيه العروبة الشرقية.

موظف	:	ها دول ياخوى ربنا يهديهم
عبد الله	:	ربنا كبير.. أنا أسمى عبد الله
موظف	:	أنا عايز أسافر بلدكم أنا عايز فيزا
موظف	:	ماكوا فيزا.. باهى.. انت تمشى على طول.. تمشى على طول تدخل لحدودنا بنرحب بأى مواطن عربى
عبد الله	:	معقول الكلام دا أنا فى حلم والا فى علم
موظف	:	فى علم ياخوى.. باهى ماكوا فيزا
عبد الله	:	يا سلام.. يا سلام هى دى العروبة والا فلا (يشير له) مفيش كفىل متأكد
موظف	:	ماكوا كفىل باهى
عبد الله	:	ح أخذ مراتى وأسافر
الموظف	:	سافر
عبد الله	:	ما فيش لا فيزا ولا كارت زيارة ولا عدم مماتعة ولا كفىل
الموظف	:	لا ماكوا.. باهى
عبد الله	:	أكو خير وباهى جداً
عبد الله	:	(يتحرك الديكور إلى مطار الدولة العربية الغربية.. علم البلاد مرحباً بكل عربى) (صف طويل من المصريين يقف فى المطار)
الشرطة	:	(يمر شرطى يجمع الجوازات من المصريين) المصريين جوازتهم

عبد الله : انتم مصريين؟  
المجموعة : أيوه.. فيه حاجة؟  
عبد الله : هي الدولة سابتم تيجوا هنا كدا؟  
المجموعة : أيوه.. غلاية يا بيه  
عبد الله : منكم مدرسين ومهندسين وعلماء  
المجموعة : احنا على باب الله لا مؤخذه  
عبد الله : ما أنا عارف  
سميره : يا عبد الله مالكش دعوة  
الشرطة : اجف انت وهو عدل  
المجموعة : زى الناس يا بيه.. زى انت ما جيت لا مؤخذه  
سميره : مش دا الواد شلاطة.. (تشير إلى أحدهم)  
عبد الله : آه صحيح دا هو.. شلاطة يا شلاطة  
شلاطة : أيوه.. (بكبرياء شديد) اسمى المهندس شلاطة  
عبد الله : عارفك مش انت السباك بتاع شارعنا  
شلاطة : أيوه  
عبد الله : دا انت بتلخد فى الحنفية ٢٥ جنيه تركيب وتغيير  
شلاطة : ٢٥ جنيه يعنى مرتب وزير فى اليوم يا  
شلاطة.. وإيه اللي جابك هنا جأى تعمل إيه يا  
شلاطة؟  
شلاطة : جأى القلب عيشى ولا مؤخذه اصل الواحد فى مصر  
ميعرفش يحوش.. هناك بيحوش.

- عبد الله : البركة.. البركة يا شلاطة والا قلت لأن فلوسك فى مصر مش حلال
- شلاطة : جرى إيه يا فندي هو انت ح تعمل على واعظ ولا مؤخذاه؟! :
- عبد الله : ولا مواعظ ولا حاجة.. الموضوع بسيط جداً.. لا مؤاخذه
- سميره : بص يا عبد الله بص مش دا اللي واقف هناك صاحب العمارة اللي جنبنا.. اللي مرضيش يسكننا الا بأربعين ألف
- عبد الله : آه صحيح وإيه اللي جنبه هنا.. دا الحاج برعى
- سميره : مش عارفه؟
- برعى : ازيك يا أستاذ.. ازيك يا أستاذ.. ازيك يا أستاذ
- سميره : بتعمل إيه يا حاج برعى؟
- برعى : بشتغل هنا
- عبد الله : ما شاء الله
- برعى : الشغل كتير.. باشتغل هنا حارس.. يعنى بواب لا مؤاخذه وبلقط رزقى
- عبد الله : حارس.. بواب عجيب ليه؟
- برعى : ما هو أنا بأخد العمارة حراسة وكاله وساعات بأجر الشقق من صاحب العمارة ولكن بمزاجى بالأس
- عبد الله : الرأس يعنى البنى آدميين باحسبك فتحت محل

مسمط

- برعى : لا  
الشرطى : الجوازات (يلقى بالجوازات على الأرض يجرى  
المصريون لأخذها) ويعدين وياكم يا المصريين  
(يخلع الحزام ويضربهم)
- عبد الله : إيه دا.. إيه.. دا  
الشرطى : النظام.. النظام.. امتى تتعلموا النظام؟ (يضربهم)  
هاتوا الجوازات أوزعها
- عبد الله : أبوه أحسن كده انت وزعها  
الشرطى : حسن حسين (يفتح الجواز)  
افندم
- رجل ١ : (يلقى بالجوازات على الأرض يجرى المصريون  
لأخذها) ويعدين وياكم يا المصريين.. (يخلع الحزام  
ويضربهم)
- عبد الله : إيه دا.. إيه.. دا  
الشرطى : النظام... النظام.. امتى تتعلموا النظام؟ (يضربهم)  
هاتوا الجوازات أوزعها
- عبد الله : أبوه أحسن كده انت وزعها  
الشرطى : حسن حسين (يفتح الجواز)  
افندم
- رجل ١ : (يلقى بالجواز على الأرض عبد الله يندهش..  
الشرطى : (يلقى بالجواز على الأرض عبد الله يندهش..



الرجل يأخذ الجواز فرحا وينطلق خارج المسرح)

عوض عوضين

رجل ٢ : أقندم.. (يلقى الشرطى بالجواز على الأرض نفس

الشيء) ليأخذه الرجل ويمشى

الشرطى : على عليوه.. (نفس الحركة)

رجل ٢ : أقندم

الشرطى : محمد محمدين.. (نفس الحركة)

رجل ٤ : أقندم.. (نفس الحركة)

الشرطى : عبد الله عبد المطيع

عبد الله : استنى ما ترميش الجواز أنا واقف جنبك اهه

الشرطى : ليش يعنى.. انت شاكو.. هاجوزك.. باهى. (يلقيه)

(الإضاءة تلعب دورها فى هرج ومرج وسقوط

الجوازات)

(سميره وعبد الله فى دائرة ضوء.. ظلام فى الخلف

مع موسيقى وتغيير فى الديكور سريعا.. لأحد

الشوارع)

(مظاهرة فى الشارع.. يحملون لافتات وصورة

زعيم يفضل صورة المخرج أو المؤلف إن أمكن

حتى لا تكون هناك حساسية عربية أو رقابية)

رجل يهتف : لا غربية ولا شرقية احنا عابزينها عربية

رجل يهتف : لا شمال ولا جنوب احنا مع بعضنا بندوق

المجموعة	:	لا شمال ولا جنوب احنا مع بعضنا بندوب
عبد الله	:	(يقف على الرصيف) يا سلام الوحدة العربية يا سميره.. (يبكى)
سميره	:	بتبكي ليه يا عبد الله ؟
عبد الله	:	أبوه يا سميره حلم مينا وحلم احسن وحلم صلاح الدين وحلم عبد الناصر وحلم كل الناس يا سميره (يبكى)
سميره	:	كفايه يا عبد الله احسن بدين ح اعيط حلمي مين دا بيتكلم عنه
عبد الله	:	مش حلمي يا سميره.. حلم.. حلم
شرطى	:	(يدفع بصورة لعبد الله فى يده وصورة فى يد سميره) يلا.. يلا يا عيني.. باهى
عبد الله	:	متشكر.. متشكر عندى صور كتيره
شرطى	:	ليش تبكى؟
سميره	:	أهو بيبكى أهو ومتأثر.. زعلان على حلمي صاحبه اللي مات
شرطى	:	مساكو بكا.. اكو عمل.. خد اللافتة انت وزوجك وامشوا
عبد الله	:	نمشي فين؟
سميره	:	عند حلمي
شرطى	:	فى المسيرة فى المظاهرة.. باهى.. زين.. يالا يا

بنى  
 عبد الله : أصل أنا  
 شرطي : ماكو أنا.. امشي  
 رجل هتيف : يسقط... يسقط كل الخونه  
 عبد الله : مين الخونه بس افهم؟  
 شرطي : الدولة الشرقية.. عملاء وجواسيس  
 عبد الله : والله ما حدش قال لي.. ما حدش قال لي  
 شرطي : أنا بأقولك وها دولاً. دول خونه رجعية. عملاء.  
 خونه. جواسيس.  
 عبد الله : أدري.. أدري.. جئت لا أعلم من أين ولكني أتيت  
 شرطي : الحين تدري.. يلا  
 عبد الله : يلا.. يلا.. يلا يا سميره  
 شرطي : يلا يا سميره  
 سميره : اعمل إيه يا اخويا اصوت.. اصوت  
 عبد الله : يلا يا سميره صوتي وعيطي  
 سميره : حاضر يا حلمي (ينقسم المسرح إلى مظاهرتين في  
 الخلفيه الدولة الشرقية تقسم مظاهرات وفي  
 المستوى الأول الدول الغربية تقسم مظاهرات وتتدد  
 (من الممكن أن يستخدم في حالة فقر الامكانيات في  
 المظاهرة في الخلفية بدلاً من الممثلين بلوحات  
 خشبية تهتز يحركها عمال المسرح عليها أعلام

الدول الغربية.. وفى حالة وجود إمكانية استخدام  
فيديو أو سينما فى الخلف للمظاهرات فى الدولة  
الشرقية)

هتيف الشرقية : ها دول الملاعين.. القتل.. الى ما يعرفوا ربهم  
هتيف الغربية : ها دول الخونه.. الصلاء الأكدال.. الى ما يعرفوش

ربهم

مذيع الشرقية : هنا إذاعة الدولة الشرقية لقد قدمنا مساعدات مالية  
وإنسانية للدول الغربية التى هى عربية للأسف

صحف شرقية : ماذا أقول باسم كل الصحفيين فى الدولة الشرقية  
نستنكر ونشهد العالم المتحضر أن يرى بألم عينيه  
ما يحدث

صحف الغربية : ما يحدث قد حدث وسوف يحدث ولن يحدث الا بما  
حدثتم ونشاهد العالم المتحضر أن يرى بألم عينه  
وقفاه ما يحدث

عبد الله : صح.. صح  
(جماهير الدولة الغربية تقترب من عبد الله الذى  
جلس على الرصيف ومعه سميره)

شرطى : وينك ليش جاعد.. ها الخونه

عبد الله : مين.. دول الخونه

شرطى : الجماعة بتوعكم

عبد الله : أوعى الكلام دا فى المسرحية أحسن بفصلوك

ويقول لك رقابة الجماعة بتوعكم كفاية عرفت مين

دول؟

شرطى : أيوه.. انت بتأيد الجماعة بتوعكم هناك (يخرج

مسدسه)

عبد الله : اقول إيه يا سميره؟

سميره : مش عارفه (ترتعد)

عبد الله : ما أصلك مش واخد بالك.. الجماعة بتوعنا هناك ما

بيخدوش رأى فى الحاجات دى ولو أخذوا رأى كنت

أتكلم معاهم.

سميره : أيوه يا خويا والننى كان كلمهم.. عبد الله جد

ويعجبك

عبد الله : أيوه.. أنا جد الجد كمان بس ما حدش بيعبرنى

وياخذ رأى من الجماعة بتوعنا

شرطى : يعنى انت فاهم ايش جماعتك يسوون

عبد الله : (ينظر رجل يقف من بعيد) الحقى يا سميره فيه

واحد مخبرات بيص على من جماعتنا

سميره : يا لهوى يا خويا.. ح تعمل إيه؟

عبد الله : يشوف الحقيقه.. أنا مش بأيد وفى نفس الوقت

مأيد.. أيوه مش مأيد وف نفس الوقت بأيد لماذا؟

لماذا أنا مؤيد لأن التأيد والتأييد فى حد ذاته عمل

إيجابى من الحياه.. ومش مأيد لأن الحياه صعبة

وخرجه.. نعم ونعم ولا.. ثم لا.. أين العروبة.. أين  
العروبة كيف يكون الوطن العربى هكذا (يتركون  
المظاهرات ويلتفون حوله ويصمتون) نعم كيف  
يكون ما كان.. وما ينبغي نعم ينبغي.. كيف  
يتجرؤن ولماذا.. هؤلاء كانوا يكونوا.. فما كان  
كان.. وما بان بان (يصفقون بحرارة)

- الشرطى : (يجذبه) ولد.. انت حتملهم علينا؟!  
عبد الله : (وهو يرتعد) اعمل إيه يا سميره؟  
سميره : اصوت يا حلمى (تقصد حلمها وليس اسم شخص)  
الشرطى : عايز شتيمه واضحة موقف واضح  
عبد الله : ما أنا واضح جدا قدامك ايه  
سميره : اصوت يا حلمى  
الشرطى : موقفك من الجماعة بتوعكم اولاً وموقفك من  
الشرقيين ثانياً  
عبد الله : الجماعة بتوعنا.. صحيح هما مش كانوا اصحابكم  
رايحين جايين.. أنا وانت ملئناش دعوة.. لما الكبار  
يزعلوا من بعض.. نقف أنا وانت ايش دخلنا صح  
والا.. لا..  
سميره : آه والنسبى يا خويا احنا ملئناش ذنب احنا جايين  
ناكل عيش  
عبد الله : وتنور فوانيس

- الشرطى : شنهو فواتيس  
عبد الله : فواتيس العلم والحضارة هما قالوا لى كده فى الكتب الصفرا
- الشرطى : حدد موقفك  
عبد الله : احدد موقفى من إيه بس؟  
الشرطى : حدد موقفك انت مع مين؟  
عبد الله : مع الله  
الشرطى : مع الشرقيين والا معانا والجماعة بتوعكم؟  
عبد الله : الجماعة بتوعنا عمرهم ما اخذوا رأى فى حاجه والله
- الشرطى : وإزأى انت عايش  
عبد الله : أقول إيه يا سميره؟  
الشرطى : سميره.. سميره.. قولى انتى يا سميره  
سميره : احنا عايشين يا خويا زى كل الناس بناكل ونشرب ونشوف المسلسل وننام.. زى كل الناس.. هو انتوا مش كده يا خويا زينا برضه
- الشرطى : لا.. احنا عندنا مؤتمرات عندنا لجان.. عندنا حزب عندنا قوه جماهيريه.. قوه ضاربة  
سميره : ربنا يزيدكم كمان وكمان.. احنا كنا كده زيكم زمان عندنا وبعدين حلو الحاجات دى وعملوا أحزاب.. عندنا عشر أحزاب يا خويا

- الشرطى : يا سلام  
سميره : احنا يا خويا مقدمين طلب شغل أنا وجوزى عبد الله  
احنا مدرسين
- الشرطى : ما شاء الله.. ما شاء الله على كل حال معاليا كارت  
خدوه دا لواحد قريبى فى الوزارة وان شاء الله  
يسير خير باهى زين
- سميره : باهى زين  
عبد الله : باهى زين
- (مع موسيقى سريعة يسكن عبد الله داخل منزل  
على المستوى الثانى لا يظهر حائط للمنزل من  
اللافتات. يسقط الاستعمار يسقط الخونة.. لا  
للعلاء الشرقيين.. احنا واحنا بس وصورة رئيس  
الدولة (صورة المخرج أو المؤلف تغطى الباب)  
(تخرج مظاهرة فى الشارع)
- الهتيف : هم مين واحنا مين  
المجموعة : هم مين واحنا مين  
الهتيف : هم كوكو واحنا كوكى  
المجموعة : هم كوكو واحنا كوكى  
الهتيف : بوكى بوكى وانتى وأبوكى  
المجموعة : بوكى بوكى وانتى وأبوكى  
الرجل المهم : (يخبط الباب على عبد الله تفتح زوجة عبد الله



السنافذه وهى ترتدى منديلاً مصرياً وهى مفزوعة  
من النوم.. وعبد الله يخرج بالكسوف المصرى  
الصعيدى)

- عبد الله : خير خير فيه إيه.. فيه انقلاب؟  
الرجل المهم : انقلاب شتهو  
عبد الله : آمال فيه إيه؟  
الرجل المهم : انت المدرس المصرى عبد الله عبد المطيع  
وجوزتك الأستاذة سميره عبد الهادى؟  
عبد الله : مظلوط  
الرجل المهم : انت يا خويا مالك موقف  
عبد الله : خير فيه حد من التلاميذ كتب عنى تقرير والا حاجه  
الرجل المهم : انت لازم يكون لك موقف  
عبد الله : والله أنا عمرى ما غلطت فى حد فى المدرسة  
الرجل المهم : انت ايش تكون  
عبد الله : عبد الله  
الرجل المهم : فيه فى بلدك كام حزب؟  
عبد الله : ما شاء الله كل يوم اقرا عن حزب جديد عايز يقوم  
بينى وبينك احنا العرب عايزين ٢٥٠ مليون حزب  
كل واحد فينا يبقى له حزب بروحه (يضحك عبد  
الله.. لايضحك الرجل.. يخاف عبد الله)  
سميره : انت حتفضل واقف على الباب يا عبد الله؟

- الرجل المهم : انت سامع المظاهرات والمؤتمرات؟
- عبد الله : سامع.. طبعاً
- الرجل المهم : يا أخى انت محيرتنا.. لا تفتح الراديو.. لا تقرأ جرنال لا تتابع الأخبار.. انت ليش عايش.. هدفك ايش فى الحياه؟
- عبد الله : هدفى.. هدفى شوية طوب
- الرجل المهم : طوب
- عبد الله : أيوه شوية طوب وحجارة واسمنت
- الرجل المهم : اول مرة اقبال حد يجول ها الكلام زين ، باهى
- عبد الله : طوب وحجارة واسمنت اعمل بيهم شقة ، أسكن فيها " شوف بلدى واسعة " قد إيه لكن ضيقة مش لاقى فيها شقة
- الرجل المهم : خلتنا فى المهم
- عبد الله : أنا طول عمرى احب الحاجات المهمة
- الرجل المهم : انت فى اتهو حزب فى بلدك؟
- عبد الله : (بضحك) ولا حزب ولا حزب
- سميره : (من خلف النافذه) ولا حزب يا خويا والنبي وعبد الحليم كان دايما يغنى على حزب وداد قلبى
- عبد الله : أيوه صحيح ولا حزب يا خويا والنبي
- الرجل المهم : طيب حزب الحكومة ما عندكش طموح يا خويا.. تبقى فى حزب الحكومة

- عبد الله : ما قلت لك طموحي شويه طوب وشوية اسمنت للشقة
- الرجل المهم : افرض.. افرض عندك شقة حتعمل إيه حتبقى فى انهو حزب؟
- عبد الله : لما يبقى عندي شقة ح اعمل إيه. ح ابقى فى انهو حزب. حتبقى فى انهو حزب يا سميره؟ (تفتح الشباك)
- سميره : يا عم انت عايز تودينا فى داهيه ليه.. ما هو لو دخل أى حزب وقيد اسمه فيه.. بعد مده يتغير النظام يقبضوا عليه ويسجنوه ويحاكموه لكن يا خويا ابويا عنده حكمة عيش حمار تموت مستور
- الرجل المهم : تموت مستور.. يا راجل انت موقفك إيه؟
- عبد الله : هو موقفى تعبك فى إيه بس؟
- الرجل المهم : عايزين تكتب عنك تقرير
- عبد الله : يا أخى ماليش موقف واللى ما يلزمهوش ما هي فيه ناس عندها مواقف مواقف كبيرة وما تجيبش عيال وناس عندها مواقف ويتأخذ حبوب مقويات واللى شال موقف يستريح
- الرجل المهم : اسمع.. احنا عايزينك يا إما فى لجنة وطنية أو فى حزب ثورى
- عبد الله : عايزين مدرسين.. انتم عنديكم أميه فى اللجان او

وطنية ولا في الحزب الثوري؟

الرجل المهم : لا انت بتخرف. (يشخط فيه) اتكلم عدل  
عبد الله : أنا تحت أمرك يا باشا.. دول عايزينى فى اللجان  
الوطنية والحزب الثوري يا سميره  
سميره : (تفتح النافذة) عايزينك تكتب خطاب يا خويا..  
روح.. شوف الخطبة بكلام اديهم خطب ما  
ترحمهمش

عبد الله : اتتو عايزينى اكتب خطاب  
الرجل المهم : لا احنا عايزينك عضو يا حلو.. زين باهى  
الرجل : وقع على الاستمارة  
عبد الله : عايزينى اوقع على الاستمارة يا سميره  
سميره : وقع يا عبد الله  
عبد الله : اشهد ان لا اله الا الله واشهد ان محمد رسول الله  
(يرفع ويغض عينه)  
الرجل المهم : الحين ها الوقت.. الا انت لك عضوية وحماية  
سياسية

عبد الله : يعنى حتبعتوا لى عربية عليها علم واثنين عساكر  
بموتسيكلات قدامى زى المحافظ بتاعنا.. والمرور  
يوسع لى السكه

الرجل المهم : لا مش للدرجه دى  
عبد الله : طيب حتدونى عربية؟

الرجل المهم : مش للدرجة دى  
عبد الله : موتوسيكل؟  
الرجل المهم : لا مش للدرجة دى  
عبد الله : حتدونى عجله؟  
الرجل المهم : مش للدرجة دى  
عبد الله : آمال حتدونى إيه؟  
الرجل المهم : شرف الانتماء كارنيه اهه (يخرجه) لو حد قرب لك  
طلع الكارنيه حيجرى من قدامك  
عبد الله : كارنيه يجرى العفاريه.. يا حلاوة.. يعنى لو أنا  
قعدت بالكارنيه دا فى البلد اطلع بيه العفاريه  
اكسب دهب  
عبد الله : واحد ركبه عفريت اطلع له الكارنيه بهرب اخد على  
كل عفريت خمسين جنيه  
الرجل المهم : دلوقتى أقدر أقول لك مبروك  
عبد الله : الله يبارك فيك.. (يخفيه ويمشى)  
عبد الله : (صوت من الداخل) اعملى لنا عشا لحمه ورز يا  
سميره معانا كارنيه (يظهر اثنان كاتهما فى حالة  
ترقب ينظران يمينا ويسارا يدققان فى عبد الله)  
رجل ١ : افتح (يلتفت يمينا ويسارا)  
رجل ٢ : افتح يا بنى آدم.. (يلتفت يمينا ويسارا)  
(عبد الله يفتح الباب يجذباته يشد الديكور معه)

يتسع ليصبح المسرح كله غرفه عبد الله فى داخل  
المنزل)

- عبد الله : إيه دا دخلتوا البيت بالعافيه انتوا مين؟  
سميره : انتوا عايزين إيه؟  
عبد الله : اتسم حراميه.. اوعك انت وهو الدولارات حولتها  
على أمريكا ومن أمريكا على مصر ما معيش  
فلوس هنا  
رجل ١ : عبد الله عبد المطيع  
عبد الله : أيوه عبد الله عبد المطيع الشهير باين بسبوسه  
سميره : (تهمس له) طلع الكارنيه يا خويا باين عليهم  
عفاريت عارفين اسمك  
عبد الله : الكارنيه اهه.. الكارنيه.. أمشوا.. ما بيمشوش يا  
سميره  
سميره : انتوا مين؟  
رجل ٢ : انت بتشتغل فى اللجان الوطنيه والحزب الثورى؟  
عبد الله : أيوه  
رجل ١ : انت عارف معناه إيه؟  
عبد الله : أيوه عارف  
رجل ١ : عارف إيه؟  
عبد الله : الكارنيه.. معاها اهه.. اجري وهو (بيكى) ما  
بيجروش يا سميـره

- رجل ١ : أنا مقدم حبشى بمكتب المتابعات (يخرج كارنيه)
- رجل ٢ : أنا العقيد محمد عارف مكتب المؤامرات (يخرج كارنيه)
- (ينهار عبد الله وسميره) (يجلسان)
- عبد الله : انتوا بتوعنا؟
- رجل ١ : أيوه بتوعكم
- رجل ٢ : انت كده بتتعاون مع الأعداء
- رجل ١ : دول أعداء
- رجل ٢ : أيوه أعداء مش بيشتموننا فى الإذاعة والتليفزيون
- والصحف واحنا بنشتهم
- عبد الله : هو احنا بنشتهم بعض ليه؟
- رجل ١ : هما طلبوا منك إيه قول الحقيقه علشان اخفف عنك حكم الإعدام
- عبد الله : اعدام سامعه يا سميره علشان يطرد العفاريت
- سميره : والنسبى يا خويا الراجل قاعد يتحاول عليه خد الكارنيه يقول لا.. خد الكارنيه وعبد الله يقول لا
- لحد ما صوت على حلمى يا حلمى
- رجل ٢ : وقاله إيه تاتى؟
- رجل ١ : حتفجر ميدان العتبه إمتى؟
- رجل ٢ : حتفجر ميدان اسفنكس إمتى؟
- رجل ١ : قالوا لكش حتفجر كوبرى قصر النيل؟

- رجل ٢ : قالوا لك حتفجر مبنى الاذاعة والتلفزيون؟
- رجل ١ : قول واحنا حنخفف عليك المؤيد
- عبد الله : مؤيد يا سميره
- سميره : أقول لك أنا يا خويا هما قالوا له نفسك فى إيه يا
- عبد الله قال لهم نفسى فى شوية طوب وزلط
- واسمنت.. شقه.
- رجل ١ : اكتب طوب وزلط واسمنت وشقة بداية شبكه
- سميره : وبعدين قالوا طيب خد الكارنيه واكتب لنا خطب
- ناريه.. جامده.
- رجل ٢ : (يكتب) منشورات.. وبعدين عاطولك كام؟
- عبد الله : كارنيه.. اهه لسه بشحمه ودمه كارنيه ورق ما
- يسويش عشره صاغ
- رجل ١ : عبد الله انت ما تنساش أمك مصر
- رجل ٢ : امك مصر وطنك مصر
- سميره : بطنى.. بطنى يا عبد الله.. الحقنى.. الحقنى
- رجل ١ : المستشفى.. المستشفى
- رجل ٢ : الإسعاف.. الإسعاف
- (ضوضاء) (صوت سياره الإسعاف)
- (يتغير الديكور إلى مبنى عام لوزارة التربية مبنى
- مكتب وكيل الوزارة.. تجلس سميره سكرتيره..
- لافتة أمامها)



سميره : (تستحدث فى الهاتف) ولدت والحمد لله وجبت واد  
الحمد لله

الوكيل : (يضرب جرس) سميده

سميره : (تدخل) افندم

الوكيل : اتصلى بالمديرين العموم

سميره : اتصلت يا فندم

الوكيل : زين باهى (تخرج سميده)

الوكيل : (يضرب الجرس) سميده

سميره : (تدخل) افندم

الوكيل : اتصلى بالببيت وقولى لهم ما ينظرونى (ما  
يتنظرونش) على الغدا

سميره : حاضر (تخرج)

الوكيل : سميده

سميره : افندم

الوكيل : ابى شاهى والا أجول لك جهوه

سميره : ح اقول نعم بكر

الوكيل : لا سويها (اعملها) بايديك

سميره : حاضر

الوكيل : سميده

سميره : افندم

الوكيل : الاجازة السنة دى ح اقضيها فى مصر

سميره : تتور مصر يا افتدم  
الوكيل : تعرفين ليلى علوى وفيفى عبده يا سمييره؟  
سميره : لا باشوقهم فى التليفزيون  
الوكيل : مين يعرفهم؟  
سميره : ماأعرفش  
الوكيل : أى خدمات بينوها (عايزينها) أنا تحت الامر.. قولى  
لهم كده وسلملى عليهم  
سميره : (تضحك) أنا ما اعرفهمش.. عن اذنك  
الوكيل : سمييره  
سميره : افتدم  
الوكيل : ابيك (عوزك) تروحين السوق بعد الظهر مع المدام  
سميره : حاضر  
الوكيل : عايزك تعلميها ايش لون (إزأى) تشتترى الملابس  
والحاجات  
سميره : حاضر  
الوكيل : سمييره  
سميره : افتدم (جرس التليفون)  
الوكيل : ردى على التليفون  
سميره : الو.. مكتب السيد وكيل الوزاره مع حضرتك  
زوجة الوكيل : (صوت) انت مصريه؟  
سميره : أبوه السكرتاريه مع حضرتك

زوجة الوكيل : (صوت) شوا اسمك؟ (اسمك إيه؟)  
 سميره : سميره  
 زوجة الوكيل : أنا زوجته اللبنانية.. هاتيه الخليوص دا من عندك  
 سميره : واحده بتقول زوجتك اللبنانية  
 الوكيل : هالمجنونة (ياخذ السماعه ثم يعيدها إلى سميره)  
 سميره :  
 سميره : افندم  
 الوكيل : جولى لها عندى اجتماع هام مع الوزير  
 سميره : (تأخذ السماعه) السيد الوكيل عنده اجتماع مع  
 الوزير  
 زوجة الوكيل : وزير.. وزير إيه.. تلاقيه واقف يتفشمر معاكى  
 سميره : لا يا فندم.. أى خدمات.. مع السلامة.. (تضع  
 السماعه)  
 زوجة الوكيل : (صوت والسماعه مغلقة) شيفاك يا ملعون  
 الوكيل : وين هي؟ (فين هي؟)  
 سميره : بتكلم مين؟.. أنا قفلت السكه.  
 الوكيل : أنا لازم اطلق اللبنانية الملعونة.. زوجة تاتيه فاشله  
 واتزوج واحده مصريه.. زين مزبونه. عاجله زيك  
 يا سميره قلتى إيه؟  
 سميره : فى إيه؟  
 الوكيل : تطلقى زوجك وتتزوجينى يا سميره.. سميره

سكيره : (تجرى) من فضلك ارجوك عيب كده.. أنا ست متجوزة

الوكيل : عيبها المصريه الشرف وعششان احنا وزاره تربية ح الفتنسها ح اطردها عششان اربها.. باهى.. زين (يتغير الديكور إلى منزل عبد الله وسميره) (صوت مظاهرات)

هتيف : يسقط يسقط.. الخونه

المجموعه : يسقط.. يسقط كل الخونه

عبد الله : (يفتح النافذه) دى صور الجماعه بتوعنا عاملينها عرايس وبيشتمونا

سميره : مظاهرات ضدنا

عبد الله : الحل إيه يا سميـره

سميره : مش عارفه يا عبد الله

عبد الله : حضرى شتط هدمنا يا سميـره

سميره : يمكن يا عبد الله يتصالحوا

عبد الله : يتصالحوا بعد ما يعذبونا يا سميـره

سميره : حاضر يا عبد الله صوت دقات طبول كأنها جنازة..

عمال مصريون يسرون مريوطه ايديهم فى حبال وملقوفين فى أصفاد وأمامهم شرطى وخلفهم شرطى ويسرون مع أغنية فى الخلفيه بلدى يا بلدى أنا نفسى أروح بلدى

سميره : سامع يا عبدالله.. دا صوت الناس بتوعنا  
عبد الله : أيوه يا سميره الناس بتوعنا. عايزين عيش  
وحلاوة (يفتح النافذة ينظر عبد الله وسميره  
يحدثهم)  
عبد الله : الله الله.. دول الجماعة بتوعنا.. رايحين فين يا  
مصريين؟  
المجموعه : مش عارفين  
عبد الله : رايحين على فين؟  
المجموعه : مطرودين  
عبد الله : على فين؟  
المجموعه : مش عارفين  
سميره : مش عارفين بعد إيه.. يا عسكري يا عسكري.. يا  
عم يا عسكري  
شرطى : مالك يا مصريه  
سميره : الناس دى رايحه فين؟  
شرطى : رايحين مصر  
سميره : على المطار  
شرطى : على الحدود ماشيين  
عبد الله : حدود إيه؟  
شرطى ٢ : حدود إيه؟  
شرطى ٢ : حدود مصر

عبد الله : ليه؟  
شرطى ٢ : انت يا مصرى حتحصلهم.. (يخرجون من على المسرح)  
شرطى : (يدق الباب) افتح يا مصرى  
عبد الله : خير  
شرطى ٤ : يلا انت وحرمتك بره  
عبد الله - : بره فين؟  
شرطى ٤ : بره بلادنا.. روحوا لبلدكم للجماعه بتوكم  
عبد الله : واحنا مالنا؟  
شرطى ٤ : مش انتو ساكتين على جماعتكم؟  
عبد الله : وانتم مش ساكتين على جماعتكم؟  
شرطى : بتسب حكومتنا يا مصرى.. انت وحرمتك  
سميره : الشنطه جاهزه يا خويا عبد الله كان قلبه حاسس  
اتكم حتطردونا  
شرطى ٤ : تطلعوا من غير شنطكم  
سميره : من غير شنطنا؟  
شرطى ٤ : أيوه ولو زودتم حنطلكم من غير هدومكم  
عبد الله : لا.. لا اغير هدومى وامشى.. كده (يخرج بملابسه الداخليه) يلا نمشى على الحدود يا سميره هاتى زمزمية ميه  
سميره : حاضر يا عبد الله.. نأخذ قززين ميه ما عملناش

### حسابنا واشترينا زمزمية

- عبد الله : يلا يا سميره وهاتى الولد عنتر  
(يظهر السفير المصرى ومعه جنديان يدفعانه)  
جندى ١ : بره  
جندى ٢ : بره  
السفير : أنا السفير المصرى. احتج وبشده على معاملة  
المصريين هذه المعاملة.. أين حقوقهم؟ وأين حقوق  
الإنسان؟ أين ميثاق جامعة الدول العربية أين  
جمعيه حقوق الإنسان العالميه؟ أين؟ أين أبى  
وأمى؟ أنا ح أبلغ الوزاره (يخرج هاتف لاسلكى من  
جيبه)  
السفير : الو الخارجيه  
ص من الخارجيه : أيوه  
السفير : أنا السفير فى الدولة  
ص من الخارجيه : أيوه عارفين وسمعنا كل حاجه من الإذاعات  
الأجنبية  
السفير : المشهد مريع.. مش ممكن.. اتقنونا.. اطردوهم من  
ارضنا.. زى ما عملونا عملوهم  
ص من الخارجيه : انت اتجننت نطردهم إزأى وهما معاهم دولارات  
وهم ماثيين البلد بالسباحه  
السفير : أنا اشاهد إمامى جيوش من المصريين تبكى

وتصرخ وتضرب

- ص من الخارجيه : ما يبقاش قلبك حنين.. المصريين واخدين على كده
- السفير : انى احتج لهم ولوزارتهم ومسئولهم
- ص من الخارجيه : يخرب بيتك مش عايزين العلاقات بينا وبينهم.
- الامن القومى - الاستراتيجيه السياسيه
- السفير : أمن إيه؟ واستراتيجيه إيه؟
- ص من الخارجيه : يا عبد العزيز انت سفير مش قائد سياسى. فاهم
- يعنى إيه سفير؟
- السفير : يعنى يمثل رئيس الجمهوريه
- ص من الخارجيه : يخرب بيتك انت صدقت كلام الكتب؟ أنت موظف فى
- اداره العلاقات الخارجيه التابعه لوكل الوزاره التى
- يرأسها وكيل أول وزارة الخارجيه الذى يرأسه
- مساعد الوزير الذى يرأسه الوزير الذى يرأسه
- رئيس الجمهوريه فهمت؟
- السفير : يعنى أعمل إيه؟
- ص من الخارجيه : أنت مش حتمل.. أنت مفصول يا أستاذ لأنك
- متسرع وبتشوه الحقيقه وخليت اخوانا يزعلوا
- ومش حبيجوا للسياحه ومعاهم الدولارات (السفير
- يبكى.. يضع السماعه فى جيبه)
- عيد الله : سعادده السفير
- السفير : عايز إيه انت روخر؟



- سميره : احنا حنروح مصر ماشيين؟  
 السفير : أيوه  
 عبد الله : هي الطيارات والصواريخ حتضربهم أمتي؟  
 السفير : احنا ما بنضربش حد من ضربك على خدك الأيمن اعطيه الأيسر فاهم؟  
 سميـره : يعنى يضربونا على قفأنا ونسكت؟  
 السفير : لا مش حنسكت.. نسكت إزأى لا يمكن نسكت..  
 نعيـط.. نصوت (يخرج معهم.. يتحركون مع تغيير الديكور الى جمارك الحدود المصرية)  
 موظف ١ : حمد لله على السلامة.. جوازك  
 عبد الله : مش معايا.. طلعوننا من غير هدومنا.. من غير جوازتنا البلد الغربية  
 موظف ٢ : لازم نعمل لك إجراءات الوصول  
 سميـره : إجراءات إيه مش كفايه مطرودين من غير هدومنا من جميع حقوقنا  
 موظف ٢ : حقوقكم محفوظة.. الدولة بتطالب بحقوق المصريين والصحافة كتبت والإجراءات مستمرة  
 رجل مهم ١ : الحمد لله مادام الصحافة كتبت يبقى اطمئن  
 رجل مهم ٢ : معاك اوراق تثبت مين انت؟  
 عبد الله : (يفتش جيوبه) (كارنيه) كارنيه اهه ما فيش غيره  
 رجل مهم ٣ : (ينظر للكارنيه) أهلا.. أهلا.. انت كنت عضو حزب

ثورى

- عبد الله : هم عملهولى \*
- سميره : أيوه يا خويا
- رجل مهم ٢ : فتشوه تفتيش ذاتى دا عميل وهى عميله
- عبد الله : عميل يعنى إيه؟
- رجل مهم ١ : فتشوه دول عملاء
- سميره : عميل إيه الراجل جاي بالببجامه وأنا بجلايية البيت
- وتقول عميل
- رجل مهم ١ : يمكن تكون رأفت الهجان
- عبد الله : لا رأفت الهجان ولا رأفت الهجاسى
- سميره : اتتلوا على عينكم احنا مصريين والله مصريين
- رجل مهم ٣ : احنا عارفين انكم عملاء مزروعين.. مزروعين
- داخل البلد
- عبد الله : (يضحك) مزروعين فين؟ اتتوا حلتوا مشكلة الحاج
- شعبان وفلوسنا ولا لسه
- رجل مهم ٣ : انت كمان عندك فلوس عند الحاج شعبان تبقى
- عميل محترم كام مليون حولتهم من الدول الغربية؟
- عبد الله : مليون إيه؟ ونيلة إيه؟ مليون بلوه.. مليون مشكلة
- سميره : ما حلتوش مشكلة الحاج شعبان؟
- رجل مهم ١ : جيت فلوس منين يا ولد؟
- عبد الله : دول تحويشة عمرى من الدول الشرقية

- رجل مهم ٢ : الله دا انت عميل مزدوج مع الدولة الشرقية والغربية
- عبد الله : آه
- رجل مهم ١ : اسمك إيه يا ولد؟
- عبد الله : عبد الله عبد السميع ابن بسبوسة
- رجل مهم : ما شاء الله ما شاء الله.. وانت نسل ابن بسبوسة؟
- سميره : أيوه ودا كان عميل كمان.
- رجل مهم : اخرس
- عبد الله : خرس
- سميره : ما تخرسش رد عليه لحد امتي حتفضل جبان
- عبد الله : عايز مني إيه.. اديني بارد عليه ايه يا سميره ح
- أفضل جبان لحد امتي.. بارد عليه ايه يا سميره.
- رجل مهم ٢ : انت يا ولد بتشتغل إيه؟
- عبد الله : اشتغل قفا
- رجل مهم : قفا
- عبد الله : قفا بيتضرب
- رجل مهم ٢ : ما تهزرش.. بتشتغل إيه؟
- عبد الله : مدرس
- سميره : وأنا مدرسه
- عبد الله : عميل وعمله مش دا اللي يريحك
- رجل مهم : الكارنيه دا فيه سجن عشر سنين

- عبد الله : عشر سنين يا.. يا عنتر يابنى ح اطلع القاك راجل  
الطفل : (يبكى)  
عبد الله : ما تزعلش يا عنتر.. حاطلع من السجن ألكاك  
اسمك قرنى.. إيه رأيك يا سميره غيرى اسم الواد  
عنتر وسميه غافل والواد التاتى سمييه قرنى  
سميره : يا سبى.. يا سبى  
عبد الله : انتى حتعدى على يا سميره أنا لسه عايش  
سميره : بمسكوك لسه.. يسجنوك ليه (يتحول الديكور إلى  
زنزانة) (فى الزنزانة يقف عبد الله والمسرح مظلم)  
ص من الخارج : انت سجين زنزانة ٧.. يا نزول زنزانة ٧ ياللى  
اسمك عبد الله  
عبد الله : أيوه  
ص من الخارج : انت شيوعى؟  
عبد الله : لا هو فيه شيوعية؟ ما خلصت الشيوعية خلاص  
ص من الخارج : انت من الجماعات المتطرفة؟  
عبد الله : لا  
ص من الخارج : أمال انت إيه؟ داخل هنا ليه؟ اتجاهك إيه؟ قومى  
عربى؟  
عبد الله : بتقول إيه؟  
ص من الخارج : قومى عربى؟  
عبد الله : لا

ص من الخارج : ناصري؟  
عبد الله : لا  
ص من الخارج : اشتراكي؟  
عبد الله : لا أنا حمار  
ص من الخارج : هو فيه تنظيم جديد للحمير؟  
عبد الله : (يبكي) مش عارف  
ص من الخارج : يابني مسكوك ليه؟ وسجنوك ليه؟  
عبد الله : أصل أنا كان معايا كارتنيه من الدولة الغربية عضو  
الحزب الثوري  
ص من الخارج : (يضحك)  
عبد الله : بتضحك ليه؟  
ص من الخارج : يا بني احنا بقينا عاملين وحدة من الدولة الغربية  
في مجلس  
عبد الله : أحنا والدولة الغربية اتصالحنا وعملنا وحدة  
ص من الخارج : أيوه  
عبد الله : أمال أنا مسجون ليه.. يا ناس يا هوه.. أنا عايز  
المأمور (يفتح باب الزنزاة يدخل ضابط)  
الضابط : أيوه يا ولد عامل دوشه ليه  
عبد الله : يا باشا أنا مسجون ليه.. مش علشان أنا باتعاون  
مع الدولة الغربية  
الضابط : أيوه

عبد الله : وانتوا اتصالحتم مع الدولة الغربية وعاملين وحده  
الضابط : انتوا مين؟  
عبد الله : مش انتوا الحكومة؟  
الضابط : يابنى انت هنا بقرار سياسى  
عبد الله : قرار سياسى.. دا أنا.. أنا طول عمرى كان هدفى  
عيش جبان تموت مستور  
الضابط : با قول لك إيه اكتب التماس يمكن تطلع.. لكتبه  
للسياسيين مش لمي  
عبد الله : حاضر.. حاضر.. (يخرج سبوت عليه)  
عبد الله : (بلاى باك) السيد المسئول السياسى.. فاكرك أنا  
مش ناسى.. عارفك يا سيدى وتاج راسى.. السيد  
المسئول السياسى.. عارفك يا سيد الناس.. اناك  
فلته زماتك واناك سيد مكاتك وانى أنا الفقير  
المواطن عبد الله عبد السميع بن بسبوسه.. واناك  
سيد زماتك واناك سيد مكاتك وانى أنا الفقير  
المواطن عبد الله عبد السميع بن بسبوسه.. واناك  
سيد زماتك.. اسمى وايش يكون جنبك يا سيدى  
الكون.. أنا سلمت أمرى واحلف اليمين ما اقراش  
جرايد تاتى ولا أسافر فى الشمال ولا أسافر اليمين  
بس انت ارضى عنى.. طلعنى وفك سجنى الهى  
يارب تبقى سيد الكون الكبير

(زغردة وفرح وهرج ومرج ، عبد الله يقف خارج  
السجن ترتفع القضبان لأعلى وتقف سميره معه فى  
الشارع ويسحب ولديه فى يديه.. زحام فى  
الشارع.. ناس تتجمع يمينا وقد كتب لافتة  
متضررين شركه الحاج شعبان للاستثمار والأموال  
وتجمع آخر فى اليسار اسماء المنكوبين  
والمتضررين من الدولة الشرقية والغربية)

(ما بين هؤلاء وهؤلاء يجلس شخص مهم يمثل  
الحكومة فى منتصف المسرح على المنصة العاليه)  
(يقعد عبد الله مع المجموعه ١)

مجموعه ١ : (مجموعه الحاج شعبان) يا ناس فلوسنا.. يا ناس

فلوسنا مش الحكومة قالت حتوزع علينا حقوقنا

مسئول الحكومه : الحكومة شكلت لجنة واللجنة شكلت لجنة واللجنة

شكلت لجنة ثالثة والثالثة شكلت رابعة والرابعة

شكلت خامسه والخامسه

مجموعه ١ : شكلت سادسه والسادسه شكلت سابعه.. طيب

الثلاثة مليار بتوع الحاج شعبان اللي قالت عليهم

الحكومة موجودين سيولة فين؟

مسئول الحكومه : إلا فين.. فى الحفظ والصون عندنا اطمئنوا

عبد الله : اطمئننى يا سميره فلوسنا عند الحكومه خلاص

تعالى نروح فى الصف الشمال (يقف عبد الله

إمامهم فى صف ولافتة متضررى الدول العربى  
(الشرقية)

مجموعه ٢ : احنا المتضررين من الدوله العربيه الشرقيه طردونا  
وفلوسنا عندهم وهدومنا عندهم.. اجورنا عندهم  
اموالنا عندهم

سميره : أيوه والنبي  
مسئول الحكومه : يا جماعه.. يا جماعه.. احنا قدمنا شكوى لمجلس  
الأمن ومجلس الأمن حولها للجنة العمل الدوليه  
ولجن العمل الدوليه حولت الشكوى بتوصيه..  
واللجنة ثالته قالت لنا اتم عرب اتفهموا مع بعض

مجموعه ٢ : وبعدين  
مسئول الحكومه : احنا تعينا ووزيرنا عمال بيتفاهم مع وزيرهم  
مجموعه : يا سلام  
مسئول الحكومه : أمال الحكومه مش نايمه الا حقوق المصريين..  
حقوقهم محفوظة

مجموعه ٢ : امرى لله  
مسئول الحكومه : أى ملیم أى قرش أى فلوس أى دولار أى درهم أى  
بنس أى استرلینى لواحد مصرى الحكومه مش  
حتسبیه

مجموعه ٢ : يا سلام  
مسئول الحكومه : أمال احنا



- عبد الله : انتم مين؟ ما هو كل واحد من وزراءهم رايعين جايين ويتصوروا في التلفزيون انتوا بتتكلّموا مع المسؤولين في إيه؟
- مسئول الحكومة : بتتكلّم مش ساكتين وبعدين فلوسنا فلوسنا عايزين الوزراء يسيبوا المشاكل الكبيرة وبيتكلّموا على فلوسكم إما الناس قلالات الأدب
- عبد الله : سميرة
- سميرة : نعم
- عبد الله : تيجي نهاجر يا سميرة؟
- سميرة : نهاجر على فين؟
- عبد الله : نقعد جنب الرسول في المدينة المنورة ونبقى مع المجاورين
- سميرة : صعب عايزين فيزا
- عبد الله : نساقر القدس؟
- سميرة : صعب عايزين فيزا
- عبد الله : نساقر أمريكا؟
- سمير : صعب عايزين فيزا
- عبد الله : نساقر روسيا؟
- سمير : صعب
- عبد الله : نروح المانيا؟
- سميرة : بيروحوا الناس المهاجرين

- عبد الله : اتجلترا؟  
سميرة : نفس الحكاية  
عبد الله : طيب نروح فين؟  
سميرة : مش عارفة  
عبد الله : فكرة يا سميرة.. فكرة يا سميرة.. عندي فكرة  
(يجذبها ويجري يمك جريدة.. قسم الاعلانات..  
جريدة الايام)  
عبد الله : عايز اعمل اعلان  
الموظف : اتفضل هات الاعلان  
عبد الله : خد (يعطيه ورقة) عايز كام  
الموظف : إيه دا يا أستاذ؟  
عبد الله : فيه إيه؟  
الموظف : دي نكتة مش اعلان مش هاتنزل الاعلان دا  
سميرة : ليه ياخويا؟ ماله الاعلان دا؟  
الموظف : اتت اكيد مجنون.. اتفضل.. اتفضل يا سيدي ما  
تقرفناش كفاية القرف اللي احنا فيه  
سميرة : بلا يا عبد الله.. بلا.. عندي فكرة تانية.  
(تخرج من يمين المسرح. يعودان من يسار  
المسرح يحملان لافتتين وأولادهما يحملان لافتتين)  
كتب عليها :  
(نحن اسرة بلا جنسية نطلب وطننا نطلب إحساسا

**بالإنسانية)**

الناس تسير حولهم في ضحك وهرج ومرج..  
الناس يظنون أنهم متسولون ويقدمون لهم أموالا.  
(مســــــــــــــتار)

مطابع الهيئة المصرية العامة للكتاب

رقم الإيداع بدار الكتب ١٦٧٧ / ٢٠٠٤

I.S.B.N 977 - 01 - 8986 -3